

鼓  
琴  
筆  
錄

地 113.51  
9915  
:1



鼓樂筆錄

鼓樂筆錄  
卷之五  
除氏譜圖  
周禮版

徐沅青先生遺像



其容藹藹其性  
肫肫文章道德  
坊表後人

新建蔡可權題  
遵化李孺書

天津徐沅青先生小傳

君姓徐諱士鑾字苑卿一字沅青天津人祖諱焮乾隆癸卯副榜貢士老而劬學卽世所稱徐朗齋先生也君克繩祖武學古有穫少從同邑楊香吟先生治舉子業咸豐八年舉於鄉十一年官內閣中書旋擢典籍累遷侍讀記名御史士大夫多慕其治事勵行樂與之遊同治十一年出守台州居九年政績平易台民頌弗衰光緒七年引疾歸里年纔四十九壹志勤著述每輟稿必就正楊先生猶昔年執經侍坐時也喜探討掌故內閣

小傳

題名皇朝謚法考皆有續纂摘趙宋一代故實爲宋豔十二卷俾後之學者不以情欲之私害禮義之正又著醫方叢話八卷闡古人立方精意以濟病者博集周景王以來迄唐咸通貨幣爲古泉叢考四卷錄鄉黨遺聞佚事爲敬鄉筆述八卷敬恭桑梓結撰尤精文鈔一卷詩鈔五卷均以蝶訪居名以太常仙蝶會兩至其居乃別輯仙蝶圖詠二卷蓋於太常仙蝶有夙緣云宣統三年國步改時君年七十有九巖阿養晦憂心殷殷文酒酬酢頽然寡歡年八十有三卒

天津徐沅青先生小傳

徐君諱士鑾字苑卿又字沅青天津人乾嘉間有副榜貢士徐公朗齋諱焮者好讀書終其身丹鉛不去手君之祖考也君嘗受業同縣楊香吟先生之門治舉業能中規度舉咸豐八年鄉試十一年入資爲內閣中書旣補官陞典籍再陞侍讀記名御史同治十一年出守台州光緒七年引疾歸始君仕京師與諸名士遊卽喜探討故事內閣題名皇朝諡法考皆有續纂及解組歸年甫四十九益潛心著述時楊先生以耆宿設帳里中生

敬鄉筆述傳

長春書屋

徒甚盛君有撰著輒就質疑先生以義廣之亶亶受教無異昔年在塾時故君嘗以門弟子領袖自居君以爲生人情欲之私最足敗名墮節值讀宋史遂刺取書中故事條舉類證而規之以先正法言旣自做亦使人戒爲宋豔十二卷又仿陸宣公忠州故事冀以方劑活人爲醫方叢話八卷搜集歷代貨幣始周景王迄唐咸通博引精斟爲古泉叢考四卷手錄天津遺聞褒然成冊爲敬鄉筆述八卷其所著集爲蝶訪居文鈔一卷詩鈔五卷蝶訪居者因太常仙蝶以名其齋故又輯仙蝶圖

詠二卷君歸田後歷三十年之久未嘗與文籍相違以是所撰述富而致力尤勤者則在敬鄉筆述一書懼遺文之散亡懲舊志之罅漏凡事涉文獻雖片詞隻字罔不什襲鈔存往往拾一墜聞歡若獲寶至於剖析義法糾正瑕疵則嚴如酷吏直如諍友於前人之書不少貸焉蓋自鄉人蔣君雄甫後視斯事如性命者君一人而已二十六年兵燹文會渙散楊先生亦沒君失所放齒衰世亂意興頹然宣統三年年七十有九值國體變益難爲懷越四年卒

敬鄉筆述傳

二

長春書屋

高凌雯曰吾聞台州號稱難治故徐君作郡未嘗有赫赫之名然亦無墮行獨其殫心鄉故窮搜富積以餉後人其功未可沒也余纂縣志至宣統辛亥年止其時君尙在例不立傳今沒十餘年矣恐其遂卽於湮也爲掇其事行如此

敬鄉筆述序

詩曰惟桑與梓必恭敬止孔子言夏殷之禮而歎其無  
徵特以文獻不足故則文獻有關於鄉黨也豈淺鮮哉  
津邑爲畿輔近地文物爲他州縣冠始有衛志繼有縣  
志縣志之續修也則在咸同間維時世變迭出傳聞互  
異纂述之餘不無譌舛闕略於此欲以信今傳後不可  
無以釐正之而吾人譏述於其所譌所闕者須於抑揚  
輕重之間隨在以定所歸不可有與前人爲難之見將  
使人更有以議我也徐子沅青敬鄉筆述八卷訂譌補

敬鄉筆述序

一  
長春書局

闕務求詳盡不使後人一誤再誤厥功甚鉅矣且北方  
風氣不尙標榜不務聲華鄉前輩老成典型率皆醇謹  
自守無詐無虞非必有卓絕大過人處而述其生平言  
行不苟足爲人所矜式者正不乏人如略而弗書將所  
謂十室之邑必有忠信謂之何哉庸行也實爲至行是  
在有識者表而出之一任歧途煽惑卒能守正不阿我  
行我素俾見異思遷之士或有所悔悟不至苟於目前  
頓改故步此卽載筆者所厚望也至編中所紀孝義節  
烈則又就其所見所知者詳爲訂正務使其人其事久

而可攷其審慎鄭重之心尤足以勵人心而表潛德統  
觀八卷有典有則不蔓不支夫豈舍其大取其細徒供  
人之瀏覽已哉

光緒二十四年戊戌閏三月庸叟楊光儀

時年七十七

敬鄉筆述序

二

長春書屋



天津縣新志 藝文

敬鄉筆述八卷

徐士鑾撰士鑾字沅青見徐烝傳士鑾中歲歸田  
潛心撰述尤以鄉邦掌故爲重凡有關於文獻者  
雖片詞隻字罔不手錄輯存以備後來再修縣志  
及續纂津門詩鈔之助凡二書所闕者補之譌者  
正之徵引繁富而附以己見頗類考訂家言士鑾  
素不滿意於同治續志時有指摘分見各篇更羅  
列錯漏者數十條彙爲一卷繩愆糾謬殆吳氏之

敬鄉筆述

諍友也

一  
長春書畫屋

敬鄉筆述

凡例

一是編所輯軼事遺詩就余所見謹爲錄存用備再修邑志續集津門詩鈔採擇至人物曾否列入邑志詩章有無見諸詩鈔卷內皆分別敘明惟寄籍僑寓者概不闕入

一是編無體例錄存所見有可攷證者隨檢各書攷證未能查出者注明再攷謹於繕寫清本時略加排次列女另編前六卷所輯悉取政事文學忠義孝友貞烈之足傳者蓋宗浦陽人物記之意

敬鄉筆述凡例

一 長春書屋

一是編第七卷彙紀也就載籍所見及近事所知者紀之因皆有關邑志並於名宦建置紀略一則後附紀公舉善舉義舉等事然第略誌名目以其有官冊在也

一是編辨證續邑志處隨所見攷校卽爲揭出不僅第八卷所臚列也其未經勘出攷證者正恐尙多鄉賢人物應補入者知仍不少與夫軼事遺詩之可傳者嗣有所見謹當隨時筆紀彙爲續編

敬鄉筆述目錄

卷一

牛見垣兄弟中翰

牛中翰彝

牛師竹祖孫中翰

王觀濤侍御二則

孫又深孝廉

朱羲玉徵君

沈影村封翁德政

敬鄉筆述目錄

徐北山封翁義舉

邵朗巖司業

金茂才甌

梁湯作明府

周紫昂中丞

王鶴舟太守

鮑雙五贈牛太僕詩

周大迂明經

楊無怪孝廉

華春浦明府 附華梅莊學博

齊秋帆觀察

卷二

周南橋別駕

吳景韓封翁詩

徐鑿三封翁詩

徐雪厓太守詩

張公度二尹詩

四老人詩

敬鄉筆述目錄

二

長春書屋

五老人詩

附周衣亭太史

耆飲昇平册序

耆飲昇平册贊

耆飲昇平册跋

周月東硯事拾遺

龍東溟處士詩集

俞厚安軍門詩

牛次原太僕詩

吳念湖太守收藏

戴虛舟老人

敬鄉筆述目錄

三

長春書屋

敬鄉筆述卷一

天津徐士鑾沅青輯



牛見垣兄弟中翰

內閣漢票簽中書舍人題名爲歙縣鮑子年觀察康官中書時所編輯也冊中第三頁載牛射斗直隸天津人順治口年由貢生到閣其次卽牛象斗注射斗弟直隸天津人順治口年由廩貢生到閣檢閱舊邑志流寓人物傳牛射斗字見垣山西長治人僑居天津順治間隨洪經略承疇督理軍餉授中書舍人後隨征江南多所

敬鄉筆述卷一

一 長春書屋

擘畫次蕪湖卒於軍而象斗之名舊志闕焉續邑志恩歲優貢生中未載於例貢例監內載牛象斗貢生太僕寺少卿據中書舍人題名觀之牛射斗兄弟並注天津人知見垣中翰僑寓天津卽占籍天津也津邑居民自順治年來由各省遷來者約十之七八若牛氏兄弟實爲津邑官中書舍人發端者也

牛中翰彝

中書舍人題名載牛彝直隸天津人順治口年由口貢生到閣其名次僅後牛象斗二名是否見垣中翰一家

無從查攷案題名例凡祖孫父子兄弟叔姪先後到閣者必詳誌之如象斗名下注射斗弟是也抑當日排次或因無可稽攷闕載耶檢閱舊邑志續志皆無牛中翰之名長蘆鹽法志選舉錄貢生內載牛彝拔貢生官內宏文院中書舍人案中書舍人國初尙有文華殿武英殿內宏文院祕書院國史院之分牛中翰入官正國初時也

牛師竹祖孫中翰

中書舍人題名載牛稔文直隸天津人乾隆三十口年

敬鄉筆述卷一

二

長春書屋

由舉人到閣官至湖南督糧道又載牛鎮稔文孫直隸天津人道光元年由舉人到閣官至安徽鳳陽府知府册後鮑子年正誤三識同閣吳纘先太守於厰肆得內閣行走檔一册見贈中敘牛鎮大興籍云檢閱津門詩鈔牛鎮乃次原太僕坤之子師竹觀察稔文之孫中書舍人題名牛鎮注天津人者因係稔文之孫蓋不知次原太僕官戶部日改籍大興然觀太學題名錄牛坤固注天津縣民籍也

王觀濤侍御二則

吳伯新孝銘樞垣題名云軍機處之設始於雍正八年  
時用兵西北兩路以內閣在太和門外不足以昭慎重  
乃於隆宗門內置軍機房軍機章京題名編次蓋自雍  
正九年始直軍機房者仍皆選中書舍人之謹密者入  
直繕寫至乾隆二十年始間用部員而舍人猶十之八  
九也吾邑王觀濤侍御學海乾隆四十三年七月由內  
閣中書充補繼此爲先叔祖晴圃中丞公斫乾隆六十  
年九月由內閣中書充補又齊秋帆觀察嘉紹嘉慶四  
年二月由內閣中書充補繼此吾邑充樞垣章京者尙  
也

敬鄉筆述卷一

三

長春書屋

接踵有人然王觀濤侍御實爲津邑入樞垣者第一人  
也  
華少梅茂才光鼎脞錄載金芳舟先生玉珽字藕川黃  
竹老人胞弟也性嗜琴曾繪圖照一幀題詠甚夥茲將  
邑前輩題句錄出王意田學海五古云西風吹颯颯松  
竹四圍繞山色淨無埃爽氣來林杪何處發清音幽人  
坐雲表橫琴一再鼓逸韻自縹渺箇中真趣多悠然聲  
漸杳老手善寫生滿幅煙嵐好披圖豁眼界令我塵懷  
掃人生各有情雅俗殊襟抱鍾期不易逢伯牙悲宿草



安道具高風碎琴甘潦倒願君勿輕彈世上知音少少  
梅所錄邑前輩詩十數家觀濤侍御之詩首列一見有  
如獲拱璧者先是述記侍御首入樞垣一則搜尋詩文  
不可得僅於津門詩鈔見梅樹君學博所識侍御數語  
當謹記於心今得見侍御遺詩因檢詩鈔所載摘要錄  
出張楚山先生湘家藏沾上題襟畫冊吳太守人驥送  
楚山先生赴新城學博任作也徐東川部郎瀾有念湖  
太守招集思源莊餞張楚山之新城分體七古一首詩  
後注時乾隆乙未七月吳人驥繪思源莊送別圖王學

敬鄉筆述卷一

四 長春書屋

海題籤注後樹君學博識云按王學海號問渠字觀濤  
乾隆壬午舉人已丑中正榜由中書厯官軍機章京御  
史字法十三行詩無傳觀學博所識知輯津門詩鈔因  
無侍御詩識此數語蓋誌欽仰意也案內閣中書舍人  
題名王學海直隸天津人乾隆三十四年由舉人考取  
中正榜到閣官至陝西道御史題名所載由舉人考取  
中正榜用中書者吾邑僅侍御一人檢核續邑志選舉  
錄亦然觀濤侍御自入薇省厯官清要就諸紀載觀之  
侍御品學概可想見實吾邑卓卓人物也異日重修邑

志當爲侍御立傳續輯詩鈔此詩亦應采入足爲樹君  
學博補憾意田想爲侍御之別字也

孫又深孝廉

津邑王介山運同又樸詩禮堂雜詠七憶詩孫又深云  
我所憶孫登狂歌入酒市胸中自不平海內全無是彭  
殤一死生堯舜皆糠粃才難豈不然誰障東流水先是  
余見周衣亭太史人麒朱谷齋遺詩序序後特及孫又  
申先生蓋幸谷齋先生遺詩得吳念湖太守人驥刊傳  
深冀又申先生遺文亦顯於世也太史序後云孫又申

敬鄉筆述卷一

五

長春書屋

先生者亦吾鄉耆宿也精於制藝雍正癸卯鄉墨天下  
傳誦聞其全稿不下數百篇津人至今想望而不可得  
見大約與谷齋詩等今谷齋詩旣光顯於世獨未知又  
申之幸不幸何如也案孫又深孝廉名嘉俸詩文無傳  
朱谷齋明經名函夏續邑志文苑有傳詩載津門詩鈔  
若又深孝廉者旣見王介山運同之詩而又爲周衣亭  
太史推重如此亦應文苑立傳

詩禮堂作又深周太史  
序作又申余照錄之

朱羲玉徵君

詩禮堂雜詠七憶詩朱羲玉云我憶朱元晦會心在說

書乃於梅福市獨有子雲居零露山中蕙清秋水蘊  
言多人不解解者又何如案津門詩鈔朱紹夏字義玉  
號西廬函夏弟廩貢生與兄齊名雍正初年同舉鴻博  
舊邑志朱潔臣先生同邑傳子函夏紹夏俱以學行知  
名續志文苑朱函夏徵君傳傳末有與弟紹夏同舉博  
學鴻詞一語而未立紹夏徵君之傳檢閱舊志列女傳  
節孝周氏姜皓妻郭氏楊文妻田氏王之臣妻曾氏桂  
聯芳妻四傳皆注邑人朱紹夏撰當日義玉徵君文望  
可以想見且王介山先生七憶詩首謝信符文學穀通

敬鄉筆述卷一

六 長春書屋

州人爲介山先生師餘皆津人次張石鄰明府畧續志  
循吏有傳三卽義玉徵君也文苑亦應立傳

沈影村封翁德政

鄞縣陳康祺郎潛紀聞云溺女之風西江尤甚天津沈  
封翁世華官是省巡檢所至有惠政尤禁溺女剴切申  
諭澆風爲之一變其後長子嶧中乾隆丙午舉人座師  
爲彭文勤公次子峻乾隆甲午副榜座師爲曹文恪公  
秀先孫兆澐嘉慶庚午鄉舉座師爲陳侍郎希曾丁丑  
成進士座師爲戴可亭相國凡封翁子孫輩擢獲科第

無不由江西人暗中識拔者彰顯如此尙謂非天道歟  
檢閱續邑志文苑有東巖孝廉嶧傳循吏有存圃明府  
峻傳僅於例貢例監載封翁之名注廣豐巡檢案封翁  
先官南豐後調廣豐見王寶仁撰沈存圃明府傳中紀聞稱封翁所至  
有惠政信不誣也選舉錄沈維鈺道光乙酉舉人沈恩  
嘉同治丁卯舉人維鈺爲兆雲子恩嘉爲兆雲孫又沈  
耀奎光緒甲午舉人耀奎爲潤田參軍兆霑曾孫兆霑  
卽存圃明府長子封翁後裔科名已綿五代然正未艾  
其積德有獨厚者矣學積陰功遺子孫古語豈欺我哉

敬鄉筆述卷一

七

長春書日屋

徐北山封翁義舉

錢梅溪泳履園叢話乾隆五十年間天津有徐北山者  
以鹺務起家後漸中落嘗以除夕避債委巷聽黑暗中  
有哭聲甚慘以火燭之則一貧士以負債無償將欲自  
經者北山告之曰子亦負人無償者爾亦何必尋此短  
見耶問其所負若干曰二百金探懷中銀適符其數盡  
以與之其人叩謝去隔十餘年北山之貧如故而長子  
瀾次子淮中文武兩進士三子漢中嘉慶戊午舉人其  
孫文煥又中道光戊子舉人案梁敬叔觀察恭辰勸戒

錄亦載此事與此正同檢閱續邑志耆壽徐永鑑名下注有以子瀾貴封奉直大夫九字乾隆五十年正月八日恩預千叟宴御賜詩章如意壽杖錦緞綢紗湖筆端硯選舉錄徐瀾乾隆三十年乙酉科副榜三十五年庚寅科舉人四十五年庚子科進士徐淮乾隆三十六年辛卯科武進士徐漢乾隆四十五年庚子科副榜嘉慶三年戊午科舉人是三子科名皆在五十年以前雖徐漢中舉在嘉慶三年而乾隆四十五年先中副車履園叢話云乾隆五十年間五字恐二字或三字之誤乾隆

敬鄉筆述卷一

八  
長春書屋

五十年封翁已以子貴預千叟宴年已八旬必非五字也今津人尙稱封翁後裔爲文武進士徐家文煥字浣雲與鑾爲兄弟行上輩曾聯宗誼浣雲子維域中同治九年庚午科舉人封翁子孫曾歷外宦皆能以廉潔自持迄今家風依然儒素然後裔蔚起亦正未可限也封翁義舉髫齡時嘗聞老輩津津樂道大略與叢話相同銀數二百亦符惟避債之地云係東南城角樓中地僻罕人至且夙有自經而死者非委巷也

案武進士徐淮爲北山封翁胞姪若瀾若漢則

皆子也近從文煥硃卷履歷攷出特正之

### 邵朗巖司業

沈文和公兆雲蓬窗附錄載天津邵朗巖先生玉清善書中乾隆壬午舉人官司務越二十三年中甲辰進士殿試一甲三名官編修升司業郡屬鼎甲自順治丙戌乙未滄州呂纘祖戴王綸後至先生始繼之續邑志選舉錄乾隆四十九年庚辰科邵玉清殿試一甲第三名授編修升國子監司業上書房行走詳人物檢查人物列傳循吏中有邵葵字景菴玉清子乾隆甲寅舉人任

### 敬鄉筆述卷一

九

長春書畫屋

山西黎城令潔己愛民不名一錢調永濟令再任湖南常寧令皆著循聲而列傳竟遺朗巖司業洵可怪也人物既未立朗巖司業之傳選舉錄司業名下詳人物三字宜刪去津門詩鈔稱先生奉母至孝捷南宮之歲有人於元旦夢觀天榜見第三人邵玉清旁署云孝行可嘉先生工楷書嘗爲母跪書金剛經一百部論先生文學孝行均應立傳余因附錄此則以表章之

### 金茂才甌

蓬窗附錄載金甌家貧讀書生平專以敬惜字紙爲事

晚年始博一矜子琢章先生相中雍正丙午解元丁未  
進士官編修洵升侍讀學士孫竹坡先生世熊中乾隆  
庚午舉人官知縣改教諭皆以善書名竹坡先生學董  
尤神似云續邑志人物傳金茂才首列文苑金甌諸生  
端方質樸生平惜字紙外無他嗜見路遺字紙雖汙穢  
中必親檢焚化數十年如一日子相翰林孫世熊舉人  
皆以善書名與篷窗附錄所載大略相同琢章先生暨  
竹坡先生亦並列文苑竹坡先生嘉慶庚午重宴鹿鳴  
卒年八十餘著有竹坡存稿檢閱選舉錄乾隆五十四

敬鄉筆述卷一

十

長春書屋

年己酉科舉人金甌名下注見進士嘉慶元年丙辰科  
進士金甌名下注字靜菴山東蓬萊萊蕪縣知縣正定  
府學教授詳人物是天津先一茂才金甌後一進士金  
甌也詳檢人物傳僅有茂才金甌首列文苑再無進士  
金甌之傳想當日修志因見文苑列金甌傳卽於選舉  
錄金靜菴先生名下加詳人物三字可謂謬甚因特援  
篷窗附錄並將續志文苑金茂才小傳錄出證之選舉  
錄進士金甌名下詳人物三字宜刪去

梁湯作明府

王介山先生詩禮堂雜纂載邑人梁湯作漢丁酉舉人令關中商州之石泉俗朴民良令無一事惟日鞞履出與防弁對弈耳至割麥日城中男婦盡出其稚子不能攜者則寄官衙云交俞暫管官爲煮餅哺之數日此風他地不可得也案舊志選舉錄康熙丁酉科舉人梁漢名下無注舊錄例誌官階字皆不載今見此條旣知梁公字湯作又知曾官石泉縣知縣可補舊邑志之闕不  
僅見石泉縣當日風俗如此古朴也惟湯作明府詩文概未之見更冀於邑人著作中再有所得

敬鄉筆述卷一

十一

長春書屋

周紫昂中丞

梁莖鄰中丞章鉅南省公餘錄云國初各直省皆沿明制設提學道以按察司副使及簽事爲之惟順天江南二省稱學院以御史充至順治十年始定翰林五品以下官提督直省江南江北學政康熙三十九年定各省學道員缺翰林官與六部郎中並差四十二年定由翰詹科道任者爲提督學政由部郎任者仍爲提學道雍正三年定由部郎任者俱加翰林銜自是各省無提學道之名而部郎之督學者踵相接矣禮部學臣自吾閩



林石來麟焜

康熙庚戌進士三十三年以禮部郎中提學貴州

吾邑鄭二瞻前

輩冕

康熙甲戌進士五十二年以禮部郎中提學廣東

實開其先而周紫昂前

輩以額外主事特膺簡命尤為異數踵此者乃寥寥焉

錄中並載禮部學臣題名林鄭之後列周人驥名下注

字紫昂直隸天津人雍正丁未進士七年以禮部額外

主事督學山東檢閱續邑志循吏傳周人驥號蓮峰雍

正丁未進士仕至廣東巡撫中敘由禮部主事督學四

川津門詩鈔載牛次原先生撰周蓮峰中丞傳中敘以

禮部主事加翰林院編修銜提督四川學政差竣復命

敬鄉筆述卷一

三

長春書屋

補禮部精膳司主事與公餘錄以禮部額外主事特膺

簡命正同惟公餘錄據禮部學臣題名作督學山東獨

異苴鄰中丞官禮部有年錄中皆述紀禮部掌故四川

之說俟再攷

高凌雯案蓮峯督學四川見國史本傳禮部學臣題名誤

王鶴舟太守

昭文蔣寶齡墨林今話卷十七載天津王鶴舟太守玉

璋別號松巢外史雨亭觀察子初官秋曹隨扈木蘭以

較射得花翎繼出守雷州調署瓊州均有治績罷後僑

寓吳門太守熟習騎射妙解音律豪情逸氣往往於酒  
後發之而畫法尤爲擅長遠宗北苑近接麓臺得渾灑  
淵懋之氣所謂筆端具金剛杵者論畫以簡爲貴嘗於  
麓臺畫中見一石鉤勒兩三筆渾厚古樸閉門習之數  
日必得其法而後已其篤於好古如此往在粵東時鄭  
雲麓觀察贈詩云來往風帆大海東厓州定後不言功  
知君別得新皴法五指山高在眼中瑯琊太守劇風流  
嶺外山川筆底收添得佳談留畫苑王廉州後復雷州  
人遂以王雷州稱之又性愛端硯收藏極夥弄筆之暇

敬鄉筆述卷一

十三

長春書屋

摩挲不倦故名所居曰凍雲館孫震生字伯威號鶴孫  
年甫弱冠下筆已綽有祖風云檢查續邑志王鶴舟太  
守之名闕焉未載至雨亭觀察不知何名更無從攷偶  
詢及王仁安孝廉守恂始悉爲仁安同族上代鶴舟太  
守致仕後卽僑寓江蘇是以津人罕知者嗣雲清廣文  
樾見示一紙雨亭名象儀官至江南鹽巡道爲雲清叔  
曾祖鶴舟由優貢生刑部郎中出守雷州府鶴舟第三  
子名祈年官山東洋流巡檢元配余氏繼配卽浙江樂  
清協副將湯雨生都督之女節孝湯氏

詳見  
卷六

續邑志湯

節孝傳暨津門徵獻詩鶴舟太守子單名瀛此作祈年當是譜名惟續志湯節孝旣經載入而鶴舟太守雨亭觀察皆遺略未載再修邑志其名當分列於貢監中仁安云雨亭公字羽廷

鮑雙五贈牛太僕詩

鮑雙五侍郎桂星覺生詩鈔有次韻牛次原農部同年坤平谷登高四首第一首云空山落木送秋聲老據雕鞍一葉輕記得承恩影翠羽鷓冠多少羨書生注云君以侍射荷先皇翎枝之賜謹案注稱先皇計時蓋嘉慶

敬鄉筆述卷一

古

長春書屋

朝次原先生官農部因侍射得戴花翎而今津人知者已少若王鶴舟太守官比部日隨扈木蘭較射得花翎今更無知者惟先叔祖晴圃公官閣讀兼軍機領班章京日以隨扈木蘭較射賞戴花翎亦嘉慶朝也邑人至今尙有稱道者晴圃公墨經從軍圖中有方葆巖制府維甸題句六首內一絕云靈臺偃伯陣雲收禮射臨軒樹虎侯冠上羽儀膺錫命貂蟬何必出兜鍪知當時花翎爲人豔羨如此觀覺生詩鈔知次原太僕得花翎事觀墨林今話知鶴舟太守得花翎事連綴誌之以見吾

邑因侍射拜翠羽之賜者曾有三人洵盛事佳話也

案管侍御世銘韞山堂詩集有扈蹕秋獮紀事詩三十四首自注甚詳有足備掌故者內一條云凡較射中四矢者賜戴孔雀花翎

### 周大迂明經

慶雲崔曉林旭念堂詩話周大迂先生自邵天津人貌甚陋刻意爲詩以右丞爲宗津門談詩者多宗之鯨鏗二集載杏花春雨江南試律一首中聯云一旗沽酒路兩屐看花人又蠟梅云林家老婦應無妒不禁孤山納

### 敬鄉筆述卷一

五

長春書屋

小妻乾隆甲辰余應童子試館先生家先生拈題試同寓生特蒙許可遂出所批唐詩指授法律後至津門輒以詩相質歿後稿亦不傳先生受詩法於周七峯亦天津人有卜硯山房詩集行世檢閱津門詩鈔沈階三明府士焜小傳後載同邑周大迂先生選趨是集以唐賢少陵右丞襄陽明高青邱四家爲宗階三詩學得其指授云案詩鈔載周自邵字景洛號大迂歲貢生著有草龕集樹君學博稱先生與康達夫郝石臞金野田查次齋同時唱和勸人爲詩五言以高青邱入手後學往往

宗之余童年輒聞人稱大迂先生未見其詩也所錄得  
之余階升孝廉惜非先生得意作姑存之俟再搜輯余  
見詩鈔所錄先生一時詩人多同立社聯吟且多題贈  
先生之作爲人欽仰如此先生爲南橋別駕自邠胞兄  
續邑志僅列先生名號於貢生內然吾津人迄今猶有  
稱述二公者一由文望一由義舉也南橋別駕應列入  
義行詳見卷二大迂明經應列入文苑各立一傳

楊無怪孝廉

駢角編十八藝陳仲子二十藝楊無怪孝廉一崑所著

敬鄉筆述卷一

去 長春書屋

也一爲犁牛之子四句題文一爲匡章曰陳仲子全章  
題文兩編先生刻於嘉慶初年盛傳一時同治十三年  
先生曾孫紹溪茂才耀會又重刊之有沈雲巢方伯一  
序弁首方伯時年九十二矣序後又注云乾隆戊申科  
鄉榜首題不曰如之何一節先生文篇幅不長措語清  
真而包羅史事極夥卷爲潘蘭垞太史庭筠呈薦乃不  
憚另鈔逐句注明大爲主司稱賞遂中式先生謁房師  
知而感泣附記以表契合之真觀此則先生學識淵博  
可想見矣駢角編先生自序云津邑城內外詩書幾於

比戶號文藪科第不絕踰河而東復南折僅里許地名鹽坨若村墟風俗樸陋儒巾者絕少矣余自丁酉假館於此其土著入庠者僅一人外此應童試者一人竊謂其中子弟必無能讀書者乃於來學者教之讀讀輒數十行教之爲文輒能鞭心有理緒三載後予將他往諸徒揮淚相留不使行因是予授徒於鹽坨者自丁酉至丙午十年而後去蓋其俗不甚知詩書以子弟委之師則寬與嚴一聽之師勤與惰一聽之子弟故敗者易敗成者亦易成歲丁未予去鹽坨使岐山王徒主子席不

敬鄉筆述卷一

七

長春書局

三年而采芹者一案至五六人是以鹽坨多儒巾而岐山昆仲亦相繼擢鄉榜故至今人謂開山鹽坨者爲楊無怪云案先生中舉呈薦一節及開山鹽坨之說余弱冠時常聞老輩述爲美談先生戊申登賢書卽在去鹽坨之後二年先生次子恆占嘉慶庚申科舉人辛未科進士孫雲棟道光己亥科舉人曾孫憲曾光緒壬午科舉人科名相繼正未有艾先生善誘後學造就人材之報不顯然歟津門詩鈔載有先生詩並稱著有尙書眉二愚文稿詩集若干卷聞詩文稿皆遺失矣先生尙著

有尊經求通錄一書已經刊傳無怪先生字二愚論才學品行優入邑志文苑余見續邑志無先生傳因掇述先生事實以表章之

華春浦明府

附華梅莊學博

陶鳧薊櫟紅豆樹館詩話春浦博通經史工書畫旁及金石篆隸居京師館余秋室太史家與輦下知名士往還酬唱出宰全椒以廉明稱卒於官詩多散佚皖城集一卷爲其孫梅莊孝廉長卿摭拾奇零寄來清拔朗逸屏絕藻績津門詩鈔華蘭字省香號春浦乾隆庚子科

敬鄉筆述卷一

六

長春書屋

舉人四庫全書館騰錄安徽全椒縣知縣又稱春浦先生與徐公朗齋齊公秋帆沈公東巖張公嘯厓同時唱和後官江南詩經散佚陳古愚所見集刻有公詩春浦先生爲梅莊學博之祖文珊司馬鼎元之曾祖文珊津門徵獻詩所載當年名人題贈先生之作甚多又梅莊學博所撰春浦公傳詳述先生品學宦蹟所蒞皆有實在德政若春浦先生者可謂處爲純儒出爲良吏矣文苑循吏邑志中皆所優入 梅莊學博道光辛卯舉人官奉天開原縣訓導盛京通志局纂修保薦卓異陞用

知縣加國子監學正銜學博端正廉謹淹通今古於書無所不讀梅莊詩鈔早經刊傳所著尚有古本周易集注十二卷尙書補闕一卷毛詩識小錄四卷春秋三傳異同辨二卷唐宋陽秋五卷說雅六卷史駢箋注四卷歷代宰相表五卷三國兩晉南北朝年表三卷聖廟崇祀圖攷二卷正字源八卷石鼓文存一卷漢碑所見錄三卷說文形聲表十五卷說文引經攷一卷疑年錄小傳四卷查初白張船山年譜二卷畿輔人物表一卷津門選舉錄六卷俗音正誤一卷韻籟一卷方輿韻編二

敬鄉筆述卷一

九  
長春書屋

卷姓藪四卷泉譜二卷米齋札記四卷西嶽山房文鈔四卷黛香館詞鈔二卷其學問之淵博可以概見聞文珊司馬需次蘇門已請俞蔭甫太史爲學博作傳矣異日重修邑志梅莊學博可列入儒林學博長子少梅茂才光胤續學早世所著東觀室遺稿一卷脍錄二卷已經刊行尙輯有津門文鈔若干卷次子卽文珊司馬弱冠補博士弟子員早有詩名著作亦富已梓行者津門徵獻詩八卷

齊秋帆觀察



樞垣題名齊秋帆觀察嘉紹嘉慶四年二月由內閣中書充補軍機章京余已敘入王觀濤侍御一則內嗣見華文珊司馬津門徵獻詩詠秋帆觀察詩後載津門選舉錄嘉紹乾隆己亥科舉人庚戌科進士內閣中書典籍軍機處行走刑部主事員外郎總辦秋審處甲寅湖北鄉試副主考乙卯山西鄉試正主考丙辰會試同考官廣東南韶連道江西鹽法道而續邑志選舉錄於秋帆進士名下僅注內閣中書廣東南韶連道江西鹽法道未免太遺略矣

華梅莊學博著有津門選舉錄六卷待刊想當日續邑志者不知有此


敬鄉筆述卷一

二

長春書屋

檢閱津門詩鈔無秋帆觀察之詩嗣見詩鈔華春浦明府蘭小傳後載春浦先生與徐公朗齋齊公秋帆沈公東巖張公嘯厓同時唱和又詩鈔沈東巖孝廉嶧詩內有與齊秋帆次韻五律一首詩云近市門常掩安閒歲屢遷瓶空元亮粟囊乏少陵錢白石歌良苦青雲志益堅試觀垂翅鶴豈受俗人憐據此攷證不惟知觀察能詩其品詣亦可想見案觀察於甲寅乙卯丙辰三年中連掌文衡皆官中書日也聲華望實有不僅為鄉閭光者而余每以未見觀察詩文為憾迨重檢畿輔詩傳見

樊蔭瑚明府宗清小傳後載有觀察序言卽序蔭珊留  
餘山房詩集也序云湘川案明府字蔭珊號湘川操履端淳宅衷  
醇粹性落落難合閒以吟詠自娛所爲詩率皆隨境揮  
灑流露自然不爲藻采浮聲而志凝聲遠淵乎可思余  
見此序不禁躍然真可謂吉光片羽矣亟爲錄存品學  
名望若秋帆觀察者洵吾邑中人物優入文苑續志未  
立傳何也揀發安徽從九齊少尉世郁爲秋帆觀察之  
孫咸豐三年粵匪陷廬州世郁手刃數賊傷重捐軀疏  
聞賜卹續志忠節有傳



敬鄉筆述卷二

天津徐士鑾沅青輯

周南橋別駕

周南橋別駕自邠者飲昇平冊子先竹士叔父

塋於舊

書肆購得者因冊中有先曾祖德謙贈榮祿公

之柄二

律也冊中所載皆津邑一時耆年碩德冊首題者飲昇平四字冊內有序有跋暨各家詩謹次第錄出而南橋先生之詩並序應首錄焉序云乾隆乙未孟春孫依蘭世丈尤過亭先生諸公在予春草山房作碩德耆年會

敬鄉筆述卷二

一

長春書屋

予年甫過五十亦隨杖履之末諸丈有詩見投因答謝一首詩云一堂白髮見遺型嘉會非關龔古名望裏青雲今大隱攜來朱履舊專城高懷俱足存千載餘論猶堪淑後生幸接梓桑陪末座敢同司馬與耆英檢閱續邑志列女節烈周母龍氏傳始知南橋別駕爲大迂先生自邠胞弟南橋官廣東高州府通判歸里後廣行善事吾邑育嬰堂實爲別駕創始他如購義地撈水中浮屍埋葬乾隆三十五年大水設施粥廠餽餉會惜字社續邑志皆大概述之長蘆志人物友義傳周達仁傳末云元孫自

邵官高州府通判亦好行其德遇歲饑必倡義捐貲施振率爲常而續志人物義行不知何以未立別駕之傳卽例貢例監內亦未載別駕之名吁可怪也津門詩鈔載有大迂先生詩今得別駕一詩可謂吉光片羽別駕誤有繆孝子文璧韓孝子大佩合傳載入郭筠孫明府師秦津門古文所見錄續志繆韓二孝子傳卽裁翦別駕所撰原傳爲之而傳末竟注邑人梅成棟撰亦可謂大誤矣

案周南橋別駕官廣東高州府梅象通判歷署

敬鄉筆述卷二

二

長春書屋

欽州化州知州此從道光癸巳進士湖北襄陽府知府樊閭莊太守椿殊卷履歷攷出者問莊尊翁湘川明府宗清元配周氏卽南橋別駕之女也

吳景韓封翁詩

耆飲昇平册載吳景韓封翁湖七律一首詩云九人七百五十歲不減耆英社裏人敢詡達尊並諸老重煩燕樂比嘉賓一樽酒晉岡陵壽四座風生杖履春願與羣公歌擊壤年年長署太平民詩後題云南橋先生以碩

德者年會邀予入漫成長句紀勝乾隆四十年正月十九日八十六老人吳潮命兒子人驥書觀此題語知景韓老人卽念湖太守之尊翁也念湖乾隆丙戌進士歷官至山東萊州府知府續邑志文苑有傳詩載津門詩鈔而續邑志耆壽竟未載景韓老人之名殊失疏略若景韓老人之詩實屬僅見

徐鑒三封翁詩

冊載徐鑒三封翁永鑑七言排律一首詩云吾鄉禮讓屬南橋尙齒尊賢喜共邀會擬香山傳盛事人同洛社

敬鄉筆述卷二

三

長春書屋

仰仙標四時佳興偕耆舊千叟奇逢協聖朝每以丹誠孚戚黨非關黃髮寄漁樵鯤鵬息羽宜思翥松柏凌寒總不凋曲室談深情共洽賓筵羹熟手親調詩題玉軸雲霞滿名列金庭歲月遙始信普天皆壽域康衢歌詠聽簫韶案徐鑒三封翁卽北山先生也詳見續邑志耆壽封翁於乾隆五十年曾預千叟恩宴津門詩鈔載封翁長子東川比部瀾詩若鑒三封翁之詩正與吳景韓老人相同實亦於此僅見也

徐雪厓太守詩

冊又載徐雪厓太守觀孫七古一首詩云古稀天子壽  
且康作朋作人雅化長涵濡四萬八千界斯民仁壽游  
羲皇吾津屏藩帝京近沐浴膏澤尤汪洋德星時聚壽  
星見昇平人瑞熾而昌南橋先生多雅志嶺外一麾成  
保障政成異錦理歸權客常滿座酒滿觴謙言穉齒不  
稱老雅集獨上君子堂我辭宦海歸析木重聯舊侶樂  
維桑晴窗快覩刻藤冊古彝寶鼎炳琳瑯龍門勝寺資  
聖院古人不讓相頡頏秋月襟懷殊瀟灑春風杖履足  
徜徉清談不倦有仙骨眉黎面耆瞳子方列座以齒不

敬鄉筆述卷二

四

長春書屋

以爵杖朝杖國杖於鄉翹首熙朝千叟宴咸歌聖德樂  
無疆詩後題云觀自薄宦閩粵齊魯間四十載甲辰秋  
予告歸田獲與諸耆舊斗酒言歡慰勞備至致足樂也  
南橋二兄先生出示碩德耆年會冊及小引會啟撫謙  
和藹深得古君子尙年敬長之風上副聖天子壽考作  
人之化喜詠長歌以誌盛舉攷舊邑志據衛志總敘寓  
賢諸公有徐觀孫之名注雍正乙卯科順天籍檢閱續  
邑志循吏傳徐觀孫字用賓乾隆戊午科舉人任福建  
漳浦令捕獲莠民聚眾滋事首犯搜其家有黨羽巨冊

焚之以免株連事平超擢山東武定府知府續志又載徐觀孫墓在城西姜家井南二里蓋有欲證雪厓太守爲津人之意然究未得其詳嗣見郭筠孫津門古文所見錄有張嘯厓主政虎拜撰閩峯司馬徐公傳云閩峯諱如源先世居浙之會稽明時有宦薊遼軍者挈家屬宛平遂籍焉曾祖敕功字采臣康熙丁卯舉人徙家天津祖震英字藝圃考職州司馬龔治生計有隱德父觀孫字雪厓雍正乙卯舉人歷官惠州武定知府又徐汝瀾撰先恭人趙太君傳內稱先大夫以雍正乙卯舉於鄉筮仕粵東鹽課大使歷官郡縣四十年甲辰引年乞休乙巳春恭預千叟宴享年八十再攷選舉錄徐汝瀾乾隆四十二年丁酉科舉人四十五年庚子科進士福建泉州府同知據此以觀知雪厓太守雍正乙卯中式猶宛平籍其改籍天津當在太守筮仕時也太守長子如源次子如灝三子汝瀾汝源汝瀾皆官至同知至續志謂雪厓太守乾隆戊午科舉人字用賓皆不知何所據也

敬鄉筆述卷二

五

長春書屋

張公度貳尹詩



册又載張公度貳尹元廉七律一首詩云香山嘉會此  
重逢尙齒尊賢步往蹤顧我菲材慙附驥感君雅意擬  
登龍一堂簪履歡情洽四序盤桓樂事濃何幸年年陪  
盛宴快聆玉屑豁心胸攷續邑志例貢載有張元廉之  
名注華陰縣縣丞檢閱津門詩鈔未載公度貳尹之詩  
與雪厓太守正同也

四老人詩

册有胡芑堂業宏五律一首詩云齒德宜鄉黨人從序  
爵還有懷宗洛社無趣不香山佳興四時集清風一杖

敬鄉筆述卷二

六

長春書屋

間普天皆壽考此會孰躋攀又周澹軒世稔五律一首  
詩云今日逢佳會香山復見新耆頤皆上壽矍鑠倍精  
神酬酢殷勤致珠璣點綴煩已慙蟬翼德亦樂從長春  
又高璞園宗瑾五律二首詩云宦迹數千里戎軒三十  
年不圖臨老日猶得此身閒四序風光轉羣公杖履先  
相從話疇昔矍鑠故依然其二云香山傳九老洛社重  
耆英此會風流最由來齒德并南橋今北海古道復多  
情識取就中意油然而孝弟生又郭茗仙宏俊五言排律  
一首詩云人日賓筵萃相看俱老人問年過甲子對酒

益精神冊滿耆英句書題百八春

原注壁間懸一壽字爲一百八歲郭鉉書

婆娑含樂意眞率會嘉賓共摩麻姑脯

原注肴有鹿脯同傾公

瑾醕熙朝稱勝事雅集不妨頻攷舊邑志續志胡周高  
郭四老人之名俱未載津門詩鈔亦無四老人之詩爰  
亟錄存以俟博攷

### 五老人詩

附周衣亭太史

冊有郝石臞諸生仁七絕二首詩云南橋風味與時殊  
鳩杖攜來手自扶比似盍簪還較勝座中高拱列仙儒  
時流徵逐漫匆匆盡付先生一笑中春草堂前亦瀟灑

### 敬鄉筆述卷二

七

長春書畫屋

可曾圖畫作屏風又解月川明府秉智七絕三首詩云  
風流儒雅屬南橋林下逍遙興趣饒愛學香山追洛社  
醵邀諸老會芳朝德星聚處列瓊筵座上耆英髮皓然  
信是太平人壽考年年四季樂堯天宦海歸來十二秋  
病餘添得雪盈頭自慙德薄年猶未也附達尊作勝遊  
又姜儀甫學博森五律一首詩云德碩吾豈敢年耆命  
自天諸公空海國一杖閒瓊筵洛社今安在香山久寂  
然解温鑪內火無盡地行仙又周衣亭太史人麒五古  
一首詩云司馬會耆英高風久不作南橋華吾宗千秋

欲追和肇舉接上元未侍先生坐清和九夏初趨陪敢  
辭輝入門見羣翁雄拔俱可賀祭酒依蘭公珠璣生咳  
唾矍鑠高大夫尊師勿少情封君延陵豪羅列盃盤大  
哲嗣已鵬飛獻酬無須佐皤皤趙李徐論鋒不可挫精  
悍羨髯子健啗如遭餓是時天久旱甘雨忽入座冠履  
生微涼窗戶洗塵泥相對滌凡襟把盞積愁破殷勤問  
過亭不到非關悞八月共呼嵩重來聆切磋又于萬峯  
諸生揚獻仿一言至七言體一首詩云叟龐眉皓首結  
德鄰會文友鳧飛赤舄鶴銜青綬賡歌彭澤詩嘯傲竹

敬鄉筆述卷二

八

長春書屋

林酒筵開角里村頭

四皓角里先生周族姓也

座領蘇門山口

會中年齒

惟依蘭先生最長

愧儂三者遞達尊奉几攜杖容隨後檢閱津

門詩鈔載郝詩八首解詩二首姜詩一首周詩十四首  
于詩一首此題冊詩皆未入攷續邑志人物郝石臞列  
耆壽解月川周衣亭皆入文苑姜儀甫見選舉錄雍正  
丙午科副榜乙卯科舉人乾隆丁巳恩科中正榜而耆  
壽未列學博也至于萬峯老人僅見續志著述列有聞  
遊集諸生于揚獻著 續邑志文苑周衣亭太史傳所  
敘甚簡傳末有邑人牛坤爲撰傳語遍檢藝文此傳未

載津門詩鈔附載牛次原太僕所撰衣亭太史之傳公  
姓周氏諱人麒字次遊號晴嶽衣亭其別號也天津泥  
沽村人傳中稱公乾隆戊午己未聯捷進士拔置詞垣  
充大清一統志纂修官乙丑散館授檢討公嘗恭進詩  
篇雅意清裁有初唐風味以此每邀恩賚當道諸公與  
海內鴻博之士皆相推重聲名藉甚惟公體氣素弱由  
少奮學問積勞所致嗣以疫疾久不痊遵例告休歸里  
養疴著書金門太守文涓以順德文風不振數科無  
叨鄉薦者敦聘主講龍岡書院講席七年中登賢書者  
五人皆出公門下人謂大有造於龍岡咸頌不絕時公  
年已七十動歸老之思囊書旋津平居品行清高學問  
有本所授生徒莫不因其材而各得所造就歸家生徒  
日益進復授徒析津年八十卒於家公性清介雅量不  
凡孝友承家崇尚風節少年勤學老而彌篤休致家居  
愈益發憤述其刻意經學淹貫百家以道義爲指歸暑  
窗雪案手未嘗釋卷用力斯勤沈思旣久能發前人之  
所未發觀其著述亦由博極羣書廣集眾論推見精義  
卒成通儒云著有尙書簡明錄毛詩簡明錄禮記纂言

敬鄉筆述卷二

九

長春書屋

左傳輯評史記約錄評解昭明文選約錄唐詩類疏檢  
訂唐宋文錄解自著保積堂館課詩賦保積堂制藝他  
如古今雜體俱有定本惟孟子讀法附記行世津門古  
文所見錄載太史文十餘篇太史古文甚多而於闡發  
幽潛尤所著意錄中劉貞女秀石傳平谷劉太守登庸  
女又津邑張烈女懷清傳張明經廷錡女梁貞女傳民  
人梁進忠女孟節婦吳貞女合傳蓋萃於大沽關氏一  
門也後三傳續志藝文載入觀衣亭太史生平品行學  
問若此允當列入儒林續志列太史於文苑余意歉然  
公論自有定評也

耆飲昇平册序

册首有孫依蘭老人居廣序文云南橋周先生余之世  
交友也憶雅度於當年鴻軒鳳舉競才華於今日陸俊  
荀英雖甚邇之室廬每多疏於雲樹然而神固未嘗不  
相接聲亦未嘗不相應也乾隆乙未正月初春以頌德  
耆年會邀余入此洵前哲之高風抑亦我輩之盛舉余  
見之欣然而喜所謂實獲我心而周君先得之者余以

爲壽者天之所與若不可必而德者人所自具實可自  
修修其所自具者而不可必者卽隨之中庸謂故大德  
者得其壽夫子謂仁者壽洪範五福首言壽三曰攸好  
德詩亦曰其德不爽壽考不忘然則德之獲壽非其明  
徵乎且吾聞古人中之壽者如五老赤松青城仙客絳  
縣名賢指不勝屈豈若有德必壽爲可自據哉天津居  
京畿之南爲名勝之區北仰太行之聳峙東臨渤海之  
汪洋磅礴浩瀚毓秀鍾靈民之生其間者或英姿卓犖  
倜儻非常或馴雅風高確誠不易而松筋鶴骨精神矍

敬鄉筆述卷二

十一

長春書屋

鑠者亦復不少况我國家重熙累洽壽考作人相與沐  
浴膏澤百餘年之久有不羣然扶杖嬉遊而樂化日之  
舒長者乎昔者唐之白香山以九老會於履道里宋之  
文潞公集洛中年德高者爲耆英會共一十二人繪象  
中堂及司馬光亦作真率會此數君子者固皆德之備  
而壽之全者也今以碩德耆年會命名豈非慕古人之  
風而後先輝映者耶會期始於正月十九日又恐其疏  
也復繼以四月八月十月庶幾接見有期頻覩仙容之  
睥睨言匪遠樂聞玉屑之霏是日也長庚星耀仙侶咸

臨龍麝香飄鳳燭光照皤皤鬢髮拜舞欣然爰設瓊筵  
倒芳樽之爛漫顧茲嘉客極笑語之歡娛詩曰爲此春  
酒以介眉壽又曰黃耆台背酌以大斗忘形骸而詠旣  
醉亦各饌飽觴酣矣此樂何極此情自協所謂百年之  
光景常新而生平之嘉會無己者也余旣樂爲之序而  
復爲之歌曰稽自古以齒爲尙兮而尤以貴德爲之先  
爰仿在昔之高會兮更喜我桑梓之多賢擇吉日以開  
筵兮春光駘蕩梅萼爭妍策鳩杖以逍遙兮咸矍鑠乎  
其來前或昂台背或露華顛雖皆夙昔之雅好兮恍遇  
乎海上之僊侏娑笑語握手流連獻雲芝與瑤筍兮  
兼飫桃實之三千酣醪醺而歌旣醉俱空乎一棹之觥  
船左挹浮邱之袖右拍洪厓之肩此旣可以憲德兮亦  
何異乎引年占星文於太史兮吾則謂耄耋期頤之壽  
俱可名爲地行之仙檢閱舊邑志續志皆無孫依蘭老  
人之名津門詩鈔亦無老人之詩觀周衣亭太史詩中  
有祭酒依蘭公句又于萬峯老人詩注云會中年齒惟  
依蘭公最長就冊中吳景韓封翁八十六歲證之依蘭  
老人更有過之者應與景韓封翁姜儀甫學博于萬峰

老人同載入耆壽也

案孫依蘭老人居廣雍正甲辰科副榜官至任  
縣教諭近從李夢厓孝廉珠光硃卷履歷攷出  
者夢厓孝廉母氏孫卽依蘭學博之孫女乾隆  
乙酉科舉人友夔之女乾隆戊申科舉人紹康  
之嫡堂姊檢閱津門選舉錄無依蘭學博暨友  
夔之名而乾隆戊申科紹康與焉余意依蘭學  
博遷居津邑尙未入籍乾隆乙酉以後年久合  
例歸入津籍由後而論依蘭學博不得謂非津

敬鄉筆述卷二

三

長春書屋

人殆與徐雪厓太守相同也

高凌雯案縣志選舉後附  
流寓孫廣居名在其內

耆飲昇平冊贊

冊有沈影村封翁所作一贊存圃先生代書者封翁款  
下注命男峻書也贊云酒以合歡人惟求舊必齒德之  
兼隆信賓筵之不負養賢則受祿於天飲和乃必得其  
壽婚姻洽比相勉以厚歲時伏臘無愆其候境閒神逸  
亦孔之茂豈所云周禮猶醵與夫標榜取咎者哉沈影  
村封翁文字罕見與孫依蘭于萬峯二老人正同皆可



寶貴也

耆飲昇平册跋

册有于萬峯老人書後云鄉黨尙齒古通義也魯論記孔子鄉飲禮曰杖者出斯出矣是孔子年未及杖而飲必與於鄉也自唐之香山以老名宋之洛社以耆稱亦謂服政之年不暇與桑梓會非謂年未杖鄉遂不得與於飲也所以唐之狄兼暮年未六十得附九人後宋之司馬君實亦援香山故事得足十三人之數粵稽鄉飲酒義有四其二則鄉大夫飲國中賢者是鄉飲之有繫

敬鄉筆述卷一

古

長春書局

於禮亦大矣哉南橋周先生夙悉心於禮制自粵解組歸舉析津鄉飲會良有以也鄉飲尙齒而曰國中賢者正藉引年之典寓尊賢之義此先生以耆年碩德署名者有由來矣厯卽禮文而攷之以先生與於斯會雖杖家之年適允孚於賓主介僕之義也乃題詞有甫過五十之語詩有敢同司馬之句何其德光謙抑也斯會之舉其義該其禮備其措置也咸宜非先生之雅懷淵識無以辨此至集鶴髮於一堂所以洽賓主歡鳴熙皞盛者胥於依蘭先生序中詳且盡矣復奚贅再鄉飲之制

惟興賢鉅典三年一舉其黨正之蜡飲則舉於臘若鄉大夫飲賢州正飲射則無定期也茲分舉於四季固自有見蓋天有四時迭運於無窮歲循四會亦迭運於無窮寧特不疏不數酌會期於適中哉復徵諸詩歌勒之刻楮無浮夸無溢美俾會中諸老扶杖優遊共繪昇平之象以及教孝教悌足樹閭里之儀型矍鑠笑傲詩酒謳吟諸芳蹟可著爲令典傳爲佳話者胥昭垂久遠於不朽也不更詳且盡哉昔宋賢梁才甫著有耆英集一百卷先生踵其意而仿之遞年署冊此其第一冊云

敬鄉筆述卷二

五

長春書局

周月東硯事拾遺

戴菴塘瑤藤陰雜記昔謝文節枋得北來羈憫忠寺中見壁間曹娥碑曰小女子猶爾吾豈不汝若哉不食而卒王漁洋弔宋謝文節公詩勤王信州兵賣卜建寧市一片曹娥碑墮淚女兒子近見卜硯集知公建寧橋賣卜一歛硯程文海銘永樂中出土三百年來流傳至天津周月東焯寶藏臨終贈查中丞禮攜之至京遍徵名輩題詠多七古長篇卷載紀太僕復亨七古姚貞菴案汝金五古餘詩並因篇長不錄續邑志文苑周焯字月東號七峯賦性堅確重然諾工

詩嘗從城西寺得硯汗泥中浴之則宋謝文節公橋亭卜卦硯也愛以爲寶遂名其集曰卜硯山房詩鈔後以硯贈查恂叔中丞今觀藤陰雜記戴菴塘所謂卜硯集者卽卜硯山房詩鈔也梅樹君學博津門詩鈔於月東明經詩後援查爲仁蓮坡詩話張景運秋坪新語皆紀述明經軼事又援袁枚隨園詩話吳省蘭白華集敘述卜卦硯事華文珊司馬津門徵獻詩於詠周月東明經詩後亦具援諸家紀載而戴菴塘藤陰雜記一則爲二書所未列因亟錄存以補所遺

敬鄉筆述卷二

六

長春書屋

龍東溟處士詩集

陶鳧薊紅豆樹館詩話玉紅草堂集詩多至數千首中五平五仄體一篇蓋仿何大復寒風吹空林落日照古塚之作也案龍處士震字文雷號東溟其詩津門詩鈔畿輔詩傳均有所采續邑志文苑有傳藝文並載文安陳子翽學士儀所撰東溟之傳惟文苑龍處士傳末著有東溟詩集一語殆失契勘詩鈔則謂著有玉紅草堂詩集詩傳則謂有玉紅草堂集十六卷且續志附載邑賢著述名目亦云玉紅草堂集也

賈廷琳案玉紅草堂集十六卷末附龍氏家譜  
卷中文與詩依年月台載不分體津門詩鈔  
於草堂下加詩字非是又按東溟先生另有  
東溟書屋詩集爲張藝史先生所選訂係康  
熙中原鈔本而東溟先生老年更有又存詩  
稿見錢香樹所爲詩序然不言刊刻蓋東溟  
先生遺集傳世甚少故沉青先生未得寓目  
此所敘述遂未甚明晰玉紅草堂集康熙原  
刊本及張選原鈔本均曾爲廷琳所購藏故  
詳識於此而華氏緘齋雜識載玉紅草堂集  
三十卷  
尤誤也

### 俞厚安軍門詩

津門古文所見錄載俞厚安軍門金鰲金門待漏圖序  
文內云歲在甲辰上舉千叟會宴黃髮台背聚闕廷者

### 敬鄉筆述卷二

七

長春書屋

三千人在御前親蒙手賜玉觥者二十二入而金鰲名  
次第十九又命賦詩紀事對以未嫻吟詠上顧笑曰汝  
爲香樹小舅且受業其門又豈未解吟詩者耶龍光盛  
典優渥難名案厚安軍門乾隆壬戌科武進士官至提  
督戰功卓著余童年聞老輩談軍門藝精騎射兼能詩  
文然詩文實罕見焉近年華少梅茂才脞錄刊傳見有  
軍門七絕一首蓋題金芳舟先生彈琴圖照也詩云韻  
送濤聲出翠林披圖忽起白雲心倩誰添我青松裏聽  
取高山流水音軍門之詩於此僅見爰摘錄軍門序文

並照錄此詩以傳播之余見津門詩鈔所載樂樹堂樟  
張蔭松標皆列武庠而工吟詠若厚安軍門一詩續輯  
詩鈔所應采入者也

案本卷前載徐鑒三封翁於乾隆五十年恭預  
千叟恩宴又徐雪厓太守於乾隆乙巳春恭預  
千叟恩宴乾隆乙巳卽乾隆五十年鑒三封翁  
同雪厓太守預宴皆在乙巳歲今閱厚安軍門  
序文云歲在甲辰上舉千叟會宴甲辰爲乾隆  
四十九年是軍門預宴獨先乙巳一年也特揭

敬鄉筆述卷二

六

長春書屋

出俟攷證再觀軍門乾隆辛亥繪圖譔序於文  
尾特書乾隆五十六年皋月上澣厚安自題蓋  
後預宴之七年預宴者年須七十以上據此揣  
測軍門書序年歲當屆八旬洵可稱富貴壽考  
矣

牛次原太僕詩

錢梅溪履園叢話天津牛次原名坤中嘉慶己未進士  
乾隆壬子余初入京師卽識之貌不甚揚而聰明絕世  
廣於交遊偶作詩亦清新可喜嘗記其臨清卽事一首

云幾樹垂楊官道斜不成村落野人家偶從三尺竹牆裏時露一枝山杏花畫永人稀初叱犢隴深麥淺不藏鴉仲春天氣寒猶峭想得江南摘早茶檢閱津門詩鈔載有次原太僕詩七律四首五律一首並稱其嘗以詠簾鉤得名有影分玉宇初三月名傍銀河第九星之句爲人所傳想太僕於詩不輕作偶作卽傳也

吳念湖守收藏

阮文達公小滄浪筆談天津吳念湖人驥官東昌司馬襟懷曠達所在有賢聲放衙後惟以吟詠自娛畫竹得九龍山人遺意尤喜獎譽後輩一時寒峻多倚賴之生平收藏名人書畫甚多有惲王合作扇面廿幅爲最佳案續邑志文苑吳念湖傳中亦稱念湖工畫竹也

戴虛舟老人

津門詩鈔戴思灝字虛舟布衣著有虛舟草一卷金野田先生日錄云吾津有老人戴思灝年八十餘應童子試終未售愛吟詠學中晚唐人之詩蔣雄甫出其集一卷佳句甚多綠牡丹云墜樓人去東風冷青塚魂歸塞月寒白梅云移來冷帶孤山雪落處飄疑庾嶺雲燈花

云頻敲碁子先愁落試卜金錢好兆開皆有致耄年力  
學未博一衿可憫也檢閱續邑志虛舟老人列入耆壽  
詩則選入津門詩鈔虛舟草一卷亦載入續志著述名  
目似可無遺議矣余見野田先生憫老人未博一衿特  
記於目錄正欲表見其人其詩惜金蔣兩先生家極寒  
素而當日竟無一好事尙義者或捐貲或集貲所費無  
幾刊此一卷之詩以傳虛舟老人良可慨也余此卷所  
述多吾津老人然皆不至若老人之可憫爰錄津門詩  
鈔所載附諸此卷以表章之

敬鄉筆述卷二

三

長春書屋

案金野田津邑老諸生名銓孝事母六十餘一  
如孺子慕工書善詩晚年家益貧卒年八十蔣  
雄甫明經名玉虹性至孝立志續修縣志采訪  
搜輯數十年凡志書所應有者分門編纂稿本  
積數十帙同治初年續修邑志甚幸覓出明經  
稿本也金蔣兩先生文苑各有傳



敬鄉筆述目錄

卷三

龍太守圖躍紀略

張嘯厓主政逸傳

附張衛臣少尉

張飛卿太守

徐闓峯司馬

徐東川部郎

張津槎明府

韓鶴莊侍御

敬鄉筆述目錄

一

長春書屋

三家詩錄存

沈潤田參軍

章壽人布衣

解小亭明府

沈青來處士

畢也香刺史

張孟臬二尹

鄭笠艇布衣

牛次原太僕





卷四

梅樹君學博

胡秋坪明府詩

張筱琴布衣秋園小詩二則

樊文卿二尹

余肅齋學博

張書田學博

姚玉農明府

趙晴嵐觀察

敬鄉筆述目錄

二

長春書屋

丁朗齋學博

王荆式學博

梅香垞明府

華少梅茂才

盧紹棠主政

郝石臞老人

梅雅村布衣

敬鄉筆述卷三

天津徐士鑾沅青輯

龍太守圖躍紀略

津邑舊志例貢龍圖躍名下注河南汝寧府知府居官有聲余於周節烈龍氏一則內述之並謂舊志既稱居官有聲必知其爲太守之賢者然究以未得其詳爲憾事嗣閱華文珊司馬緘齋雜識見敘龍東溟先生家世暨客遊蹤迹稱先生姪圖躍官江南通判先生庚辰壬午兩遊江南蓋至其署也後圖躍官河南汝寧府知府

敬鄉筆述卷三

長春書屋

著有政聲據此知太守爲東溟先生之姪並知曾官江南通判因憶東溟先生記亡友張帆史交情始末內有甲申六月三日予自常熟發舟欲還金陵至蘇州吾姪謁辭宋開府開府遂留之委其督修沙船數語余以所記年歲考之知先生所稱宋開府者卽商邱宋牧仲尙書犖也案宋犖清廉爲天下巡撫最尤具人倫鑒宋犖清廉云云見國朝先正事略宋牧仲尙書事略就開府委督修沙船以觀龍太守官江南通判日曾爲宋商邱所信任其廉幹卓著己有可想見者茲就所考書其大畧尙冀於前人紀載中更

有所見也

案舊志作圖躍續志列女龍氏傳中作圖耀緘  
齋雜識亦作圖耀舊志想誤刻也

高凌雯按圖躍見龍氏家譜舊志作圖躍是續志改作耀誤

賈廷琳按山東通志宦蹟傳龍圖躍直隸天津人康熙四十八年任高唐州知州繕城垣修壇廟設義冢輯州志百廢俱舉有功德於民云云據此知圖躍曾官山東亦稱循良其政蹟固不僅在江蘇河南二省也

張嘯厓主政逸傳 附張衛臣少尉

中書舍人題名載張虎拜直隸天津人乾隆三十四年

敬鄉筆述卷三

二 長春書屋

由進士到閣官至宗人府主事余近日得嘯厓先生逸傳一冊首篇爲先生至交通政司副使徐春帆京卿如澍所作之傳蓋距先生歿後將四十年竟得同官至交之友立傳洵難能也傳曰公諱虎拜字嘯厓先世安徽鳳陽人徙居直隸河間再徙永平三徙天津至公已歷數世矣自魯庵公陳藩閩海歸老津門開問津一畝之園納遊學四方之士逸峯公元白公南杓公世守詩書家傳孝友宜其大賢之後必有達人也公生而能讀父書長卽蔚爲國器乾隆戊子科舉京兆試己丑科聯捷

成進士維時初登金榜便剖銅符厭走風塵其才不同

百里長沾雨露此身願近九重因是瞻望綸扉迴翔鎖

闥五花判事晨趨鴈鷺班中六押分司夜直鳳凰池上

楊綰以舍人稱閣老呂陶推宰相之判官乍辭上苑清

班襍被紫薇之省遂奉中州使命晉銜白玉之堂

案先生庚

子督學河南加翰林院編修銜再充分校於日邊天上近樓臺十二

案先生

生戊申科壬子科充順天鄉試同考官先詠皇華於江右門前栽桃李三

千案先生先於己亥恩科充江西鄉試副考官久在中書量移主政分掌天

潢之九族不隸官府於六曹趙師民直閣天章仍襄宗

### 敬鄉筆述卷三

三

長春書屋

正王定國纂修玉牒不愧令丞宣勤而待漏朝天久入

上公之英盼得暇而時晴快雪尤工大令之法書紙價

貴於洛陽聲華重於都下傳世正垂於金石修文遽召

於玉樓享年五旬有三爲人一時無二予與公同官京

邸二十餘年不遊如市之門同勵立朝之節春秋佳日

風雨過從覺其樂之無窮歎良時之不再中年怛化舊

事蒼茫能不回首東華馳情西掖也哉案此册有周海

村璠所擬嘯厓主政傳稿又張衛臣虎士述嘯厓兄節

略及主政長子鳳翽所書傳後余見華文珊津門徵獻

詩於詠嘯厓主政詩後皆臚列焉故不復錄惟此逸傳未載因錄存之續邑志人物孝行嘯厓主政傳列首者也傳稱先生性至孝母歿廬墓三年特爲表出續邑志孝行張嘯厓先生傳次卽衛臣少尉虎士之傳案津門詩鈔虎士字環極虎拜從弟也諸生由實錄館議敘官奉天錦縣典史高凌雯案張映暉殊卷環極承德縣典史侍養歸梅樹君學博稱與環極至交知其人最深蓋孝友端謹士也嘗手輯其先人五代詩彙爲一集屬予校勘後又自鈔錄一過凡數十萬字長夏不倦鈔畢值太夫人病晝夜侍

敬鄉筆述卷三

四

長春書屋

牀榻不勝其勞遂以哭母死傷哉孝乎如環極者豈易得乎閱續志環極傳中作承德縣典史余見樹君學博稱與環極至交且詩鈔所敘環極較詳因併照錄附諸嘯厓先生逸傳後以表章之

案周海村先生璠爲躍滄觀察人龍之孫著有海村詩草選入津門詩鈔

張飛卿太守

嘯厓主政逸傳載有星沙陳亮後跋一篇蓋記張飛卿爲尊甫嘯厓公求徐春帆京卿立傳顛末也跋云右銅

仁飛卿郡伯尊甫嘯厓公傳郡紳徐春帆先生所撰述者先是嘯厓公與春帆先生第進士同官京師稱莫逆者二十餘載比公歸道山先生乞假旋籍郡伯時方弱齡及長筮仕江淮間南北數千里不相聞問辛卯秋郡伯來蒞銅仁下車日詢知先生尙矍鑠健飯首謁之恂恂執弟子禮主人方愕然而不知數十年後故人子來也郡伯既見父執氣彌下容彌恪先生亦見郡伯如見嘯厓公爰追述公之生平參閱郡伯仲父衛臣公節略暨海村先生傳稿而爲之傳微郡伯請嗚呼文生於情

敬鄉筆述卷三

五

長春書屋

其亦有必不容已者耶昔歐陽公爲人作碑銘傳誌雖奉敕亦其往來相知者石師訥爲其父請銘誌曠二十一載文忠亦欣然執筆爲之今嘯厓公傳之成相類耶不相類耶顧郡伯遊宦多載所至均當代尊官鉅公爲之不患其文不傳乃遲之又久卒得先生成之此其作合非偶毋亦嘯厓公冥中佑助必欲其傳出自故人之手之爲信歟抑郡伯仁孝之感之所致歟郡伯敬謀付梓亮時假館郡署受而讀之爲誌其顛末如此銅仁徐春帆先生由翰林院編修官至通政司副使道光辛卯

科重宴鹿鳴欽加三品卿銜如先生者堪稱耆年宿學  
碩德偉望而飛卿太守適官銅仁爲尊甫嘯厓公求此  
一傳信非偶然案飛卿名鳳翽爲嘯厓主政長子華文  
珊緘齋雜識謂鳳翽由謄錄厯官貴州知府檢閱續邑  
志例貢例監未載鳳翽名余錄此後跋者非僅爲傳此  
一段佳話實兼表飛卿太守也

### 徐閻峯司馬

津門古文所見錄張嘯厓先生撰閻峯徐公傳傳首敘  
閻峯家世余已錄入徐雪厓太守一則內以證太守之

### 敬鄉筆述卷二

六

長春書屋

入籍天津茲不復贅謹掇舉傳中閻峯事實書之傳稱  
公徐姓諱如源字崑來閻峯其號也公少隨父任粵東  
西閩中山左皆從雪厓令漳浦守武定其獲莠民設防  
守等事皆能相佐分勞公年旣壯援例得縣令筮仕於  
豫初任長葛唐縣補虞城所治得賢能聲虞故瀕大河  
防河數有功後河決青龍岡工三載始竣先後司麻廠  
料廠掌壩臺土方躬親權核不假手吏胥兢兢然以體  
國恤民爲念調杞縣縣學久廢公爲興修之士氣大振  
旋調祥符大河南北有疑獄胥取決其手會臬獄有踰

垣者囚猝發難制公至督兵立禽之置諸法最薦第一  
未北上又有會鞠王金之獄王金者柘城積匪也有脅  
力謀劫獄出其黨事覺糾眾抗官兵巡撫畢公馳勦盡  
獲之緣坐逮引甚繁承按者率莫得其端緒畢公命訊  
之閱二夕得其實論首從罪如律脫無辜蓋數百人云  
葺事入都引見軍機大臣承旨詢柘城事公據實對覆  
奏報聞擢同知需次題知信陽州臬司穆公廉其才留  
郡垣襄讞事無縱無枉無五過之疵無鷹擊毛擊之怨  
見者神其能究未嘗炫才以累及同官也尋補下南河

敬鄉筆述卷二

七

長春書屋

同知丁父憂歸服除抵豫不及歲以前積勞成病卒年  
方四十八公性孝友慷慨廣交遊比至官寒素之士過  
者踵相接苟有求靡不應寮屬之暫困省垣者竭力資  
助無德容無倦色自公歿後中州士大夫識與不識無  
不感泣昔雪厓太守蒞官三十餘年清白自矢解組時  
囊無長物迨公之歿也一如雪厓太守云檢閱續邑志  
無閩峯司馬之傳例貢例監內亦無閩峯司馬之名余  
見嘯厓先生所撰公傳知父爲循吏子又循吏也亟錄  
傳略以表章之



徐東川部郎

津門詩鈔徐部郎小傳瀾字東川乾隆戊子舉人庚子進士刑部主事陞郎中總理秋讞以勞致疾卒於京邸著有硯北草梅樹君學博稱公性沈敏丰神朗秀湯厚田莖嘗云津門前輩所仰羨者二人一爲金竹坡先生氣骨高逸如不食人間煙火一爲徐東川天然名貴履綦所至如荀令座席三日猶香皆仙品也公官西曹廉靜不苛案牘山積游刃有餘相國阿文成公大司寇胡雲坡公咸倚重之聞歿深以爲惜又公官京師敦鄉誼

敬鄉筆述卷二

八

長春書屋

邑人至者罔弗延款情意藹然有所屬必力爲謀待士林誼尤深鄉會試售者到京填三代腳色備同鄉官印結送之不俟往求也案選舉錄徐瀾乾隆乙酉副榜庚寅舉人詩鈔作戊子誤檢閱續邑志金竹坡先生世能文苑有傳余見詩鈔所載東川當日相與契合聯吟者若張楚山湘高濬谷喆金曉巖思義吳念湖人驥文苑已各有傳品行才學如東川部郎者文苑亦應列入未可竟遺也因錄詩鈔以表揚之

張津槎明府

華文珊緘齋雜識張津槎先生諱樹之字德滋稟性岐嶷天資穎悟十九歲補諸生入泮後卽壓卷食餼文名藉甚乾隆丙午科中副車戊申科遂魁鄉薦闈墨一出膾炙者遍鄉塾焉嘉慶六年辛酉大挑母李宜人謂之曰汝身弱多病我又衰老儻得一官藉圖祿養未始非汝孝養之意於是奉命就挑以知縣用分發河南八年癸亥秋審辦固始積案平反頗多迄無冤獄旋代理息縣甫四十餘日卽得民心九年甲子冬署舞陽縣事安良除暴節已利民半載餘清結八百餘案人以爲神十

敬鄉筆述卷三

九

長春書屋

一年丙寅補魯山縣魯雖簡僻而接壤宛洛自楚匪滋擾之後民情非昔治理殊爲不易公整飭地方一除從前積習斷獄不恃筆楚之威必爲反覆開導使其心折誠服魯人素務農桑粟麥鹵帛悉有恆業公勤加勸課使無曠時雖經歉歲耕織之利有所攸賴又爲設立義田以贍貧乏之無告者因琴臺舊基建立書院所取之文一以清真雅正爲宗而士習爲之一變十三年戊辰鄉試充同考官務得眞才所薦皆寒畯知名之士其他政績不可枚舉在魯九年丁母憂歸越二載丙子公卒

於里以上緘齋所記也檢閱津門詩鈔有津槎先生詠  
王貞女詩詩後附先生之跋並載汝州刺史潛山熊象  
階一序蓋先生官魯山日梓詠津邑王貞女舊作也能  
刺史序末稱津槎勤政愛民循聲懋著好表揚人物爲  
元次山立墓碑今又梓此詩據此是先生爲本管官所  
稱許也余弱冠後讀先生鄉魁闈作並悉先生當年中  
州作宰頗著政聲今見續志循吏無津槎明府之傳意  
爲歉然讀文冊司馬津門徵獻詩有詠先生之詩又詳  
述先生政績因摘要錄出復援熊刺史之語以證異日  
再修邑志若津槎明府者所應列入循吏也

敬鄉筆述卷二

十

長春書屋

韓鶴莊侍御

桐鄉陸靜安學博冷廬雜識謂浙江鄉試每以金貽謄  
錄手之善書者潛遞關節屬其謄卷硃色鮮明字畫光  
整易動閱者之目道光丙午秋試士子一萬一千餘人  
其不購謄錄者祇三千餘卷僅得售三人蓋以字迹潦  
草校文者以辨識爲苦輒屏棄不觀也猶憶壬辰榜後  
謁見房師樂平齊星舟先生雙進原注嘉慶丙子科舉人官終石門縣知縣  
先生謂汝文佳而字體模糊耗我半夜心力始能辨晰

尤賴主司愛才取墨卷校對方得入彀爾時購謄錄未  
多而弊已若此幸遇樂平山陽天津三先生不致擯棄  
知己之感畢世勿諼也觀陸靜安學博此則於正副主  
司僅云山陽天津未書姓字余就學博房師齊明府中  
舉科分暨學博壬辰中式年分攷證續邑志選舉錄進  
士知所稱天津當爲韓鶴莊先生大信因檢韓芟洲孝  
廉蔭楨硃卷閱之堂伯叔祖輩分載先生嘉慶戊寅己  
卯恩科聯捷進士翰林院編修辛巳恩科廣西鄉試正  
考官癸未科會試同考官壬辰科浙江鄉試副考官陝

敬鄉筆述卷三

十一

長春書屋

西道監察御史掌河南道監察御史鶴莊先生壬辰充  
浙江副考官與學博所敘天津在山陽之次正合余髫  
齡時嘗聞先輩談鶴莊先生官詞林文名噪日下今觀  
此則見先生衡校務拔真才

案學博雜識白敘  
三十五歲通籍

明慎去

取當日必以愛才得士著稱宜其疊司文柄也先生詩  
文事蹟俱罕見續邑志文苑亦無侍御之傳亟就冷廬  
雜識所載詳加攷證謹錄於冊以表章之案鶴莊先生  
官至掌河南道監察御史邑志選舉錄僅注陝西道監  
察御史又先生子冠卿明府榮道光己酉拔貢廣西富

川縣知縣選舉錄注永淳縣不知何所據也

三家詩錄存

陶鳧薊樑國朝畿輔詩傳六十卷所選津邑人詩多據梅樹君學博所輯津門詩鈔然亦不盡據詩鈔也卷內如樊蔭珊明府焦午橋太守唐味經明府三家詩皆津門詩鈔所未載爰亟錄存以俟續輯津門詩鈔時采選畿輔詩傳卷四十九樊宗清字蔭珊號湘川天津人宗浩弟乾隆五十一年副貢生官四川蒲江縣知縣有留餘山房詩集二卷鳧薊紅豆樹館詩話稱蔭珊自蜀

敬鄉筆述卷二

三

長春書局

中解組歸日事吟詠性澹靜篤摯與兄弟相友愛家多藏書手自評校丹黃爛然年七十餘猶孜孜不倦晚嗜內典華嚴尊勝之書靡不研覽長日閉關清齋自奉詩遂不多作云自題留餘山房七律云攜帚朝朝日掃除斜廊深處宛精廬添香細養鑪中火搜蠹頻翻架上書燈影一龕人定後茶煙半榻客來初偶憑烏几閒尋句漸覺春光透綺疏詩傳載蔭珊明府詩八首今僅錄一首並揭原委若續輯津門詩鈔仍可向詩傳采選也案續志選舉錄乾隆丙午科蔭珊明府與兄曉齋宗浩同

中副榜 又卷五十六焦景新號午橋嘉慶六年進士  
官江西饒州府知府和沈雲巢太史韻七律一首詩云  
早朝廿載聽鐘聲捧檄恩恩悵遠行政溯先賢稱勝地  
學慙循吏寄專城空傳鄱嶺千芝秀謬許彭湖一葉清  
風月誰談惟有酒最無聊處憶春明案選舉錄午橋太  
守乾隆戊申科舉人嘉慶辛酉科進士吏部主事陝西  
道監察御史禮科戶科給事中江西饒州府知府續志  
循吏有傳藝文載嘉慶十九年十二月景新官御史日  
二奏疏一卓異人員赴部嚴定期限一請查武清縣添  
設集場 又卷五十六唐詮字味經號小潛天津人嘉  
慶十二年舉人官廣西知縣改寧遠州學正夜五絕一  
首詩云更深萬籟幽望月獨延佇山鳥不知名聲聲似  
人語案選舉錄味經明府嘉慶丁卯科舉人廣西昭平  
縣知縣無改寧遠州學正一語俟再攷續志選舉錄所  
載官階固多闕略也

沈潤田參軍

華梅莊學博梅莊詩鈔有送潤田舅氏之任雲南七律  
一首詩云仕宦天涯感不禁參軍從古屬儒林大才終

必騰霄漢小試何妨作雨霖卅載功名投萬里一家衣食累千金滇南煙樹雲間月棖觸諸甥一片心余見續邑志例貢載沈兆霑字潤田廩生謄錄議敘府經歷嗣閱潤田先生曾孫星垣孝廉耀奎硃卷見先生名下注優廩生嘉慶庚午鄉試挑取謄錄國史館議敘府經歷任雲南騰越廳經歷著有願學集獨喙集古今體詩知先生曾任實缺矣星垣登光緒甲午賢書乃祖賡廷文學維鏞年逾八旬尙在敘潤田先生履歷自詳邑志僅注議敘府經歷未免疏略因特錄梅莊學博一詩證之

敬鄉筆述卷三

古

長春書屋

津門詩鈔載有先生父存圃明府弟雲巢方伯之詩而於詩話述先生絕句三首選自采風錄者不知何以不列入正編况詩鈔列入正編之詩從采風錄選入者頗有雲巢方伯塞下曲卽采風錄中詩也又津門詩話有王香雪貳尹廷椿送春七絕一首余見畿輔詩傳香雪貳尹送春一絕列在卷六十據此以證潤田參軍之詩香雪貳尹之詩皆應入詩鈔正編也

章壽人布衣

梅樹君學博吟齋筆存津門布衣章儔字壽人性喜遊

足迹遍南北著有駢雲集西行集各一卷詩俱清而有骨追步唐音惜得之遲津門詩鈔未收又華梅莊學博手書蜀道集卷首一行云章儔字壽人號懶芋著有駢雲集西行集此卷名蜀道集餘未詳詩鈔亦未收據梅華兩先生所書觀之樹君學博所見者駢雲集西行集梅莊學博所見者蜀道集梅莊學博云云正從蜀道集卷中題詞而知山陰鍾錫圭題詞三絕句首云君是風人非恨人如何哀怨變前塵句下注予讀懶芋駢雲集西行集諸體愛其味之澹而旨才之清而麗今是集率

敬鄉筆述卷二

五

長春書屋

多哀怨之什蓋有安仁之戚也蜀道集一卷少梅茂才從舊書肆購得者藏諸篋中閱今五十年矣喆嗣聽橋貳尹鐸孫仰承先志謀付剞劂攜至粵東時其業師陳挹爽明府塏官曲江縣是以刊之羊城今觀是集竊有慨焉壽人先生所著駢雲集西行集蜀道集先後未百年而駢雲西行二集竟如雲煙滅沒不知消歸何處猶幸蜀道集一種刊布以傳當亦先生精力所萃有未可以磨滅者集後有邑人鄭文波布衣學川跋尾知壽人先生尊甫諱紳乾隆間爲廣東陸路提督軍門

案續志選舉錄



章紳乾隆己未科武進士官至廣東提督先生固貴公子也而先生澹於仕進性喜客遊耽吟成癖詩則無體不備神韻氣骨在中晚唐之間天然清粹令人味之靡盡非湛深於斯道者不辦集中有題自畫蘭自畫蘭石自畫芭蕉自畫墨菊諸作又云予學畫蘭於陳笠翁凡馳書稱學蘭弟子陳笠翁不知何許人集中寄贈酬和獨多以此見先生又工繪事洵高逸風雅一流人物爰就是集掇述梗概以表章之異日再修邑乘若章壽人布衣者隱逸獨行可酌入也

敬鄉筆述卷三

六

長春書屋

解小亭明府

楊香吟師琴琅玕館文鈔有解小亭明府守拙齋詩集一序序內稱小亭明府與梅樹君學博爲莫逆交同硯同科又同歲月生學博編輯津門詩鈔獨遺之意者前輩深於韜晦不欲自炫雖良友莫能強歟鑿見此序當詢詩稿知藏小樹明經寶璐手此序卽小樹晚作也小樹已歸道山光緒乙未春小樹喆嗣子駿茂才元捷亦化去此稿不知仍存否亟將詩序錄要以記之俾邑人知小亭明府著有守拙齋詩集或不至終於滅沒攷選

舉錄嘉慶五年庚申恩科舉人解道顯字小亭廣東永

安縣知縣

以上初稿所記止此

嗣閱津門古文所見錄載有小亭

明府記夢一篇細讀一過知明府具有夙根殆慧業文人也中有金剛六如說偈夢幻泡影露電也偈各四句句則五言洞澈光明一空塵障由此觀之小亭明府之詩必清超而有骨力者今無意中於古文所見錄得見先生之文焉知異日先生詩集之不復出乎一章數章之不可見乎亟識數行於後

沈青來處士

敬鄉筆述卷三

七

長春書屋

南匯馮金伯墨香居畫識沈銓字師橋號青來天津人山水師石田翁花卉宗懔南田嘗遊京師瑤華主人雅重之生平慕黃山之勝己未秋偕程音田考功至歛與莫山人葵齋裹糧同遊凡山中怪石古松奇葩異卉咸爲圖繪無不逼真案續邑志沈青來處士藝術有傳青來善繪著色花卉當時重之著有六琴十硯齋詩草津門詩鈔所載與小傳相同僅多得張桂巖所傳一句皆未及先生工繪山水也先生山水之作吾邑罕見鑾僅見先叔祖晴圃公墨經從軍圖寫照者爲海豐李桐圃

紱慶圖中青山紅樹卽先生補景馮金伯畫識稱先生山水師石田翁自必有所見而云然也先生著有讀畫記八卷爲華聽橋貳尹家藏本屬余校勘余得檢閱一過先生此記於收藏數家所見分卷載之瑤華主人所藏亦詳集中末卷則襍記所見也卷中敘述畫幅靡不詳盡詩句題跋亦多選錄未經評論者皆附列其目而攷訂處尤具微卓識見此記者多比之張青父書畫舫高江村銷夏錄洵屬不誣余則謂先生記畫筆意更與前明李竹嬾奉常日華六研齋筆記論畫相似堪稱清逸之品惟先生後裔式微甚矣幸稿本八卷藏諸華氏文之顯晦固自有時安知異日之必不刊傳乎余旣獲讀全書亟將畫識所載錄出俾邑人知青來先生不僅善繪花卉實兼工山水且著有養素軒讀畫記也

畢也香刺史

昭文蔣寶麟墨林今話卷十一載畢紹棠號也香直隸天津人官浙江藩掾推升雲南晉寧州知州畫宗婁東二王渾厚天成無劍拔弩張之態書法亦蒼勁有力案續邑志例貢例監無也香刺史之名藝術亦無刺史之

傳檢閱津門詩鈔陳青立靖雨峯布衣小傳後有梅樹君學博論邑人諸畫家一則蓋盛稱雨峯布衣之工畫山水也末云其得雨峯之傳者王訪舟成烈畢硯農紹棠皆藝苑之翹楚又詩鈔內有雨峯題畫贈畢硯農七絕一首詩云舊雨情深老硯農官衙無事可從容寄將一幅離披畫可似黃山第幾峯題下注時硯農爲歙縣尉雨峯尙有和畢硯農見贈原韻二律不錄據詩鈔攷證知也香刺史又號硯農並曾爲安徽歙縣尉且知能詩正不僅善畫工書也續志藝術陳青立王訪舟二布衣各有傳若畢也香刺史者異日再修邑乘必應列入藝術也

張孟臬貳尹

墨林今話續編張孟臬學廣直隸天津人今官浙江貳尹曾於友人扇頭見其折枝畫用筆疏朗可喜亦司馬繡谷一流惜未多見誌之以俟續采案續邑志亦無張孟臬貳尹之名就墨林今話續編觀之貳尹之宦浙約在道光十年前後時亟錄存之以待攷詢

鄭笠艇布衣

津門詩鈔鄭樸字笠艇布衣著有哀吟集一卷樹君學博稱笠艇幼孤失學中年遊幕南北始折節讀書喜爲小詩以言其志貌極清臞而孤潔有至性事孀姊盡禮四十餘年如一日歿後竭力葬之老無嗣而饑貧甚嘗絕炊旬日閉門不屑乞請有顧公者義而養之夜宿章姓家如是半載顧婦死公歎曰窮老依人乃累及良友天絕我矣遂投河死先是予求其詩謙不肯與死前一日乃袖所著投予不虞其來告別也聞其死慘怛累日以上樹君學博所紀余見詩鈔有詠淮陰七絕云我來惆悵釣臺前卻笑淮陰未遇年縱使千金酬一飯英雄早已受人憐合此詩以觀笠艇布衣之志節可概見矣案舊志人物列傳未分名目續志無獨行隱逸二傳若笠艇布衣之爲人同章壽人布衣皆可入獨行續志雖無獨行而笠艇布衣貧而能待孀姊盡禮生事死葬若此未嘗不可列入義行樹君學博所紀卽傳略也爰照詩鈔錄出以表章之俟再修邑志者裁察焉

牛次原太僕

津門詩鈔牛坤字次原觀察稔文子乾隆丙午舉人嘉

慶己未進士樹君學博稱公性倜儻不拘拘細節卓朗  
自喜雖肆應無窮而積學不倦督學雲南時因尊公宦  
遊地加意士林宣幽達滯殷殷以培養風化爲己任滇  
人口碑載道可謂克紹先緒者矣又學博吟齋筆存邑  
前輩牛次原先生憶津門詩曰三月河豚八月蟹故鄉  
雖好我無家蓋先生父師竹觀察遊宦四方家居日少  
故多純鱸之思然性伉爽豪俊不可一世最重氣誼後  
於嘉慶己未成進士官至閣學

案梅莊學博津門選舉錄未注內閣侍讀學士

三品卿銜太僕寺少卿 高凌雲案次原由內閣侍讀學士獲譴見續東華錄及放歸年已老不復起用所謂

### 敬鄉筆述卷二

三

長春書屋

太僕寺少卿未知在何時三品卿銜或係陵工保案緣閣學係內閣學士之簡稱非謂內閣侍讀學士也

萬年吉地事譴戍新疆時先生年近七旬有人謂牛公  
其不回乎子曰不然因引漢書丙吉傳以證之吉疾病  
宣帝憂吉不起太子太傅夏侯勝曰此未死也臣聞有  
陰德者必饗其樂以及子孫今吉未獲報而疾甚非其  
死疾也後果愈次原先生有墓園在薊州盤山下族人  
未葬之棺百餘口或艱於力薄或礙於年向其無子孫  
者遂致暴露次原視學滇南回曰此纍纍者何日就安  
耶乃不謀於眾擇吉一日盡葬之此一事已卓越不可

及吾津王善舟太守未遇時多遭人白眼惟次原識而原之其他慷慨不可枚舉吾知天道必有以報之也已而果蒙賜環今年已八十精神矍鑠詰嗣鎮爲山西平陽太守公享祿養正未艾也案續志列次原太僕於耆壽小傳卽翦裁詩鈔樹君學博之語余意甚不謂然就余所見太僕之文皆傳作不僅詩句之足傳也因節錄吟齋筆存以證知當年爲樹君學博欽佩稱贊若此太僕學行舉可見矣理應列入文苑

案此則初稿僅數行載入八卷辨證人物列傳

敬鄉筆述卷三

三

長春書屋

條內及繕清本思之殊覺未當重定此稿因補錄於三卷後

案王善舟太守名有慶嘉慶辛酉舉人教習知縣歷任江蘇豐縣元和縣知縣洵升泰州知州太倉直隸州知州松江淮安蘇州府知府所蒞皆有惠政續志循吏有傳並載任泰州日士紳頌獻之聯曰是儒吏是廉吏是循吏名達楓宸行作公卿大吏能安民能養民能教民恩周蔀屋允宜父母斯民此聯梁茆鄰中丞楹聯叢話

亦載之

敬鄉筆述卷三

三

長春書屋



敬鄉筆述卷四

天津徐士鑾沅青輯

梅樹君學博

燕山孫詩樵樓餘墨偶談津門梅樹君成棟與慶雲崔念堂旭齊名均爲張船山先生弟子長洲陶臬薌合刊其詩題曰燕南二俊集名作林立多有可觀崔著念堂詩話行世子最愛其春詞云樓上笙歌水上簫至今夢想亦魂銷造憐丁字沽邊柳綠到紅欄第幾橋幼聞梅公有上房師宋某斷句云除卻廣平能作賦梅花知己

敬鄉筆述卷四

一 長春書畫屋

已無多又題畫石云癡頑我亦渾相似祇有無言不及君今集中均不載可知遺佚者多矣陶樸燕南二俊集序稱樹君之詩雄古超邁力絕恆蹊而真摯之性時流露於楮墨間又紅豆樹館詩話樹君念同郡詩人自明迄今姓氏日就湮沒從蛛絲鼠迹間訪求遺稿遇有零章碎句隨時掌錄輯成津門詩鈔若干卷表彰前哲厥功甚偉案樹君先生嘉慶庚申科舉人仕至永平府訓導續志文苑有傳邑人沈雲巢方伯所譔也先生博雅工詩提唱宗風聲華藉甚著有欲起竹間樓詩集暨文

稿甚富惜皆無力梓行津門詩鈔續邑志所載先生之  
文多表章孝義節烈之作其品學概可見矣

案津門詩鈔載樹君學博薦師宋小嵐觀察漢  
題樹君孝廉詩集七古一首有敢與梅花爲知  
己愧無東閣繼前因句句下注前樹君寄詩有  
不是廣平憐作賦梅花知己亦無多之句孫詩  
樵所述蓋記憶未確耳特正之

胡秋坪明府詩

董梧侯貢生懷新石蓮集一卷原名香奩集華梅莊學

敬鄉筆述卷四

二

長春書屋

博代爲梓傳者也卷首題詞有胡秋坪明府兆麟七古  
一首檢閱津門詩鈔無秋坪明府詩因錄存之詩云名  
士愛身如美女美女遴才似選舉一雙俊眼注天涯安  
得同心作儔侶牀頭懸劍鐵錚錚夢裏槐安願請纓傲  
骨嶙峋情骨脆披肝瀝血美人城倒挽銀河瀉平地支  
機在手終爲累取將織女擲牽牛萬古千秋縱思媚不  
如意事世常多虞兮虞兮叫奈何珠墜樓時人似夢雨  
淋鈴夜淚如梭埋香瘞玉摧粉黛造化小兒真狡獪百  
車果實打安仁萬頃秋波灌衛玠韶華似水水東流美

人亦休士亦休我自行屍慣嚙語長安瞬眼睡齣齣案  
邑志選舉錄胡兆麟嘉慶十五年庚午科舉人廣西昭  
平縣知縣此集題詞尙有史雨汀貢生樂善七絕五首  
因豔體不錄余見華少梅茂才脞錄中有雨汀先生詩  
數首異日續輯津門詩鈔儘可選取錄秋坪明府七古  
者實因其詩僅於此見也

張筱琴布衣秋園小詩二則

秋園小詩四卷張筱琴布衣桐所著也余見卷中有輓  
江西義寧州知州葉枚生刺史濟英殉難二律詩云楚

敬鄉筆述卷四

三

長春書局

氛重疊起無端眾志成城力已殫獨矢丹心籌保障竟  
難赤手挽狂瀾登陴痛哭悲余闕斷指求援感賀蘭守  
土如公真不愧可憐萬姓盡摧殘其二云妻孥同死報  
天恩孝義忠貞萃一門廿日危城逢浩劫九原卹典慰  
幽魂生芻遙祭多僚友覆卵能完有幼孫公幼孫甫八  
歲自圍城出  
從此愛蓮池畔水新添碧血染波痕義寧州署後有周  
子愛蓮池公及眷  
屬皆投  
水殉難案枚生刺史爲郡屬滄州人曩見寶山袁穀廉  
大令翼哀忠集有輓葉刺史詩謂幕客負公七歲幼子  
出城此詩謂公八歲幼孫袁詩末句靴刀刎頸尙銜鬚

此詩注云公投池死當係所聞異詞或刎頸未死因又投池亦情理中事也至刺史眷屬同投愛蓮池殉難則爲袁詩所未及

秋園小詩有題玉貞姪女詩草一律詩云聰明一世愧男兒風雅千秋作女師妙悟常通琴外曲賞音兼得畫

中詩

女善琴畫

燈花早兆清貞品

女生時其父夢燈花一枝

萱草難忘鞠

育恩

稿中有堂少萱花易感春之句

更是情深諸弟妹天涯睽隔繫離

思又玉貞姪女五十初度賦贈一律詩云未老寒梅正向榮壽觴開到月嘉平燈花早兆三生夢詩畫全收半

### 敬鄉筆述卷四

四

長春書屋

世名五十年中常孺慕九重詔下表清貞

時以貞開來孝旌表

悟得參禪理一卷金經掃俗情

孝貞女蘊仙詳見卷六

案張筱琴

布衣爲嘯厓主政之孫耀卿明府鳳輝次子幼從父宦

遊江右依依膝下不復進取壯歲後幕遊虔吉老於布

衣生平酷嗜吟詠卷中佳作美不勝收余錄此四詩者

蓋取表揚忠烈貞孝亦卽以傳筱琴布衣意也筱琴之

女馥雲亦能詩筱琴送女子歸金陵歸途偶檢行篋存

有馥雲皖江所詠詩稿感賦一律詩末注云女皖江舟

中有鐘敲遠寺聲沈水及夕陽紅見半帆遙之句余觀

馥雲詩筆極妙惜僅於筱琴先生詩後得此二句附錄以傳未卜能覓到一二詩稿否玉貞胞妹淑貞亦能詩見題乃姊蘊仙詩草一門閨秀三才女實爲吾津所罕有也

### 樊文卿二尹

津門詩鈔樊彬字文卿廩膳生著有文卿吟稿樹君學博稱文卿詠驛柳詩有誰將短笛吹三弄客共飛花忙一春句子絕賞之其佳句如獸炭云未必焚身因齒累獨含奇氣肯心灰又豈有文章占炳蔚可憐頭腦近冬

### 敬鄉筆述卷四

### 五

長春書畫屋

烘俱有寄託寶坻高寄泉齋尹繼珩蝶階外史續編樊文卿彬天津詩人官湖北丞予三十年世好也丁巳遇於都門知其拂衣引退高致可欽案文卿先生解組後卽僑寓京中余與先生舊有姻連辛酉供職薇垣始獲瞻仰道範繼此亦時陪杖履稔知先生多與春明冷宦詩人往還酬唱嗣見代州馮魯川部郎志沂尙微齋詩集有次先生韻詩洪洞董硯樵太史文渙秋懷唱和詩載有先生和韻此外各家詩集余所未見者尙多知先生實爲宣南騷壇之盟長也津門詩鈔所選尙是先生

諸生時作文卿吟稿聞早刊傳先生並著有津門小令百首仿吳梅村祭酒望江南之作余曾索有刻本先生學問淹博性嗜吟詠老年不倦華文珊津門徵獻詩有先生一序同治三年甲子所作自注時年六十九光緒辛巳先生始歸道山年已八十六矣續邑志貢生載有先生名注謄錄湖北遠安縣知縣知縣二字可疑因檢閱先生次子景升咸豐辛酉中式硃卷高凌雲按樊景升咸豐十一年誤先生名下注廩貢生謄錄議敘冀州訓導湖北蘄水縣縣丞調任鍾祥縣縣丞歷署遠安建始

敬鄉筆述卷四

六

長春春書屋

縣知縣續志所書宜改再續志於同治九年成書先生猶健存也茲就所知所見述之以俟再修邑志者裁察焉列先生於文苑

賈廷琳按張文襄撰滄州王侶樵墓誌云畿輔自道光咸豐以來篤耆金石文字稱者三家一天津樊彬文卿貧老澹泊精力絕人蒐羅海內碑刻最富多乾嘉諸老不及見者會稽趙之謙刊行寰宇訪碑續錄什九皆樊所輯也據此則文卿先生金石之學實為冠絕一時筆述中未之及故附錄於此

余肅齋學博

華梅莊學博梅莊詩鈔有懷人詩十八首內詠余肅齋

學博詩云南海有成連移情結夢想古調不獨彈知音  
世無兩空展摩雲翅萬里獨來往檢閱續邑志貢生余  
作恭字肅齋案肅齋由廩貢生候選訓導前廣東陽春  
縣知縣階升明府堂之長子也階升明府循吏有傳肅  
齋賦性沖和接物謙藹生平無急言遽色善弈碁解琴  
曲雅人深致肅齋有焉尤精相宅相墓之術然必親友  
延邀始肯往視固非懸牌鬻藝者所得同日語也高陽  
李蘭孫協揆鴻藻官侍郎日爲姚太夫人安葬專函敦  
請遣輿接送稔知其學有心得識見有遠邁術家者先

敬鄉筆述卷四

七

長春書局

是咸豐間李高陽視學中州曾延肅齋襄校老成端謹  
甚契重之相知蓋有素矣余見續志藝術惟載洪吉人  
貢生天錫精醫學若肅齋之相宅相墓親友無不稱其  
審慎高明文人中洵不多覯堪入藝術續志成於同治  
庚午肅齋猶健存也茲就所知述之證諸梅莊學博之  
詩肅齋品詣可想見矣以俟再修邑志者裁察焉

張書田學博

碧琅玕館詩鈔首弁張書田太夫子式芸一序序後又  
綴二律書田先生詩不多見爰錄存之詩云自與盈川

別於今近廿年詩從憂思得語總性靈鐫處世無城府  
傳家有誦絃乾坤清氣在卓立海雲邊次云變風兼變  
雅宜聖不曾刪生值亂離際痛深家國間有心回世運  
無力濟時艱予亦同茲憤長歌出涕潛案續志選舉錄  
先生道光甲辰科舉人歷官隆平縣教諭延慶州學正  
先生以名孝廉設帳里門日間業者戶外屢滿多所成  
就香吟師卽先生入室高弟也先生爲吾邑耆宿品端  
學粹岸然道貌言笑不苟聲望重士林識與不識聞先  
生名無不肅然起敬所著有選青堂文稿四卷已經刊  
人

敬鄉筆述卷四

八  
長春書屋

姚玉農明府

華梅莊學博梅莊詩鈔有詠同契者得十八人各繫六  
言短章以誌勿諼內詠姚玉農明府詩云冰壺三世頭



銜金榜十年心血毫端放萬丈光那許偷父饒舌檢閱  
續邑志選舉錄道光壬辰恩科舉人姚承豐字玉農膽  
錄知縣加同知銜案玉農先生爲前安徽太平府同知  
蔗田司馬逢年之季子奉天承德縣知縣朗山明府承  
恩之胞弟父兄皆名進士循吏有傳先生性情和藹操  
履端潔學有淵源賈廷琳按玉農明府著有稔齋詩草  
一卷民國十一年其孫彤章仿宋括  
字本印行生平無矜浮氣儒素家風縹緲世守家居授學成  
就人材惟多所最著者咸豐壬子科先生兩宅相同登  
進士一爲邑人陶晴初大令雲升一爲高陽李蘭孫協

敬鄉筆述卷四

九 長春書屋

揆問高陽協揆少孤依舅家讀書實賴先生成全之道  
光戊申楊慰農制軍需任長蘆都轉日欽仰先生品學  
敦請入署課都轉公子讀待先生極其尊敬慰農都轉  
亦名進士也公餘輒至館中與先生論詩文講經史契  
分最深迨都轉升任去始分手焉先生家舊業鹺夙稱  
疲累五年之久先生無絲毫干請宜都轉之禮敬倍加  
也先生與先叔父竹士公爲莫逆交無三日不見來必  
長談先叔父每令鑾呈課作求先生指教者有年矣鑾  
同弟藎蒙先生啟迪至多以此硃卷皆稱先生爲課師

然實未足以報先生也先生品學實爲邑人所共知有  
不僅見諸梅莊學博一詩者鑿恐積久湮沒弗彰謹就  
所知述之以俟修志者裁察焉

趙晴嵐觀察

湘南王爵棠方伯之春椒生隨筆內侍一則謂本朝鑒  
前代之失嚴抑內侍真千秋良法也同治庚午之秋太  
監安得海私自出京沿途招搖爲山東德州知州趙新  
稟揭經中丞丁公寶楨拏獲奏明奉旨將安得海正法  
跟隨私逃之太監陳玉祥李平安李得喜郝長瑞李順

敬鄉筆述卷四

十

長春書屋

計得壽均絞決假充前站官之黃石魁田兒及鑣丁韓  
寶清戴登雲何林高振邦劉鳳喜一併正法蘇拉金安  
信劉交瑞劉凱黃廣喜跟隨蘇拉之張順僧人廣文家  
屬安得邦安馬氏

賈廷琳案同治東華續錄何林作何  
林芝金安信作金安言劉交瑞作劉

文瑞黃應喜作黃應善張順作張瑞僧人  
廣文作演文安得邦作安邦太與此多異均發黑龍江

給披甲爲奴並將八月十二日九月初九日諭旨載入  
宮中現行則例又以太監王天福爲安得海經營家務  
亦卽處絞命下之日臣民欣服又樂亭史香厓先生夢  
蘭止園筆談亦記此事且稱我朝家法相承整飭宦寺

有犯必懲法令至嚴每遇有在外招搖生事者無不立治其罪誠度越前代萬萬矣同治九年

高凌雲案九年原書作八年又

案薛叔耘庸庵文集記八月十二日奉上諭本月初三

安得海事亦作八年

日山東巡撫丁寶楨奏德州知州趙新稟稱有安姓太監乘坐大船捏稱欽差織辦龍衣船旁插有龍鳳旗幟攜帶男女多人沿途招搖居民驚駭等情當經諭令直隸山東江蘇各省督撫派員查拏即行正法茲據丁寶楨奏於泰安縣地方將該犯安得海拏獲遵旨正法其隨從人等諭令丁寶楨分別嚴行懲辦恭讀之下莫不

敬鄉筆述卷四

十一

長春書屋

額手稱快合觀隨筆筆談所記一述第二次諭旨一述初次諭旨太監安得海犯罪情事始末益昭然矣因並錄之續邑志選舉錄道光癸卯科舉人趙新字晴嵐大挑知縣案晴嵐以知縣分發山東洊升道員歷官長清縣知縣德州知州曹州府知府嗣在曹州府任內丁父憂服闋即以道員需次山左歷官所至皆著政聲而清廉材幹之名夙為上憲所器重內侍安得海出京由通州乘官舫行至德州所過順直境內沿途招搖地方官竟無一敢過問者德州知州獨稟揭之一時強正材幹

之稱遍播人口宇內想望風裁洵偉人也觀察長身玉立丰神雋拔論議倜儻望而知殊庸懦者惜道員未獲卽真而歿其年甫逾耳順也身後家計蕭條所謂清風兩袖者觀察殆無愧焉長子世曾字星聯同治甲子科舉人光緒丁丑科進士以庶吉士用先觀察卒次子世廉以鹽大使需次山東

丁朗齋學博

續邑志列女趙氏歲貢生國祚女處士丁光倫妻年二十六歲光倫故遺孤琪甫五歲家綦貧事孀姑撫幼子

敬鄉筆述卷四

三

長春書局

皆取給於鍼帶雖饗餐常缺而處之晏如琪就傅氏課之嚴晨鐘先起促讀夜則篝鐙縫紉以伴寒暑無間者六年琪以冠軍遊庠中道光甲辰科舉人任阜城縣訓導今年八十三歲此續志所載節孝丁母趙氏傳時丁母尙在也案琪字朗齋賦性肫摯品學俱優孝事節母設館於家束修所入悉供甘旨先生訓迪有方從遊日眾孝秀多出其門文望重一時嗣以大挑二等選阜城縣訓導時節母春秋已高動作需人迎養學署一切起居飲食疾痛疴癢罔不調護維持每爲母澣滌中裙無

愧古之孝者母歿哀號如嬰兒殯葬盡禮服闋再選高陽縣教諭先生所至明倫講學多士翕服年七十八疾終任所先生孝行鑿於香吟師齋中得聞其詳且悉節母之賢檢閱續志見有節母傳爰照錄出卽敘先生學行於後以見母賢子孝也異日再修邑志若朗齋學博者優入孝行

### 王荆式學博

續邑志貢生列有王慶有之名字與官階皆未注也案慶有歲貢生官至安肅縣訓導先生性情敦厚文名藉

### 敬鄉筆述卷四

三

長春書屋

甚從遊者戶外屢滿造就人材最多王雲舫侍郎文錦其及門士也司鐸安肅日諸生多來從學先生裁成後進善於誘掖以故多士心悅誠服光緒癸未先生將告歸諸生感頌大德公送匾額二方文曰春風普被一懸安肅明倫堂一方送至先生之家啟行日諸生衣冠公餞於書院恭送北門外五里之遠先生教澤涵濡可想見焉時年七十三優遊林下八年辛卯以疾卒年八十一歲先生胞姪廷珍同治庚午科舉人大挑湖北知縣子廷瑜光緒己丑科鄉魁孫憲章癸巳科舉人僉謂先

生造就人材之報後人科名昌熾方興未艾其積德有厚者矣爰就所知述之俟修邑志者裁察焉

### 梅香垞明府

續邑志選舉錄道光己酉科副榜梅之楨字香垞教習知縣又咸豐乙卯科副榜案香垞明府甲寅由副貢生考取教習館滿以知縣候銓香垞工書能文設帳里門日延聘者無虛歲咸豐八年李高陽以編修視學中州敦請襄校甚爲契重繼此薦爲河間書院掌教同治初年特延香垞入京課高陽公子讀已歷數年公子年甫

### 敬鄉筆述卷四

十四

長春書屋

弱冠忽以疾殞高陽仍留香垞於館時高陽以弘德殿行走兼軍機大臣政務鮮暇凡求高陽書字者皆香垞代筆兼司書札高陽非特愛其書法實深重其品學也光緒癸未臘初病於京寓高陽以駝轎送歸津病亦漸減甲申二月初五日遽爾逝世高陽痛深情重卽延香垞詰嗣韻生明府振瀛繼其館總計香垞喬梓館高陽宅中三十餘年相信有獨深者矣香垞沈靜謹恪身居貴要之地足迹罕出戶庭其慎微遠嫌有爲人所不能及者性亦澹於仕進凡教習班待銓者多人贊得本班

先以此積三十年爲人歷班未得一行作吏士論惜之  
香垞明府品學夙爲邑人所共知余恐積久湮沒弗彰  
爰就所知述之俟修志者裁察焉振瀛戊子優貢生以  
知縣用

賈廷琳案無錫寶鎮國朝書畫家筆錄云梅  
振瀛天津人能詩善篆隸行楷極精工畫山  
水蘭竹亦精妙尤喜畫金魚  
人稱其書法詩畫爲三絕

### 華少梅茂才

脞錄二卷華少梅茂才光鼎著卷中收錄鄉先輩詩多  
爲津門詩鈔所未見其意蓋留俟續輯詩鈔者采選亦

### 敬鄉筆述卷四

五 長春書屋

存其詩卽以傳其人也復纂輯津門文鈔二十四卷少  
梅曾於舊書肆得章壽人布衣傳蜀道集一卷藏諸篋  
衍又於書肆得楊拙漁先生學半塾詩稿二卷嗣知爲  
楊醉六明經慎恭乃祖詩俾梅小樹歸之醉六心感由  
是訂交觀其歷於故紙堆中搜尋鄉前輩詩文不遺餘  
力洵可謂愛才若命者矣少梅天姿聰慧至性孝友十  
九歲補諸生文名噪津邑自髫齡卽嗜吟詠有尊翁梅  
莊先生風著有東觀室詩草四卷年僅三十二歲遽以  
疾歿士林惋惜先是乙卯秋少梅養疴旋里於藥鎗茗

椀間猶復耽吟不輟編輯文鈔摯意深心志存千古雖  
嘔盡心肝未嘗釋手楊醉六明經序少梅詩草稱其識  
見之遠大意氣之肫誠有非他人能及者明經數語斯  
真灼知少梅能傳少梅者乎喆嗣聽橋二尹鐸孫已將  
東觀室遺稿暨脞錄刊傳並仰承先志出舊藏章壽人  
布衣蜀道集一卷梓行且亟謀將津門文鈔付諸剞劂  
用傳久遠聽橋二尹可謂善繼善述者矣然則少梅茂  
才有功於桑梓文獻豈淺鮮哉爰掇舉所見所知書之  
以俟修志者裁察焉

敬鄉筆述卷四

六

長春書屋

賈廷琳案津門文鈔原稿本即係沅青先生  
手校民國以來天津續修新志遺編復出經  
金君鉞刊入屏廬叢刻中此書遂顯於世并  
由王先生守恂重加編訂分爲七卷更易名  
爲天津  
文鈔云

盧紹棠主政

洪洞董硯樵太史文渙賈廷琳案董硯樵工詩多  
韻致見南皮張文襄書札秋懷

倡和詩蓋輯同人和作也贈余刊本見吾邑盧紹棠主  
政壽彤和韻八首詩云寒暑迭氣運萬變苦不長庭柯  
墮敗葉昨爲疑疑光形神非元化何自無改常側身畏  
聽睹悽愴懷春陽其二云秋蟀酸宵吟疏雨亂愁滴序



晚樹一歡對影剩蕭壁風力恐孤眠霜氣奪羣碧意違  
百無好但悔負泉石其三云寒蠶微末生警涼愴時數  
泣露哀哀吟萬緣一夜故客子愁書空鬼神亂隱訴蒼  
懷豈萱草忘憂堂背樹其四云賤貧達士分自足安多  
求杞梓何怨人爭來樵斧讐念之悴顏色閱世叢隱憂  
欲遣呼歡伯消我心上秋其五云功名日在眼捷足紛  
登巖貴人恥迂步中道生憂疑榮枯一得失誰測禍福  
基草木方雨露豈意清霜時其六云流俗忌窮蹇詎識  
達者非此何矯捷氣周顧心從違初景日以遠舊歡日

敬鄉筆述卷四

七

長春書屋

以稀芳時去我早側念傷隱微其七云修短同死生驚  
秋物皆後蘭菊晚節容耐寒何能久感時心變霜氣先  
草木朽窮途日棘塞行止焉可否其八云宵籟語孤月  
一蟲嘯壞陰百草惡消歇刺刺風中吟十載無好夢而  
懷百年心百年念容保歎息匪斯今案紹棠原名恩溥  
咸豐辛酉拔貢生朝考以小京官用仕至兵部主事紹  
棠天資聰穎行詣高潔安貧力學博極羣書楷法秀勁  
工繪山水精篆籀刻而尤刻意於古今體詩春明冷宦  
詩人多與酬唱乃郎梅初茂才炳麟弱冠補諸生書法

韶秀亦工繪事喬梓書畫所得潤筆歲約三百餘金兼之廉俸凍餒無虞詎梅初年僅廿三四遽以瘵疾殞紹棠哭子至昏不辨人寄示哭子詩多首令人不忍卒讀知其痛深腸斷矣竟以痛子而亡慘矣哉時在光緒丙子紹棠年甫逾壯也生前所著吟香館詩稿甚夥今不知散棄何所矣念之心痛有題余太常仙蝶圖七古一首彙入仙蝶圖詠集中又和余丁卯春正旋津途中作七律一首已錄附余詩之後至其哭子詩當日在台郡實不忍再視而今尋覓不獲矣余見秋懷倡和詩載有

敬鄉筆述卷四

六

長春書屋

八首故全錄出以俟續輯津門詩鈔采選紹棠三歲失怙賴母姜太安人苦節教養成立筮仕卽迎養入都同治四年節母以病歿邑人沈雲巢方伯謨傳已載入續邑志紹棠奉母至孝因母氏苦節於入仕後卽遍乞津京詩人表揚徵詩積一厚冊余曾見之此冊亦不知歸何所矣咸豐八年春紹棠與余同擷芹香卽聯蘭譜是以知之較詳因錄紹棠之詩並掇述其梗概濡墨和淚書之

郝石臞老人

慶雲崔念堂旭津門百詠詠津門詩家云津門名勝足  
詩家沾上題襟事已賒前輩風流搖落後獨留清韻在  
梅花詩後注津門詩風最著國初有張笨山龍東溟黃  
六吉梁芟梁諸公繼有周月東朱陸槎王介山金芥舟  
于虹亭張楚山諸公至乾隆末年尙有周大迂康達夫  
郝石臞金野田諸公今尙有同門友梅樹君在案黃六  
吉謙舊邑志有傳龍東溟震周月東焯朱陸槎函夏王  
介山又樸金芥舟玉岡于虹亭豹文張楚山湘康達夫  
堯衢金野田銓續志皆有傳梁芟梁洪又號崇此續志

敬鄉筆述卷四

九

長春書屋

寓賢有傳余固謂張笨山舍人宜立一傳列入寓賢也

詳見

卷八周大迂明經應列入文苑余已詳論

詳見

卷一至郝石

臞老人應一例列入文苑案津門詩鈔郝仁字壽朋號  
石臞諸生梅樹君學博稱公奉親至孝詩以樂府擅長  
與康達夫金野田周大迂諸公同社抱志未遂教子延  
年成進士宰河南湯陰縣迎養署中壽八十餘卒續志  
列石臞老人於耆壽小傳卽用樹君學博之語而刪去  
以樂府擅長云云似尤不可樹君學博於康達夫明經  
詩後謂乾隆五十餘年之後詩風稍衰維時遙接其蹤

而起者爲康公達夫郝公石臚金公野田周公大迂諸人立社聯吟講明聲律維持詩教一時慕其風者爭自琢磨願附其列絕續之交厥功甚鉅觀此則石臚老人同周大迂明經所必應補入文苑者也

### 梅雅村布衣

津門百詠又詠津門畫家云墨竹昔稱吳念湖雅村健筆近來無訪舟青立工山水迥與尋常畫史殊詩後注津門畫手向推金芥舟之山水吳念湖太守之竹蘭後擅竹蘭者惟梅樹君尊公雅村先生爲最而陳公青立

### 敬鄉筆述卷四

二

長春書屋

王公訪舟之山水俱得南宗正派檢閱續志金芥舟老人吳念湖太守文苑皆有傳陳青立靖王訪舟成烈二布衣藝術亦有傳雅村先生工詩善畫與青立訪舟皆聲價重一時畫幅流傳人爭寶貴而藝術獨遺實爲憾事案津門詩鈔梅履端字雅村號三渠釣叟晚自號拙石老人布衣著有拙石山房詩草

末一語見畿輔詩傳余因補入雅村

先生爲王訪舟之舅訪舟於先生小傳後識云舅氏中年學畫遂成絕藝竹法文與可蘭法鄭所南梅法梅花道人尺幅片紙爭購爲寶遊迹牛海內卒不遇觀此則

雅村布衣所必應補入藝術者也

案以上二則標目一作津門詩家一作津門畫家編入第七卷叢錄類及繕清本思之以爲未當因補錄於此郝石臞老人一則應列卷一周大迂明經後梅雅村布衣一則應列卷三畢也香刺史前今特揭明不再更易而此卷得此兩先輩殿後恰似留作後勁者亦可異矣

敬鄉筆述卷四

三

長春書屋

敬鄉筆述目錄

卷五

周孝子琦

曹孝子甯升

張孝子淦

胡孝子柄泰

書趙錫朋死事

金剛愍本籍建立專祠

金剛愍眷屬蘇城殉難

敬鄉筆述目錄

陳遊戎毅死大沽之役

附存誦芬彙錄

喜雪詩

詠貞烈殷氏詩

金芳舟圖照題句

碩德耆年會詩

竹溪泛櫂圖題句

張船山題從軍圖詩

沈存圃明府紅葉和韻



又寄德化尹詩

長夏漫興七絕一首

卷六

周節烈龍氏

樊節烈王氏

王孝烈湯氏

鄭節烈劉氏

附紀設立採訪局

楊孝烈張氏

附徵詩文啟

張貞孝女蘊仙

附同鄉官公稟稿

江西撫奏稿

敬鄉筆述目錄

二

長春書屋

鄭孝烈女凌仙

節婦崔氏李氏事記

劉節烈王氏

章節烈王氏

辛節烈王氏

李節烈徐氏

門節烈張氏

敬鄉筆述卷五

天津徐士鑾沅青輯

周孝子琦

李斗揚州畫舫錄周大綸字理夫天津人官彰化縣丞  
賊匪畔執之囚數日罵賊而死賊平贈雲騎尉長子琦  
負骨歸葬至揚琦卒停柩湖上兩月為詩弔者甚多江  
都焦循周縣丞傳末云公長子琦字璞亭材質穎異  
精力過人賊平福大將軍上公死事狀欽賜葬祭銀封  
爵雲騎尉子孫廕襲琦痛父骨未歸葬以廕官讓弟渡

敬鄉筆述卷五

長春書局

海至諸羅家故貧力貧忍瘁踰越險阻哀毀致疾乾隆  
五十六年卒於揚州公遇害年五十有一琦歿年三十  
有八焦循曰公死事狀琦得之於葉生友伯諸羅人稱

之不異詞琦以語弟鼎鼎親語余

闕津門詩鈔琦卒於揚州途次其弟璠扶

父兄樞歸里案璠即海村先生想先生初名鼎也

然如陳德之忠

案陳德理夫縣丞僕紹興

人公遇害時德急抱持以身蔽賊並擊之德大罵賊亦支解死

葉生之義

案葉生名友伯廣東嘉應

人商於諸羅以公廉正素好公賊縛公去友伯探知懷

橫狼藉於榭上下莫敢收者友伯至屍所拜哭葉葬於

地逮大兵剿賊後有司覓公屍友伯示其所以禮斂之

伯復為之經理盡善云琦之孝友余苦其不傳也案理



夫二尹爲躍滄觀察人龍子續志忠節有傳所敘甚詳  
陳德之忠葉生之義皆詳敘焉惟於公子琦痛父骨未  
歸葬以廕讓弟渡海至諸羅及哀毀致疾卒於揚州各  
節一語未及而孝行志亦無琦傳余見津門詩鈔躍滄  
觀察詩後附載焦理堂孝廉所撰周二尹傳樹君學博  
將陳德葉友伯公子琦分敘三段若各爲一傳然樹君  
先生其深有意歟賈廷琳案焦循雕菰樓集原撰  
卽如此非由樹君先生所分也余因  
續志無琦傳且從未聞邑人稱述其孝友者特從津門  
徵獻詩所載揚州畫舫錄焦循周縣丞傳摘要錄出以  
表章之

曹孝子嚮升

香吟師碧琅玕館文鈔有割股辨爲曹孝子嚮升作也  
文曰韓文公之論割股也寥寥數語義正詞嚴後人幾  
無從置喙矣而余自居憂以來愧恨萬狀感於曹子之  
事人各異詞有不能終默者焉夫人子侍親之疾不幸  
至百藥無效而疾日篤當心力俱窮之際哀懼交迫之  
時又復須臾難緩苟有一術得以自盡將微倖於萬一  
爲吾親延其命又何暇作一轉念預計人將有以議我

遲迴而不決乎設恐人之議我而不爲則是爲人子者直自等於無關痛癢之人第從而歔歔太息委之命與數焉抑亦思此何時耶此何心耶而彌留病榻僅餘一息者爲何人耶且衰年多病大約皆陰虧而陽亢藥性之涼熱俱不受惟與氣血相關者卽以其氣血補之庶能得所滋養以助其生氣故割股者每有奇效不必更謂至誠感神別有默佑之者也或者曰人子以順親爲孝苟當卧病時知吾子割股以醫我勢必至心悸而病轉劇是又不然試思侍疾者目不交睫脅不沾席衣不

敬鄉筆述卷五

三

長春書屋

解帶或至冒寒暑遠道延醫何在爲親心所安者將並置之而不爲乎况從來割股者皆不使人知吾親又烏從知之至謂割股或不免戕生戕生者非孝是又未知於髓髀之處割寸許之肉萬不至戕其生也傳聞乃更有割肝者則必不可矣而韓文公獨力斥之其亦有說當其時憲宗迎佛骨入禁中旣又送之遍歷諸寺愚民無知不惜燒頂焚指以爲供養男女雜沓敗俗傷風安知無爲親祈福惑於佛法捨身之說而毀傷其肢體以斷臂爛身爲盡孝者文公之論所謂大其防以杜其漸

也豈得泥而視之不深體夫人子萬不得已之苦衷哉  
及門曹子星階名寯升弱冠遊於庠天資明敏生有至  
性而體素弱有腹疾光緒元年春父病篤舉室皇皇罔  
知所措一日病忽愈人皆驚喜星階則手足若拘攣者  
詢之以顛踣致傷對旣而察知其故蓋前一夕刲股及  
臂凡七處和藥煎之以進也其創旋亦漸愈乃閱一月  
父病復發卒不起星階盡哀盡禮苦塊中腹疾不時作  
遂成痼疾至光緒七年夏卒年二十有八同里約舉其  
孝行及刲股事上之當路援例得旌論者或目爲愚孝

敬鄉筆述卷五

四

長春書屋

非儒者所宜爲而余心滋感矣爰書以質諸天下後世  
之侍親疾者案星階茂才卽星槎太史寯瀛之胞弟伯  
仲與余爲先後同門錄存吾師此辨以俟異日再修邑  
志采擇爲之立傳卽此文亦應載入藝文志也

張孝子淦

香吟師碧琅玕館詩鈔有張孝子詩序云孝子名淦字  
德華吾師書田先生次子也性純篤夙以孝聞隨侍延  
慶州學署年僅三十有一而卒其卒也爲母病禱天減  
日算以增母壽減算之說儒者弗道但人子愛親之心

有加無已如以理所必無少有轉念是孝有時而窮抑亦得以自寬矣夢帝錫齡載之於禮雖孝與慈有閒要無事訓詁家紛紛聚訟也詩曰孝子死矣驚傳鄰里還視東齋風淒似水漬血在地厯厯可指見者詫之皆莫知所以三解繫維母病積時未痊誓以身代天也無言稽首泣訴額血斑斑深入地者寸許拭之而愈鮮四解

孝子事父能爲子孝子事母則兼女阿姊云亡如未亡天留缺陷人能補日共笑言夜視寢處古有黃香君真其伍六解虔祝遐齡春暉滿庭如何母氏目繫賈廷琳案繫當

敬鄉筆述卷五

五

長春書局

依津門徵獻詩作翳忽生日視湯藥憂心靡寧呼之必在更無他營其目不交睫者每竟夕視無形且聽無聲而母目復明七解詩共八解謹錄四章吾師文鈔並有張孝子傳孝子事實詳直督張敬達公樹聲奏疏已於光緒八年得旌矣文珊司馬津門徵獻詩緘齋雜識備載焉茲不具錄特舉以表章之以俟再修邑志列入孝行

胡孝子柄泰

碧琅玕館詩鈔又有詠胡孝子詩嗚呼胡孝子母生亦生死亦死將以激澆風驚傳遍閭里事母非徒備甘旨

母夙畏雷聲孝子望雲疾歸視母性重周親孝子濟人  
幾忘已胡爲母病竟不起孝子哀號號不已抱此孺子  
心何暇裁以禮相從地下而已矣嗚呼胡孝子又記聞  
類編有胡孝子傳孝子名柄泰字小帆秉性純篤淪隱  
自甘母氏矢柏舟節孝子侍奉不離左右凡起居飲食  
疾痛疴癢莫不維持調護或有拂鬱意必多方將順得  
歡心而後已同治癸酉春孝子年已四十有五母氏春  
秋逾八旬忽遘疾大漸孝子延醫請禱殫竭心神無何  
母卒孝子竭蹶營斂偏若不甚哀號者距母死五日妻  
孀莫之知孝子竟仰藥死矣時同治十二年三月晦也  
嗟呼黃泉相見母子如初性何至也事抑奇矣我獨惜  
其格於例不得旌而其以身殉母之苦衷有可爲世之  
薄於孝者勸案此傳敘孝子素行甚詳文珊司馬津門  
徵獻詩備載焉茲節錄其要以表章之以俟再修邑志  
列入孝行

書趙錫朋死事

碧琅玕館文鈔又有書趙錫朋死事一則趙生名錫朋  
天津城北人幼失學習弓馬應童子試胞弟錫九始就

傳聘族中疏屬之伯父行爲句讀師師徒宿塾中別爲一院一日生在外聞家中不戒於火疾馳歸見家塾適在火中度老弱不能自脫冒火直入少頃負其弟出遍體爲火所灼不自覺眾亦未暇問也第見釋弟於地反身一躍煙焰迷漫莫辨其得入與否眾譁然望之不見其出而火勢愈盛約逾一二刻始竭蹶從屋後短垣出負其師不釋手纔及地卽悶絕矣久之復甦火亦旋息越日生及弟先後死師始起而能言乃備述其迷不得出火中奔突之狀嗚呼義矣抑何其烈也夫以勢甚燎

敬鄉筆述卷五

七

長春書屋

原不可嚮邇之時使第隨眾撤垣激水踴躍其間及事後生者自生死者自死亦未必有以不死責之者然而五夜捫心必悔恨以眾人自處未能竭吾心力視天下無不可回之患氣吾身無不可蹈之危機此心不死當汗出浹背有不堪爲人者矣况當負其弟與師而出也儻邀如天之福共獲生全以延其命此亦事所或然理所當然者烏得預謂其必不可爲致令倫常之地遇變而窮於術徒付之無可如何而抱憾終身哉當路者請於朝而旌之子爰爲泚筆書之案趙君錫朋冒火一入

再入救其弟復救其師身蹈危險純率天性利害死生皆不遑計其義洵爲人所難能也因錄此文以表章之以俟再修邑志采擇爲之立傳列入義行

### 金剛愍本籍建立專祠

續邑志金念直觀察光飭忠節有傳傳未敘特旨照布政使陣亡例議卹入祀京師昭忠祠並本籍及陣亡地方昭忠祠又於壽州建立專祠予諡剛愍本傳止此未及本籍建立專祠一節本籍專祠蓋允漕督袁甲三之請也咸豐十年庚申袁端敏疏稱故員金光飭歷任牧

### 敬鄉筆述卷五

八  
長春書屋

令輿誦攸歸力保危城武功尤著茲據光飭親族田履安郭耐等稟請援案於故員原籍天津建立專祠隨同陣亡之勇目六品頂翎呂祥邱常六品軍功章貴黃悅祁視祁和周洪姚山等八人一併附祀並請將故員之祖父與祖母胡氏父鎔母田氏賞給二品封典以勵忠貞而維風化奉旨允准施行案金觀察本傳未敘本籍建祠未免疏略况旣建專祠尤應徵信於後爰就金氏所存全卷稿件摘要錄出嗣閱華文冊緘齋雜識亦錄袁端敏奏疏並載同治元年壬戌二月賜祭一壇七年

戊辰七月賜祭一壇文珊司馬謂於邸報中詳載者錄之歷觀聖恩高厚追念故員身後疊膺曠典是皆光筋傳中所宜備書以昭哀榮者也

金剛愍眷屬蘇城殉難

剛愍公本籍建立專祠光緒十七年經觀察族人金玉雯於城內石橋街路東住宅之南建成稟懇直督爵閣部堂李奏請立案列入祀典余因得見金氏所存全卷文稿始悉剛愍公眷屬在蘇殉難事蘇撫吳中丞元炳會奏摺稿清單內開候選直隸州知州金厚增直隸天

敬鄉筆述卷五

九

長春書屋

津縣人以上外籍官紳一員請照陣亡例賜卹仍入該縣總祠總坊二品封典原任江南睢寧縣知縣金鎔之妻田氏按察使銜記名道安徽廬州府知府金光筋之次女金全姑候選直隸州知州金厚增之妻金葉氏民人金守箴之長女金領姑次女金愛姑俱直隸天津縣人以上婦女五口均請照奏章賜卹仍入該縣總祠總坊光緒五年閏三月二十八日會奏奉旨均著照所請分別旌卹單併發欽此案金刺史厚增卽剛愍公子也咸豐十一年四月粵匪陷蘇城日

高凌雯案蘇州失守係咸豐十年四月此



作十一 巷戰陣亡暨眷屬殉難續志未載爰摘錄蘇撫  
年誤 吳中丞會奏清單於冊以俟再修邑志分別立傳載入

### 陳遊戎毅

華梅莊學博米齋札記吾津俗習強悍生斯土者率多  
忠勇之士計歿於王事者共二十餘人而事蹟無攷者  
不與焉案米齋札記自明嘉靖敘至國朝同治二年共  
二十餘人死事者皆文武職官也內載咸豐八年大沽  
之役陣亡者陳遊擊毅常千總榮魁趙千總國璧檢閱  
續邑志忠節傳後附咸豐八年四月八日海口陣亡各

### 敬鄉筆述卷五

十 長春書屋

員甄河遊擊沙春元千總李塘石振岡常榮魁趙國璧  
較札記多沙李石三人而無陳遊戎惟續志所記不皆  
津人觀後載同治二年六月十五日山東臨清之役陣  
亡各員姓名於下特注以上六員俱天津縣人可證且  
此條所記姓名人數與米齋札記無異以此證之沙李  
石三員當非吾津人而陳遊戎毅不知何以遺略統觀  
札記歷敘文武各員皆有可攷况梅莊學博有事蹟無  
攷者不與焉之語必知詳審而後載也爰照錄存俟再  
攷詢

賈廷琳案夏忻中西紀事所載大沽殉難共  
十二人內游擊沙春元署游擊陳毅經制外  
委石振岡與米齋札記及天津續志同又把  
總李瑩當卽續志所載之千總李墉而常榮  
魁趙國璧二人則殉難十二人內無其名未  
詳何故又載西人月報大沽武弁之忠勇外  
國一人亦心慕之礮臺失陷之時有四品頂戴  
二人一人執旗自刎意指沙陳二游擊也云  
云錄此以  
備攷核

敬鄉筆述卷五

十一  
長春書屋

誦芬彙錄附存

誦芬彙錄鑿於諸家詩鈔筆紀見有上代詩章  
暨名人題贈詩句謹彙錄存尙冀續見上代之  
詩編作一集

喜雪詩用禁體

國朝畿輔詩傳載先曾伯祖春卿公喜雪用禁體七古  
一首詩云幾年歲歉冬無雪九十寒威吹土裂今年麥  
隴又塵生何處農人不愁絕元陰忽作天地荒靜夜如  
聞松竹折攬衣未敢意紛披執火初然見明滅就觀砌

敬鄉筆述卷五

十三

長春書屋

下已深深仰視簷前方屑屑旋將嘉兆慶桑麻預信豐  
年恣口舌平明踐素出通衢近午衝寒尋嶺嶼郭外春  
萌彭澤田山間陽起仇池穴恨無綠萼鬪新輝祇有清  
辭追古哲歐陽近體一爲之白戰何曾持寸鐵謹案津  
門詩鈔徐金楷字端叔號春卿乾隆戊午科副榜著有  
步青堂餘草又云春卿先生少年英俊文名推一時青  
雲自許以中副車憤惋而卒同邑青規居士丁時顯與  
公爲文字至交俱早折鑿見詩鈔所載獨無喜雪一首  
知陶島薌先生蓋從春卿公詩集選出詩傳前列所選

詩集名目共五百餘種內有步青堂餘草也鑾甫弱冠知有此集之名迄未得見想早經散佚矣

### 詠貞烈殷氏詩

彤管流芳專輓貞烈殷氏之作劉府尊君成彙爲一集刊而傳之者也殷女年十六邢氏構媒誑其母娶爲婦入門以穢行逼焉母聞之抱恨死氏益孤堅自矢姑嫂備極慘虐加以炮烙之刑終不屈事聞於府剖於縣氏垂歿究無一言自表則可謂貞烈矣時在乾隆七年一時文人墨客歌詠其事甚夥鑾見津門詩鈔亦多採入

### 敬鄉筆述卷五

三

長春書局

曾伯祖春卿公貞烈殷氏行七古一首與焉嗣見華文珊司馬緘齋雜識詳列集中輓殷氏作者姓字見有先曾叔祖雲茂公並知文珊司馬藏有彤管流芳詩集因向聽橋二尹借閱內載雲茂公五律二首謹照錄出詩云聖化洽皋瀕閩流亦自珍守閑同白屋建節及青春沸鼎無遷避鎔金豈逡巡壯夫如此少憑弔幾酸辛次云奇遭泣比鄰五馬訊根因不敢勞明問猶思諱所親委衾安大化舉手謝時人沒世名應遠旌書下紫宸先曾叔祖雲茂公

國松

乾隆六年辛酉科舉人見續志選

舉錄二詩於此僅見

金芳舟圖照題句

華少梅茂才脞錄金芳舟先生性嗜琴曾繪圖照一幀  
題詠甚夥特將邑前輩題句錄出鑿於題句得王觀濤  
侍御五古一首俞厚安軍門七絕一首已另錄存並見  
有先曾叔祖面堂潞城公汝槐七絕一首詩云流水高  
山寫素心伯牙應歎得知音而今兀坐長松下膝上猶  
橫太古琴又先曾叔祖永菴贈資政公齡椿七絕一首  
詩云十里雲林白日陰焦桐靜撫意何深懸知斯世無

敬鄉筆述卷五

西

長春書屋

鍾子故向幽巖寫素心先曾叔祖潞城公乾隆十七年  
壬申恩科舉人山西潞城縣知縣見續志選舉錄贈資  
政公卽先叔祖晴圃公封翁也二公詩於此僅見謹照  
錄於冊

碩德耆年會詩

周南橋別駕耆飲昇平冊有先曾祖德謙贈榮祿公之  
柄五律二首詩云尙齒兼崇德由來此會稀君能敦古  
處予亦攬餘徽竟日聆高論隨時見道機所慙實未副  
杖履許相依在昔香山會曾參六秩人共分履道席偕

醉洛陽春故事前賢龔遺蹤此日新相期卅載後常願  
奉音塵詩後注云南橋先生邀予入碩德耆年會自顧  
年未及而德無聞乃能預茲盛事慙慙之餘有深幸焉  
賦此答意鬢髮齡時嘗聞上輩談先曾祖列武庠與俞  
厚安軍門爲至親同習騎射皆嫻吟詠未聞著有詩稿  
二律實於此冊僅見想同厚安軍門詩皆不多作也

竹溪泛權圖題句

脞錄又載竹溪泛權圖一幀偶於書肆見之幀端邑前  
輩題句頗夥錄存一二云云變見內有先叔祖晴圃公

敬鄉筆述卷五

五

長春書屋

七絕二首謹照錄出詩云竹林深處繫輕舟水色天光  
澹沲秋獨倚一竿無限思濠梁逸興武陵遊澄懷恬澹  
契幽閒翠竹蒼葭水一灣知是江南垂釣客秋風鱸膾  
憶鄉關案津門詩鈔載有晴圃公嶽麓書院題壁七律  
八首曩聞晴圃公著有吟香書屋詩鈔變未之見僅見  
刊本吟香書屋奏疏十六卷高凌雯案吟香書屋當作  
書室十六卷當作八卷  
詩鈔想當日未刻變於脞錄所載二圖得見兩代之詩  
且曾叔祖二公詩句更屬創見實爲厚幸也

張船山題從軍圖詩

張船山太守問陶船山詩草有題徐晴圃閣讀從軍圖  
七律一首詩云青山影裏見弓旌想像從戎萬里情難  
向承平求猛士能懷雄略讓書生陰符那用埋頭讀露  
布爭看倚馬成我聽鏡歌亦回首草間狐兔莫縱橫謹  
案墨經從軍圖作一長卷卷端有那文毅公彥成書從  
軍圖三大字綴有跋語憶在嘉慶四年偕晴圃五弟子  
役川陝馳驅萬山之中曾以五千兵禦賊五萬於鎮安  
惟晴圃言笑自如以此相器重而交以成及今三十餘  
年矣各冉冉老載展此圖得無慨然因題一絕少小從

敬鄉筆述卷五

六

長春書日屋

戎意氣間金戈鐵馬萬重山披圖此日都陳迹翻作諸  
侯壁上觀卷中吳山尊鼎一序鮑雙五桂星一贊其他  
題句如姚姬傳孫淵如石琢堂蔣笙陔盧南石百菊溪  
英煦堂賈廷琳案英煦堂似當作英煦齋陳秋舫姚秋農陳芝楣名作

林立有數十家之多皆一時名公巨卿高材績學之彥  
詩文墨蹟俱不易得允足寶貴卷末晴圃公自識云嘉  
慶四年己未秋八月予時讀禮津門適大司空那繹堂  
先生奉命督師陝右奏令隨往九月馳抵西安計從事  
行間遍歷秦嶺終南及隴西階文平陰諸境凡八閱月

庚申夏五差竣言旋迴憶師律之整嚴山谿之險峻宛在目前癸亥秋倩海豐李桐圃爲予寫照越年沈青來表仲補繪成圖非敢以戎馬告勞也聊作軍行紀事云爾甲子六月圖卷已成巨軸函以檀匣裹以錦袱爲鑾嫡堂弟漢澄大令士鑿所寶藏也

謹案圖卷內張船山太守詩起二句作青山影裏望弓旌想見從戎萬里情首句原寫作露弓旌必因第六句有露布字樣將露字點去旁注望字又難向承平求猛士句卷中作求猛將今

敬鄉筆述卷五

七

長春書屋

閱刻本改筆可稱斟酌盡善矣名家傳作推敲一字不苟於此可見

沈存圃明府紅葉和韻

沈存圃明府峻欣遇齋詩集蠡軒集紅葉和徐朗齋五律詩云何事怨春風依然有落紅影分籬下菊愁伴井邊桐古驛疏煙外寒山夕照中莫憑題句好溝水自西東又簡徐午園朗齋兄弟七絕二首詩云坐破繩牀嬾出門偶因行藥到前村客來不見人如玉小疊紅箋剩墨痕玉臺佳句邁黃初瘦盡東陽恐不如他日思君當



載酒紫荆花下擁殘書午園公輝爲鑾堂伯祖乾隆甲午科舉人官至江西高安縣知縣續邑志循吏有傳未聞著有詩集想早經散佚矣先大父贈榮祿公字朗齋諱煇乾隆癸卯科副榜續邑志文苑有傳著有朗齋詩文集

又寄德化尹詩

又瀋餘集寄德化尹徐蘊齋七律詩云君訪開先漱玉亭當年遊屐我曾經難隨湖上仙人舄且伴天邊處士星治譜不妨雲外寄琴聲可許夢中聽遙知退食相思

敬鄉筆述卷五

六

長春書屋

切萬疊寒山照眼青蘊齋公爲鑾堂叔祖續邑志例貢徐然字蘊齋廩生由膳錄議敘任江西萬安縣縣丞官至德化縣知縣蘊齋公同午園公當日必皆能詩然亦未聞著有詩集

長夏漫興七絕一首

津門詩鈔華春浦明府蘭小傳春浦先生與徐公朗齋齊公秋帆沈公東巖張公嘯厓同時唱和鑾記弱冠時嘗聞先胞叔竹士公云先大父性嗜吟詠與沈東巖孝廉存圃明府兄弟相酬唱著有朗齋詩文集以僅中副

車憤鬱而卒所著詩文集曾託舊姻沈氏記似守琴表兄瑛之上代

非存圃先生族也先攜至江西付梓嗣沈翁宦迹轉徙山川脩沮

音問罕通此稿遂不知遺失何處先叔父每談及之輒

以為終身憾事迨鑿歸里後重讀津門詩鈔見華春浦

明府小傳既謂先大父與諸鄉先輩同時唱和又於沈

存圃明府詩集中見有和韻及柬先大父詩是先大父

姓字疊見詩鈔而竟無詩章載入回憶先叔父之言未

嘗不中心感喟也先是漢澄弟士鑿敬檢遺書曾於先

大父手鈔文選冊中得素紙手書七律一首為戲贈友

敬鄉筆述卷五

九 長春書屋

人之作靜心尋繹實有所因然命意所在難以臆斷故

不敢錄什襲珍藏謹存手澤而已當檢得此詩之時尙

有寸寬仿紙一條折疊另一葉內書有七絕廿八字云

一桁湘簾漾篆煙綠陰庭院日長天攤書淨几添清課

細讀南華內外篇後書長夏漫興雖未著有名字紙色

墨色與前詩相同證以大父所鈔文選筆迹絲毫不爽

士鑿與鑾逐字互證悉心核對確是先大父遺詩謹照

錄存不勝悅幸尙冀吾邑舊姻世誼文士詩人見鑾上

代名號有題圖書扇等作與夫酬唱詩箋照錄見貽予

小子頂感雅意盛情實無既矣

敬鄉筆述卷五

三

長春書屋

敬鄉筆述卷六

天津徐士鑾沅青輯

周節烈龍氏

續邑志列女傳龍氏河南汝寧府知府圖耀女

高凌雯案圖耀

當作羅續

庠生周鼎妻鼎疾氏刲股和藥不瘳及卒氏

自縊於柩側家人救甦氏哀泣不已淚盡繼以血月餘絕粒而亡乾隆二十六年學使金公德瑛給匾旌之二長自邵邑庠生次自邠官高州府通判余見耆飲昇平册於續志攷查南橋別駕得見龍氏之傳知別駕卽

敬鄉筆述卷六

一

長春書局

大迂先生胞弟乃歎伯仲兩邑賢出自龍氏賢母也又於舊邑志見例貢載有龍圖躍名下注河南汝寧府知府居官有聲因思舊志特注居官有聲四字必確知其爲太守之賢者若然龍氏實爲賢太守之女於以見有賢父乃有此賢女也節烈周母於二子成立日得蒙學使給匾褒旌又以子貴顯膺封典而邑志有傳其事其人允足千古矣余見周節烈龍氏父賢而二子皆賢爰掇述梗概以表章之文珊司馬津門徵獻詩成於續邑志之前未見龍氏之傳若有所見自必入詠也

樊節烈王氏

袁穀廉大令遂懷堂詩集有詠天津樊烈婦五古一首  
詩云世無劉中壘誰記節烈婦烈婦王氏女樊門奉箕  
帚夫壻名景恆德器孝兼友晨織蘇蕙機夕春孟光曰  
賢聲遍閭黨贊歎及姑舅相期宜子孫伉儷占无咎不  
圖兩髦髻龍蛇厄陽九烈婦泣籲天請代減妾壽妾身  
無重輕郎身有父母玉樓符已召那得遷延久化鶴與  
驂鸞誓必隨其後勺漿不下喉金環已入口腸中轉車  
輪有如飲鴆酒六親盡驚訊惜此姬姜偶謂婦盛年華

敬鄉筆述卷六

二

長春書屋

青燈可獨守胡爲自戕生刀斷連絲藕新婦再拜言多  
謝意誠厚三良昔從死篇什聖人取女子殉所天大義  
豈可負黃泉骨早埋碧血心堪剖是時天地黑悲風撼  
戶牖三日屍猶香精魂貫星斗津門十萬家望空欲稽  
首煌煌綽楔旌芳名勒瓊玖作歌告輜軒此歌置座右  
滄桑或變遷烈婦永不朽案節烈王氏爲前湖北蘄水  
縣丞樊文卿貳尹彬冢男月槎上舍景恆之婦也續邑  
志有傳文珊司馬津門徵獻詩所載樊烈婦傳暨徵詩  
啟並有數家輓詩今讀袁大令五古一章可謂情真語

摯敘事尤明爽如話表章節烈允傳不朽矣

### 王孝烈湯氏

袁穀廉大令哀忠集載前浙江樂清協副將雨生湯公名貽汾江蘇武進人寓居金陵辦防堵事宜咸豐三年二月初十日城破殉節次女嫁王氏歸省在家亦投塘死有七絕二首輓之其次云曾讀離騷拜左徒雙清池比莫愁湖投塘愛女同攜去留得冰心映玉壺又梁敬叔觀察恭辰勸戒七錄載烈婦湯氏婦名嘉名爲雨生都督女工詩畫適某貳尹方北上依父居金陵癸丑春

### 敬鄉筆述卷六

三

長春書屋

賊逼城父促家人走婦獨不忍去既而父躍池死婦從其遺命藁瘞之乃亦赴水死案哀忠集所云嫁王氏勸

戒錄所云適某貳尹卽吾邑前廣東雷州府

賈廷琳案府上當有

知字王鶴舟太守第三子瀛之婦也嗣閩將蒞生墨林今

話續編湯樂民名祿名雨生師第四子克承家學善畫白描銀鈎鐵畫雅近李龍眠妹嘉名字碧春王鶴舟太守子婦工白描人物據是以觀知孝烈兼工詩畫也攷續邑志王孝烈湯氏已經載入有小傳似未甚詳爰彙錄所見以表章之傳中作陽湖人與哀忠集作武進人

異檢視湯貞愍公琴隱園詩集固作武進人也哀忠集  
稱公次女文珊司馬臧齋雜識作雨生都督第四女互  
異俟攷

賈廷琳案王孝烈湯嘉名女士有題唐孝女  
惠觀梅花小像詩四首惠觀爲唐確慎公鑑  
之父母病曾割左腕肉以進母愈孝女尋逝  
詩見割臂贈言今附錄於此以備津邑人士  
采擇焉紅閨生小慣嬌癡獨行偏傳絕妙辭  
千古綱常餘我輩世間原自有男兒射雀爭  
看百兩迎嫁衣黃竹忽塵生縱教消盡人間  
福何似千秋不朽名早拚兒命代添壽忍背  
神前自禱求容易芳魂香國住一誠抵得幾  
生修雨花臺畔女郎墳綽楔峩峩遠近聞合  
種梅花三萬樹編  
衣仙佩共芳芬

敬鄉筆述卷六

四

長春書屋

鄭節烈劉氏

附記設立採訪局

津門古文所見錄附載鄭烈婦傳烈婦田家嘴劉紹棠  
女幼許字大沽鄭起之子廣義廣義八歲股生疽十年  
不愈而益劇鄭起知其子年不能永也致意婦家請絕  
婚父母皆允矣以語婦婦曰許嫁而死猶當守之況未  
死乎病廢命也宜令其速娶女將侍疾固勸之不可卒  
歸鄭廣義病不能人性尤乖戾屢撻婦婦燂湯敷藥抑  
搔扶持十年如一日無怨無倦無悔又善承舅姑歡其  
舅亦嘗對人道婦賢無何廣義死其舅素操舟以輪舶

暢行入不逮出且將別立嗣風婦使改適婦泣不答衣  
縞飯糗若將終身服既闕姑使歸寘陰囑父母爲勸嫁  
父母避之果勸以乏嗣無可守小家不必拘婦不應勸  
之亟乃曰女歸時豈不知壻病廢且瀕死者今改志何  
若初不歸女生爲鄭家婦死爲鄭家鬼請從此逝女不  
復來矣遂返其舅竟爲之議婚迎有期始告之曰我夫  
婦老且貧汝又無嗣我二人百歲後汝將焉託服未闕  
嘉汝志不汝奪也今已爲汝擇安樂所元夕後來迎汝  
汝其勿再執拗以自誤婦不言亦無愠意舅姑喜甚不

敬鄉筆述卷六

五

長春書屋

疑其有他元夕屆婦沐浴更衣履談笑如常晚俟舅姑  
寢仰藥卒姑微聞聲起視之已僵矣面如生衣服無少  
汙年三十三歲光緒十一年正月十六日也案鄭烈婦  
傳後有邑人華樂農景安識語此傳爲故城柴孝廉青  
蒸讓氏卒同里士民臚列事實籲求吳軍門殿元轉稟  
李爵相奏請旌表奉旨允准余見樂農所記知係奏案  
亟詢採訪局當日果未來報當錄鄭烈婦簡明事實屬  
局記册商諸紳董爲鄭節烈劉氏設位節孝祠爰就傳  
中掇述其要以表章之



謹案郡城採訪局光緒元年乙亥邑紳前浙江  
布政使沈兆雲稟請彙題請旌經督部堂李奏  
明奉旨允准初設局時一年稟請一次近改二  
年一次逕稟府署轉詳每次人數總在二百名  
外局在會文書院局事卽由書院紳董管理帳

房司事兼理冊籍稿案

丁酉冬月記

楊孝烈張氏 附徵詩文啟

樂亭史香厓先生夢蘭爾爾書屋詩草有天津楊孝烈  
張氏輓辭一首詩云郎無子女妾有尊章郎今已矣尊

敬鄉筆述卷六 六

長春春書屋

章在堂尊章在堂年已邁子死二老將奚賴欲殉不殉  
心徬徨恐節無虧孝或礙阿翁痛子中道徂阿姑咀痛  
稱孀姑黃鵠歌中鵠並寡青鸞鏡裏鸞同孤蟲聲咽寒  
砌燈影暗空幙與姑同室形影俱姑心無恫妾心娛甘  
旨供罔缺杖履親爲扶病侍湯藥歿殯葬十年拮据手  
口瘡昔未殉夫爲事姑今姑又逝復奚圖甘心絕粒辦  
一死殉夫殉姑無差殊况以婦職代子職黃泉相聚應  
歡呼南國有貞姬東海有孝婦誰則節全孝復全惟有  
斯人兩無負案楊孝烈張氏爲吾香吟師嫡堂姪婦師

命作小啟以徵題詠一時徵詩甚夥尙未彙梓今閱爾  
爾書屋詩草載有輓楊孝烈詩因亟錄出並將拙作小  
啟附錄於後俟異日再修邑志者采擇爲之立傳楊孝  
烈已得旌矣

楊孝烈張安人徵詩文啟

蓋惟女貞木秀閱風雪而始華旌節花榮麗日星而  
並耀以故顯桓嫠之行義閭表芳徽崇巴婦之懷清  
臺彰淑德褒揚懿美闡發幽微允堪永式儀型潛維  
風化矣况夫操持自矢習染不移死效甘心全節且

敬鄉筆述卷六

七

長春書屋

兼全孝誓酬結髮殉姑仍卽殉夫慷慨捐軀從容畢  
命更可哀也良足述焉則有待旌節孝楊母張安人  
者太學生楊葆廉之妻庠生張麗生之女也幼奉母  
儀長通女訓柔嘉稟度芬蕙翔聲慧性三生悟拈花  
之夙業靈心四映媼詠絮之清才問名則僉美淑姬  
擇配則皆稱嘉耦同爲望族爰結良姻迨梅訊之先  
通正桃夭之已屆珠聯璧合載賡之子于歸玉潤金  
和競道彼姝靜好調羹洗手舉案齊眉怡柔以悅尊  
嫜謙抑以和娣姒雞鳴警旦不牽兒女私情鵬展摩

霄且勛丈夫壯志雖芙蓉連理吉夢無徵而萱草宜  
男韶齡可恃唱隨共樂伉儷無乖相將菽水歡承共  
堂前而戲綵豈意藁礎數盡歸地下以脩文易簣悲  
銜撫棺慟絕三辰莫告一死靡他身視毛輕防迭勞  
夫婢媪淚隨聲下勸倍亟於翁姑若決同歸益親懷  
之莫慰暫教獨活洵婦職之宜完於焉首則簪蒿心  
如集蓼晝勤澣濯夜亟縫紉茶苦幾經鞠凶又降翁  
遽長辭於塵世卽應先逝於冥途死者相逢生者何  
恤姑嗟影隻婦痛形單認梁燕之孤飛聲聞長歎聽

敬鄉筆述卷六

八

長春書屋

砌蛩之碎語意觸同悲而安人力抑哀傷強爲歡笑  
膳謀甘旨晨昏必請加餐衣問煖寒昕夕不遑安寢  
形容蕉頰瞬息十年筋力薪勞眎如一日無何姑嬰  
危疾醫鮮良方護持則逐日愁添祈禱則籲天願代  
喘延臘尾盼轉年頭非關續命丹無究係限年素定  
安人姑辛卯撫衣衾而視斂禮盡慎終焚楮帛以感  
元日逝世懷約難忘舊遂乃含哀絕粒視死如飴心比石堅腸  
同雪淨踐盟言於白水尋夫壻於黃泉本來瘦骨支  
離不殊病鶴僅臙柔絲斷續待盡僵蠶當茲菅屨持

喪仍是麻衣赴義

安人正月廿五日完節

吁其烈矣而豈徒哉

兩姓增輝一鄉播美如斯賢媛聿徵世德於文貞得

此完人具見家風之清白今者冰霜操重雨露恩稠

詩采柏舟恰值輪軒使到

二月上旬督學使者按試津郡學校擬公呈請旌

詔頒楓陛行瞻綽楔榮邀有志竟成難能可貴名自

垂於萬古祀當報以千秋然後歎草挺孤芳當疾風

而自勁花留老圃至晚節而彌香也變戚忝葭葦生

同桑梓雖曰見聞較確其如列敘無文敢祈藝苑宗

工騷壇詞伯矜其苦詣錫以華章不吝揮毫相爭題

### 敬鄉筆述卷六

九

長春書屋

句文則篇成錦繡詩則字灑珠璣卽看振藻揚葩揭  
出青燈夙志闡貞表烈傳來黃絹新辭用效引嚶勉

攄佩臆

光緒辛卯二月

張貞孝女蘊仙

附同鄉官公稟稿

江西撫奏稿

蘊仙詩草一册吾邑貞孝女張蘊仙所著也蘊仙爲玉

貞之號蘊仙父號愛樵名棠宦江右有年愛樵女二長

卽玉貞次淑貞子二長文山大令蔭以經歷需次湖南

由軍功擢知縣次渭川參軍夢熊以經歷需次江西皆

蘊仙之弟也蘊仙事父母撫兄弟孝友無閒言幼卽矢

志養親守貞不字父母不能奪性絕慧琴碁書畫稍涉  
獵卽悟其微尤工於詩長篇短什偶播人間見者莫不  
斂手避則蘊仙之才可知矣母先歿毅然任家政井井  
有條事老父始終如一日可謂釁而弁者且爲弁中之  
卓卓可傳者其妹淑貞亦工吟詠余從香吟師架上見  
蘊仙詩草當卽攜來閱之方悉其詳謹就序中撮其大  
要錄存以俟再修邑志采入余無意中見此詩册殆孝  
志貞操有未可以泯滅者詩草有梅州吳秉慈光緒乙  
亥年一序是時文山大令已歿蘊仙父愛樵尙存至愛

敬鄉筆述卷六

十

長春書屋

樵爲江右何官序中未詳詢問邑人無知者香吟師亦  
久不記此册從何處得來矣 余錄存貞孝女節略總  
以未悉張蘊仙家世爲憾時閱年餘矣一日謄真所輯  
稿本適三姪思珍侍側余因指示張貞孝女事思珍曰  
張蘊仙卽遂閒堂張氏族中人也聞已請旌光緒十九  
年始歿余聞之悅甚命其往詢越日攜來蘊仙詩草一  
册旌表貞孝錄一册錄中首列同鄉宦江右者公稟一  
稿並列敘張貞孝女事實又江西巡撫潘偉如中丞壽  
奏稿俱應錄存至前譔節略不必再易亦可並存俟修

志者裁擇爲之立傳所可異者當余見蘊仙詩草時蘊仙已歿謂非孝志貞操未可泯滅默默中有啟余者乎案貞孝女張玉貞歿於光緒十九年三月十三日余既悉其詳告知採訪局並知照張家於二十二年四月二十八日約齊會文書院紳董皆具衣冠送張貞孝女牌位入祠

同鄉官公稟稿 具稟樟樹鎮通判李玉城等爲公報孝女守貞懇請旌表事竊惟我朝孝治之隆化成至廣達乎閭巷爰及閨幃凡懿美之克全皆褒揚所

敬鄉筆述卷六

十一 長春書書屋

必逮乃有爲女盡孝歷久完貞如宦女張玉貞者幼讀孝經長嫻內則諸姑稱其和順三黨式其禮儀本賦性之獨純知事親之爲大人中佼佼已是華年膝下依依猶然孺慕晨昏在側左右無違當夫寇盜紛來室家遠徙弟出門而負米妹遣嫁以分襟女則浣饋必親琴書相伴絜采蘭之養詩補南陔忘樹護之憂畫摹北苑人或謂其雅尙女實將以孝思迨母氏年迫桑榆病辭葠朮乃割臂以利藥輒叩頭而禱天至於瀕危誓以身殉吞金也遇救投繯也復蘇初則

痛不欲生既而幡然變計母去世尙有父存弟悼亡  
誰憐姪幼用是歡承白叟貌瘁青娥但思鳩杖常扶  
不願鵲巢載詠遂矢十年不字之志以報雙親罔極  
之恩迄於堂上考終閨中獨守髮已垂白心原抱丹  
金玉葆身松筠挺節斯可謂之孝矣抑可謂之貞矣  
戚里引爲美談風人傳其軼事某等籍聯直隸官服  
江西屬在梓桑不忍沒其潛德冀邀綸綍俾克播其  
芳聲理合開列事實出具印結公懇憲台俯賜察核  
詳請旌表以彰貞孝而示褒榮謹稟

敬鄉筆述卷六

三

長春書屋

一該孝女張玉貞係直隸天津縣人爲乾隆戊子己  
丑聯捷進士翰林院編修銜河南學政原任宗人府  
主事張虎拜之曾孫女道光辛巳副榜原任江西彭  
澤縣知縣張鳳輝之孫女江西候補縣丞署撫州府  
經歷張棠之長女隨祖父任生於江西

一該孝女生於道光十四年十二月十三日至光緒  
九年計五十歲女生之前夕其父母同夢燈花大如  
車輪髻鬢卽聰穎識字及笄博覽經史能詩文性幽  
靜不出閨闈事父母順意承志朝夕不懈尤慕嬰兒

子及曹娥之爲人矢志不字恆曰罔極之恩長報親之日短不忍離也有來議婚者父母以大義導之女輒曰願侍父母終身若奪初志不願爲人父母不忍強旣而族戚設法勸之女怫然曰是迫我於死也乃絕粒數日一病幾殆父母憐其志遂不許字

一該孝女值逆匪竄擾江西隨父母避居鄉曲常以刀自隨防暴也迨咸豐三年母沈氏卧病女晝夜侍湯藥衣不解帶母病劇女焚香告天割左臂肉和藥以進母卒不起決意以身殉自縊者再皆遇救乘間

敬鄉筆述卷六

三

長春書屋

吞金環得良醫以藥出之竟不死

一該孝女父於光緒七年得病女一如侍母不離左右彌月父歿哀毀骨立送殯後刺血寫金剛經爲父母祈冥福至今持誦弗輟

一該孝女詩學唐人著有蘊仙詩草芬芳悱惻泣血詞尤孝思肫摯令人不忍卒讀並善鼓琴繪事藉以娛親且寄師古之志父母亡後遂不作詩亦不輕爲人作畫其用意如此

潘中丞片奏稿 再孝女張玉貞籍隸直隸天津人



係原任江西彭澤縣知縣張鳳輝之孫女前江西候補縣丞署撫州府經歷張棠之長女隨祖父任生於江西該孝女自幼聰慧識字及長涉覽經史能詩文善書畫性情幽靜不出閨闈事父母能順意承志朝夕不懈撫弟妹以成人矢志不嫁避亂鄉曲常操刀懷袖備嘗艱險咸豐三年母病晝夜侍湯藥衣不解帶母病劇焚香告天割臂肉和藥以進母卒不起願以身殉投繯吞金者再皆幸遇救得生光緒七年父病一如侍母時父歿哀毀骨立殯葬盡禮據樟樹鎮

敬鄉筆述卷六

古

長春春書屋

通判李玉城等開具事實冊結呈由藩司邊寶泉具詳請奏前來臣查孝女張玉貞賦性端莊秉資聰穎割臂和藥奇性過人懷刃防身潔清邁等侍奉盡靡依之孝志比金堅平居矢不字之貞操同玉潔洵屬閨門之潛德宜邀曠典之褒揚合無仰懇天恩勅部旌表以闡貞孝而維風化除冊結咨部外謹會同大學士兩江督臣左宗棠江西學政臣陳寶琛附片陳明伏乞聖鑒訓示謹奏案附片於光緒九年六月二十四日會奏七月二十日軍機處奉旨著准其旌表

禮部知道欽此八月初九日遞回原片也

賈廷琳案先師豐城毛實君先生慶蕃撰有博白陳朱二貞女事略册首刊有天津貞孝女史張玉貞題詞七律二首廷琳苦未知張貞孝女史之事實今得此編讀之始獲聞其詳至蘊仙詩草聞今尙有傳本但未知此二詩已載入否姑附錄於此以免遺失博白雙貞事絕奇乾坤正氣屬蛾眉玉臺虛納温家鏡瑤軫剛餘寡女絲慷慨明心文字見淒涼結髮翦刀知千秋一掬蒼梧淚莫賦尋常薄命詞舊話朱陳嫁娶圖名門繼跡合成符空幃獨處心相印大節同操德不孤玉潔冰清雙美聚天荒地老萬緣枯守貞我亦嬰兒子又見聯芳女丈夫

鄭孝烈女凌仙

敬鄉筆述卷六

五

長春書屋

華聽橋二尹鐸孫自粵東幕遊旋津攜有鄭孝烈女徵詩文節略爲徵題詠余分得一紙亟照錄存鄭孝女小字凌仙籍隸天津乃管帶運署綏靖營勇都司銜候補守備鄭騰霄都戎起龍之次女也光緒七年辛巳生於粵自幼至性過人就傳三年習詩書知禮義許字同鄉廣東候補縣丞趙紫封二尹聯綬之胞姪嗣元尙未迎娶母袁恭人先後舉子女五鞠育艱辛孝女念母氏劬勞髫齡卽知經理家政提攜弟妹一如成人迨二十二年三月初八日袁恭人忽患舊疾兼染時症孝女見母

病勢增劇焚香禱天願以身代刲股和藥以進衣不解帶目不交睫水漿不入於口者五晝夜而袁恭人於三月十二日丑刻竟至不起時則親族環集哭聲鼎沸鎗火黯然孝女涕泣哀號肝腸欲裂俄而頸血亂飛上下噴薄眾共驚駭奔救見孝女鬢髮皆殷襟袖爲赤諦視頸上創痕四處並皆深入奄奄一息不絕如縷蓋孝女自刲以殉母矣一時見者慘不忍觀距袁恭人疾終未逾晷刻年甫十有六也嗚呼何其孝且烈哉其事其人並堪千古某等誼關桑梓目覩情形深恐淹沒弗彰用敢開陳事實上塵清聽伏望鴻題或賦詩詞或編傳贊俾流芳百世含笑九泉異日疏達彤廷得邀旌表是則采風者之職也謹誌其大略以備采擇焉據聽橋云同鄉宦粵東者擬聯名具稟公懇大憲題請旌表矣在粵在津所徵詩文並擬彙梓以傳一時邑人題詠者卽有數家余亦題七古一首詩云孝女殉母何其烈七首一揮脰噴血於時未肯遲須臾此志可知早決絕女聞刲股愈病親醫皆束手猶回春女今刲股母竟死恚恨難自容其身君不見漢曹娥父爲迎神沈洪波哭屍不出

敬鄉筆述卷六

去

長春書局

心恚恨身投江水名不磨我道孝女曹娥比案曹娥年十四孝女  
年十  
六  
純率性真行諸已孝女氏鄭名菱仙坊表揚芬光  
梓里拙作不足觀藉附孝烈女以傳異日重修志乘鄭  
孝烈女必應立傳列入者也

節婦崔氏李氏事記

牛次原太僕有周芷囊中丞二妾事記附載津門詩鈔  
余見此記續志藝文未載特爲錄出崔氏李氏周芷囊  
中丞公側室也初中丞因公革職歸里旋奉罰修完縣  
城垣家貲已充帑工未及半中丞卽謝世崔李方盛年

敬鄉筆述卷六

七

長春書屋

無子家人有勸其改適者二氏誓不從遂脫簪珥相與  
守節生平相親猶姊妹時中丞次子婦楊孺人亦年未  
三十而寡有二子於是合志撫孤中丞撫黔時失察屬  
員虧空罰令賠償銀兩本籍僅有舊宅一區沒入於官  
家益貧賃草房數間存身而已米鹽無所出崔李惟長  
齋繡佛絕迹戶庭不入其室則寂若無人入其室恆見  
其勤女紅以之給餽粥供佛香燭而所衣單衫布裙補  
綻幾遍嘗澣濯至再絕無塵垢歲時非中丞至親莫能  
覲其面有時饗食不繼竟日一餐處之晏如無感感容

人以爲有士君子安貧樂道之風莫不異而敬焉卒年皆七十案續志列女載有崔氏李氏合傳卽翦裁此記字句爲之如出修志之手然牛太僕之記固昭然在人目也愚意崔李合傳主此記大意務在簡明於傳末聲敘邑人牛坤爲之記詳藝文卽將此記列入藝文此等文字闡揚苦節理應載入邑志况列女志如梁貞烈女張烈女傳末皆有周太史人麒爲立傳詳藝文之語邑志本有此例也

劉節烈王氏

敬鄉筆述卷六

六

長春書屋

節烈王氏津邑武德佐騎尉職銜劉需卿恩蔭之側室也年十九歲歸劉君劉君家夙豐頻年以經營不利入不逮出轉致虧累悒鬱而歿氏卽仰藥以殉距劉君歿僅半日耳可謂烈矣一時盛傳當詠四詩以彰之詩云感君義氣薄囂塵不愛黃金愛妾身拚卻蛾眉爲君盡芳心肯讓墜樓人背鏡掩泣淚拋梭一病悲君二豎磨續命丹求仙界少斷腸草種世間多總帷淒絕曉風吹正是紅顏畢命時料得驂鸞追跨鶴夜臺從此永相隨不比尋常兒女情儼然大節荷衰旌迦陵有鳥稱同命

了卻今生結再生劉節烈王氏於光緒九年八月二十日殉節年二十五歲已膺旌表矣

### 章節烈王氏

節烈王氏津邑同知銜國學生章尙友文瀾之側室也年十八歲歸章君章君年近古稀以病歿先二年前余於戚好處得識尙友晤必長談故於王氏殉節誤聯輓之且往弔焉聯云後大夫一日而亡想雲中鶴馭稍停好挈昇仙伴跨鳳先巧節三朝以去正天上鵲橋初駕偕看織女會牽牛蓋章君於光緒十年七月初三日逝世王氏親視含斂卽於次日仰藥以殉也歿年三十九歲已膺旌表矣

### 辛節烈王氏

節烈王氏津邑運同銜分發山東候補知縣附貢生辛繡圃榮之側室也繡圃年逾花甲光緒十一年十二月廿六日病歿節烈於十二年正月初八日仰藥以殉先是邑中章節烈王氏殉節繡圃舉以告王安人王安人慨以身許至是果踐前言歿年四十一歲已膺旌表矣繡圃爲余表兄余特撰一聯以輓節烈聯云女子能若

是哉恩報主人翁視斂薦亡不僅十年勤侍奉男兒愧弗如也身殉平日約捐生就義定然兩字荷褒旌聞節烈典質釵珥於初八日延僧誦經超薦主人卽於是日夜殉節可謂從容就義矣吾邑三年中據所知殉節者三人皆側室皆王氏亦一奇也謹誌大略俟修志者采擇分爲立傳

### 李節烈徐氏

節烈徐氏津邑運同銜附貢生李霽林運昌之側室也年十八歲歸李君爲人謙謹端厚有禮法戚黨稱焉霽

### 敬鄉筆述卷六

三

長春書屋

林晚年學書專仿趙松雪曾以所臨天冠山淮西碑等帖屬余跋語並以所書楹聯屏幅墨刻見贈余亦以湖穎徽墨暨所刻書籍報之霽林於光緒十八年三月初九日病歿徐氏於四月初十日絕粒以殉余家同霽林本有姻連又兼世好因撰聯語並輓節烈聯云松雪帖閱臨恪守師承遺翰堪同文敏蓄蕙風香正轉謹隨公去清芬好並晏康傳節烈徐氏歿年三十五歲已膺旌表矣謹誌大略以俟修志者采取立傳

### 門節烈張氏

節烈張氏津邑從九職銜張恩慶之次女也許字隄頭村候選未入流門萬通之第三子世祺光緒十八年張氏年十九歲迎娶過門事翁姑以孝順稱和娣姒以敬謹聞廿二年世祺忽患喘疾綿延三載氏則日汲汲於藥鑪茗盃間寒暑無間每於夜靜籲天願以身代其勤勞憂患者歷三年如一日居常見夫疾不瘳曾露言死願與夫同歸人勸之則曰翁姑尙有子在固無庸予之代盡夫職也膝下無學語兒亦無庸予之兼事父教也再勸之不復辯旣亦不再言二十四年二月初三日世

敬鄉筆述卷六

三

長春書局

祺病歿氏親視含斂訖卽於次日仰藥以殉卒年二十五歲矢死靡他捐生就義斯可謂之節烈矣士紳擬公稟府尊轉詳督憲附片奏請旌表稟稿曾經余脩飾因悉其詳謹掇大要錄存以俟修志者采取立傳

案津邑節烈殉夫者自光緒十二年辛節烈王氏後聞尙有十餘起自十八年李節烈徐氏後又有十餘起且多出於窮檐委巷尤不易得曾詢陳挹爽明府知經報局彙詳請旌其姓氏俱載入冊籍矣



敬鄉筆述目錄

卷七

天津升州爲府

七十二沽說

天津水師始末

春圻臚豫詞摘錄

恩賚耆年

祀竈日期攷異

會文書院建立紀略

敬鄉筆述目錄

義塾建立紀略

燈牌建造棚廠紀略

稽古寺藏經閣燬紀略

並紀稽古書院

津門古文所見錄梓傳

天津總督駱公

天津總鎮王公

附邑人李槐圃總戎

營兵蕭國泰義舉

升任臬司天津道丁公

新建厲壇紀略



名宦建置紀略 附紀公舉善舉義舉建置

卷八

列傳辨證 十三則

選舉錄辨證 九則

貢生例貢辨證 九則

辨證彙紀 十則

著述名目補遺攷證 五則

遂閒堂張氏攷

張笨山舍人

敬鄉筆述目錄

于斯堂查氏攷 二則

查漢客處士昆季

直抒管見 四則

敬鄉筆述卷七

天津徐士鑾沅青輯

天津升州爲府

華梅莊學博米齋札記雍正八年十二月署直隸總督唐執玉疏稱天津直隸州係水陸通衢漕鹽聚泊旗民混淆一切巡察防捕及承辦水師營各項軍功差繁事允請升州爲府附郭置天津縣專理地方事務從之尋定天津新升府曰天津附郭設縣檢閱舊邑志地輿天津自明永樂置衛國朝初因之雍正三年改天津衛爲

敬鄉筆述卷七

一 長春書屋

州將衛原轄一百七十三屯就近併入武清靜海青縣滄州南皮又歸撥武清靜海滄州三州縣地凡二百六十七村莊入天津州九年設天津府改州爲縣永爲畿輔大都會云案舊志所載如此未敘署直督唐執玉疏請升州爲府一節續志亦未攷覈補載爰錄存之俟重修志乘者裁察焉又札記唐執玉江蘇武進人進士雍正七年六月署直隸總督八年十二月疏請天津直隸州升府九年五月請以廣平府知府李梅賓調補天津府以清河縣知縣徐而發調補天津縣檢閱舊志職官

天津府縣皆注雍正九年設知府首李梅賓知縣首徐而發與此符合以此證之唐執玉疏請升州爲府一節地輿志理應載入天津府縣新設亦由署直督唐執玉疏請實缺之府縣調補職官志似應敘明重初任詳始事也梅莊先生記此二則蓋深有意者

### 七十二沽說

續天津縣志載七十二沽說天津有七十二沽之名實只二十一沽曰丁字沽西沽東沽

東沽在審窪見明時審窪元帝廟磬文曰

東沽港村今元帝廟改淨土院

三汶沽小直沽大直沽賈家沽邢家沽

### 敬鄉筆述卷七

二

長春書屋

鹹水沽葛沽元沽草頭沽桃源沽盤沽四里沽鄧善沽郝家沽東泥沽中泥沽西泥沽大沽此二十一沽從西潞河名也西潞河一名西沽河在寶坻者二十九沽曰翦子沽南寨沽五道沽小塔沽又小塔沽王家沽曹家沽葫蘆沽青稗沽于家沽梁家沽貂子沽西魯沽東魯沽菱角沽砭石沽塔沽半截沽大洵沽瑪瑙沽大駱里沽小駱里沽大沽灘沽北李子沽南李子沽八道沽傍道沽西壯沽在甯河者二十二沽曰齊家沽南沽江石沽大麥沽傍道沽捷道沽麥子沽東槐沽中興沽北澗

沽盤沽南澗沽鉤樓沽漢沽馬杓沽李家沽又李家沽  
煙頭沽甯車沽塘兒沽田家沽豐家沽此二縣五十一  
沽從東潞河名也東潞河一名東沽河

案天津舊有七十二沽之名詩人相沿入於歌  
詠所見不僅津人爲然續志載此說必有所本  
然未敘出見自何書攷證者何人實爲憾事

畿輔通志載大直沽在縣東南十里小直沽受羣川之  
流大直沽又在其東南地勢平行羣流漲溢茫無涯涘  
故有大直沽之名方輿紀要小直沽在縣東南雍正志卽宋泥

敬鄉筆述卷七

三

長春書屋

姑政和二年改曰河平謹按縣志今海口有尼姑在小  
直沽東南一百餘里方輿紀要謂尼姑卽小直沽疑誤  
葛沽在縣東六十里雍正志鹹水沽在縣東南六十里卽

古豆子航也

大清一統志

河間之豆子航今鹹水沽是也東

去海四十里

括地志

謹按以上四沽卽縣志所謂海河也

大直沽以東又有賈家沽元沽泥窩卧河白塘口劈地  
口三汊沽四里沽盤沽雙港鄧善沽郝家沽東沽草頭  
沽桃園沽邢家沽上下小沽皆海河所經特因地異名  
耳天津有七十二沽之名今在縣境者實只二十一沽

皆從西路河名也西路河一名西沽河

案以下所載與前說一字無異

不復錄通志於謹案一段後尙有西沽大沽二條亦照錄於後西沽在縣東北納三角

淀之水入直沽

雍正志

河形如丁字故又名丁字沽大沽

口在縣東南一百二十里

大清一統志

河流入海處兩岸壁

立一域中橫土人謂之海門鹹潮抵海門而止

明一統志

案畿輔通志所載大直沽小直沽葛沽鹹水沽

西沽卽丁字沽大沽六條俱見天津縣舊志

續志不復載僅於河渠後附七十二沽說詳閱

通志一名西沽河句下敘在寶坻者至末一名

敬鄉筆述卷七

四

長春書屋

東沽河句與前說一字無異惟敘天津沽名與

前說不盡相同知亦必有所據然亦未敘見自

何書茲並錄存俟再攷證

天津水師始末

嘯亭雜錄載雍正中憲皇帝念津門附近京畿海防綦

重因設滿洲水師都統一員副都統二員其協領下若

千員兵三千名守禦海口以防鯨濤不測之變然滿兵

雖雄健不利水師初設時章程草率所訓練技藝不及

綠營之半乾隆丁亥純皇帝巡幸津甸是日大風海船

逆勢難以施演時都統爲奉義侯英俊年旣衰老復戎裝繁重所傳令俱錯誤而兵丁技藝旣疏隊伍紊亂竟操喧譁不絕上大怒因裁革焉查舊邑志海防雍正四年設天津水師營舊志成於乾隆四年己未彼時水師猶設也再查續邑志海防兵制稱我朝雍正間添設水師河標諸營與總鎮相表裏因時制宜或沿或革檔冊闕如姑就可考者著於篇云云統閱全文水師因何裁撤事在何年皆所不知茲據雜錄所載知裁革在乾隆丁亥蓋乾隆三十二年也

敬鄉筆述卷七

五

長春書局

謹案續邑志恭紀臨幸乾隆三十二年三月上駕蒞天津循覽河隄閱兵於海光寺前幸新城水師營裁汰官軍以是證之雜錄所稱乾隆丁亥裁革水師正相符合續志所紀係據蔣雄甫明經稿本其曰裁汰官軍蓋未悉裁革之詳而修志者於此事更未稽攷僅以或沿或革檔冊闕如敷衍之未免太蹈空矣

春圻臚豫詞摘錄

吳閣學省蘭春圻臚豫詞一冊蓋恭紀乾隆五十九年

甲寅聖駕六巡淀津進呈之作其詞百首皆恭集御製  
詩句其間聖駕至津門數首謹錄存之用誌恩幸詩云  
開元歷五十有九觀象爲乾數合陽曼壽益增體益健  
引懷總是爲民長右第二楊柳青青護水村幾多生計箇  
中存水村也足農桑趣澤共東風到處溫右第四御舫吉  
行旋亦駐水營因以構河干層城十二難爲數東指津  
門迤邐觀右四煙程水驛共徘徊春入平湖鏡欲開煖  
入人家初試網野翁依舊獻魚來右五崇禧古觀枕津  
河祝壽惟祈萬歲多一念純誠昭格本越深願若奉天

敬鄉筆述卷七

六

長春書畫屋

和右五海河常送海潮首香色同參靜且愔途接瀛津  
非遠路金蓮萬朵映瑤林右五重此津門問俗來遙觀  
波影擁蓬萊迎鑾喜氣騰鳧藻萬物春臺果是臺右五  
陽和有腳戴洪鈞河上行宮綠柳循白叟黃童皆抃喜  
太平音裏太平人右五海門東望接扶桑河畔崇祠金  
碧煌兩字鴻章該造物由來皇祖聖恩長右五近海古  
來無海患鏡中朗朗夜珠銜可知海印發光處看取神  
機大不凡右五南北運河清貫中河工誠擅古今功漕  
艘北上斯千庾有繼餘糧後路充右六奉時施惠仰流



鱗老者尤憐命賜銀侍衛囊金例行賞飽籌其腹煖籌  
身右六經過賦免十分三仍與優恩普被湛恩沛宜無

需再沛催科概豁澤均覃右六顏堂借樂在相楹樂向

春臺驗物情研靜甌香閒點筆吉祥雲裏吉祥聲右六

恩優三接例依前卜晝宜須寶炬燃賜以饌應同眾豫

天膏濃處沃心田右六衣冠進退肅無譁獻賦長楊滿

屬車恩撫春箋抽乙乙管城無處不生花右六釜海曾

無薪爨勞化工何物不鈞陶蘆田概與均蠲負好及耕

時潤土膏右七恰如蹕路喜來迎正直平康視所行紫

敬鄉筆述卷七 七 長春書屋

綺朱提頰渥澤行間踴躍倍常情右七晝裏詩中紀往

遊六番廣唱憶從頭兩端問俗觀河要獨有民情戀尙

留右七兆啟文昌壁值辰鳴鑼催緯發通津仙蕙餘葉

詎全落生意原含不盡春右七十七三月小建是

碧偏宜近水亭配藜元氣護揚舸西沽三水匯流處行

館迴看柳墅青右七十八西沽距柳墅行宮十隄頭

以上至南倉蟠螭橫波飲練長乾隆辛卯上命於運河

倉故隄建橋出場河淀七里海蘆關切民依銘實念為

籌引導並儲藏右七十九截漕南糧建北倉是為最要接青

黃民情愛戴今猶切每對南風緬舜皇

右八十 雍正甲辰命建北倉

四十八座存貯南漕今上益宏惠濟

截漕振恤異命屢頒閭閻得早霑恩謹案續邑志恭紀

臨幸乾隆五十九年聖駕蒞天津進北門出東門入行宮越日進東門出北門拈香河北藥王廟駕至鼓樓百姓歡迎擁擠至輦不能行天顏甚霽詔免錢糧十分之三所紀僅此鑿繹詩意此次巡幸天津仍召試諸士暨賜宴恩賞老民想述紀者未悉其詳故闕而不書然可檢長蘆鹽法志畿輔通志參攷之似未可簡率敷衍僅就蔣明經纂稿而錄也余謹摘要錄出既誌恩幸並留備異日攷證云

### 恩賚耆年

長蘆鹽法志盛典乾隆五十年正月初八日恩宴千叟於乾清宮長蘆商人徐永鑑楊伯堦張長庚皆蒙恩入宴賜給徐永鑑賞賚一分御製千叟宴詩一幅如意一柄壽杖一具大緞一匹錦一匹宮綢一匹羽紗二匹貂皮六張絹箋十張福字箋十張湖筆十枝徽墨五錠端硯一方洋煙一瓶鼻煙壺一具大荷包一對小荷包一對楊伯堦賞賚一分御製千叟宴詩一幅如意一柄壽

杖一具貂皮六張錦一匹銀絲茶盤一具鼻煙壺一具  
福字箋十張大緞一聯絹箋十張洋煙一瓶端硯一方  
湖筆二匣荷包一匣張長庚差同以上續志者壽載徐  
永鑑原注以子淵貴封奉直大夫舉人楊伯壩守備張  
長庚乾隆五十年正月八日恩預千叟宴御賜詩章如  
意壽杖錦緞綢紗湖筆端硯所記如此未免太簡略矣  
既不足昭朝廷優渥之恩賚且無以彰我邑人身被之  
寵榮况徐楊張三君蘆商中之耆年者耳一封職一舉  
人一守備荷此殊寵洵曠典異數也不解續志竟未詳  
載余特錄出以表彰之可想見國家富厚盛隆景象案  
徐永鑑卽北山封翁詳見卷一守備張長庚選舉錄武舉  
武進士無其名當是捐職楊伯壩乾隆壬申科副榜丙  
子科舉人榜名秉鐸良鄉縣訓導伯壩預宴並蒙賞賜  
有紀恩詩載長蘆志文藝紀恩詩中

祀竈日期攷

仁和蔣秋吟侍御秋吟詩鈔沽河雜詠詠祀竈詩有二  
十四日歲小除家家祀竈上燈初之句檢閱邑舊志風  
俗二十四日備饌飴祀竈舊志成於乾隆四年彼時仍

敬鄉筆述卷七

九

長春書局

用二十四日蔣秋吟蓋因舊志而詠也續志二十三日祀竈後易桃符門神案續志特書此條正因不同舊志然卻無一語注解因攷畿輔通志援據帝京景物略十二月二十三日以饴劑餅黍饊棗栗胡桃炒豆祀竈君以糟草秣竈君馬謂竈君翌日朝天去云以此觀之自國初帝京祀竈用二十三日畿輔環京久則相率改用二十三日亦情理中事也帝京景物略語極圓通謂竈君翌日上天去則二十三日之祀蓋預祀祀用二十三四兩日均無不合也

敬鄉筆述卷七

十

長春書局

會文書院建立紀略

會文書院專課舉人光緒元年二月由附貢生婁舉信稟懇馬太尊繩武創建考課詳請祝署運司塏轉詳爵閣督憲李允准集捐建立改文學後院聖祠爲講堂又建學舍三楹於西遂請督憲開課嗣應課人數增盛光緒五年復經馬太尊稟請如都轉山會同綱商嚴克寬黃世熙履勘地基就文學後院開拓買民房數處添建房舍一切規模悉備院門北向在倉廩之東至八月二十日懸匾落成每月司道府縣分府輪課應課者計五

六十人會試年分督憲賓興應課多至百餘人二十年來造就人材不少文運振興實賢有司鼓舞之力也爰撥其要記之異日修志例應詳載則有碑記冊籍在

### 義塾建立紀略

會文書院設有義學總塾五處關道憲三塾曰崇正陳子敬觀察欽所立曰崇敬曰崇文黎召民觀察兆棠續立運憲一塾曰會文署運司馬松圃太守繩武所立府尊一塾曰興讓亦馬太守所立皆准貢生婁舉信蘆綱總商嚴克寬稟請也義學分塾分設於城內外者二十

### 敬鄉筆述卷七

七

長春書日屋

處運憲十塾關道憲九塾府尊一塾總塾專收貧寒行文之童已未完篇者分塾則收貧寒幼童蒙童之讀書者至開筆做小講卽改入總塾分塾各有名目人數皆有定額保送者挨次補入法良意美廿餘年來總塾應試之童科歲兩試或進學五六人或四三人雖入泮後例不留塾而有志向上者求良師益友指教並肄業輔仁書院暨問津三取書院考課名登賢書者知己不少矣謂非賢有司作育之力乎爰濡毫樂爲之紀至各義塾之設立始自何年何任則官署具有卷宗在

燈牌建造棚廠紀略

續邑志載院試燈牌爲邑廩生王鏞候選治中華光燁創製每牌五十人按照府取名次排書臨點挨次而入免致擁擠誤名蓋因道光癸卯學使者馮公芝凡頭門外唱名不到者不准補點也光緒初年縣府兩試正場暨外六州縣童生府院試生員院試亦一律備辦光緒乙亥縣試適遇大雨經婁貢生舉信稟明府縣卽在貢院西巡牆外建造棚廠一所寬九間長十八間設有長凳俾應試者坐候點名此後又經改造棚廠廓充可容千餘人棚南爲執事人公所東西房各三間大門南向臨近貢院西轅門以便領燈牌而出舊設西向之大門作爲便門應試者入棚最便也兩次建造俱係情願出貲者自辦始則無擁擠誤點之虞繼更免雨水淋漓之苦洵義舉也爰濡毫紀之

稽古寺藏經閣燬紀略

並紀稽古書院

朱竹垞檢討彝尊曝書亭集天津稽古寺藏經閣記城之西門有稽古寺藏經之閣峙焉地近海多風飛沙晦冥歲久閣圯浮屠含光者新之予艤舟道此登焉夕陽

在衣風鈴鐺然翔鳥上下爲之目曠神怡云云余讀是記重有慨焉光緒十三年以前寺僧非人盜賣香火田地經西城士紳將該僧驅逐集捐將地畝房產贖回於是年秋改爲稽古書院專課經古從十四年春起督院開課甄別以後司道府縣輪課又經天津府汪太尊守正將因案罰款撥入書院發典生息充作經費詎於十八年三月初八日寅刻怪風大作須臾西北方紅光燭天照徹城內傳云鈴鐺閣街板廠不戒於火延燒藏經閣俗稱鈴鐺閣所有閣上檁梁俱向閣心落下不但鄰

敬鄉筆述卷七

三

長春書屋

無所燬卽第一層殿並三門毫無傷損亦可異矣閣上經櫃十六貯藏經全部前一年經書院董事張子笏廣文紳王用霖大令承勳檢查標簽藏於櫃中一旦煨燼殊爲可惜案舊邑志稽古寺在西門外西北隅萬曆七年勅建康熙十八年重建有藏經閣論者謂若仍寺僧住持遇如含光者尙可望其建復今寺已改書院閣燬閱五年矣未聞有議修建者吾邑又少一古蹟未知何日得復舊觀也爰泚筆記之

津門古文所見錄梓傳

津門古文所見錄郭筠孫明府師泰之所輯也先生酷嗜古文每見鄉先輩著作必手錄之積久成帙得文一

百二十四篇

賈廷琳案是書刊於光緒十八年連附錄實共一百二十五篇原凡例總數誤少一

篇故此亦

因之誤作者凡六十一家釐爲四卷筮仕後攜往任

所擬付劄劄以廣其傳旋因粵匪竄擾皖江軍務倥偬不遑及此未幾去官宦橐蕭然賁志以歿迄今閱三十餘年矣先生子喬齡又以清貧如故深憾未能承先人之志因商諸伊之至戚華樂農景安樂農乃稱貸爲刊行之俾鄉先輩著作不致淹沒弗彰且使吾邑後學得見先正典型知所趨步其深情雅誼有足多者豈僅慰筠孫先生之靈於九京也哉余見此集之梓傳也爰濡毫記之

天津總督駱公

敬鄉筆述卷七

古

長春書屋

趙耘菘簷曝雜記載王阮亭池北偶談故明錦衣衛指揮使駱養性崇禎時熊開元姜垞以言事下錦衣獄一夕帝御筆諭養性取二犯絕命養性附奏繳御筆謂言官有罪當明正典刑今以昏夜殺二諫官臣不敢奉命道帝意亦解遂得不死按東華錄養性入本朝順治二



年爲天津總督奏請田賦悉照明代原額其遼餉五百萬新餉九百萬練餉七百三十萬一概刪除得旨允行是時天津尙沿明季設有總督故養性得之而竟能奏免天下二千餘萬之加賦可謂天下陰受其福而不知我國家萬年有道之長實基於此是養性之功不特救熊羆一事也阮亭乃反遺之未免舍其大而誌其細阮亭又謂宋荔裳猶及見之而不言其現任官位蓋已致仕退閒矣檢閱舊邑志職官天津督餉部院駱養性北京錦衣衛人世襲指揮順治元年任次列張忻山東萊州府人進士順治二年任奉裁改部院爲巡撫東華錄謂養性順治二年爲天津總督或奏免加賦在二年未可知也觀駱公此舉天下陰受其福誠爲匪細實在天津督餉部院時爰照錄以傳之

天津總鎮王公

附邑人李槐圃總戎

梁苴鄰南省公餘錄本朝三元乾隆間一錢棨道光初一陳繼昌無人不能舉其名乃有孝廉王某來謁並以硃卷見贈閱其卷首里貫載太高祖玉璽字楚珩又字筠衡中順治辛丑鄉試第一壬辰會試第一廷試亦第

敬鄉筆述卷七

七

長春書屋

一爲之愕然既詳其仕履則武科也仕至天津鎮總兵加都督銜越日某孝廉又以三元公家傳呈閱乃知於前明崇禎間已中武鄉闈第一人入本朝乃棄去重應試此亦科名中一佳話而載筆者未之及故附記之檢閱舊邑志職官天津鎮總兵無三元王公之名舊志於總兵官並引畿輔通志順治初改駐天津府况職官皆有官册可稽必無漏列之理蒞鄰中丞既見王孝廉殊卷又見三元公家傳所述名字科分官階加銜甚詳亦無誤記天津之理當是三元王公簡放天津鎮總兵未

敬鄉筆述卷七

去

長春書屋

曾到任官册無名志書故難載入爰錄存之俟再攷詢續邑志選舉錄武舉乾隆辛酉科李經世名下注解元見進士武進士乾隆乙丑科李經世名下注字槐圃會元殿試一甲第二名侍衛仕至廣西右江鎮總兵余閱至此深爲槐圃總戎惋惜是吾邑不應出此當日若中三元繼美楚珩王公二總戎後先輝映武科中更添一佳話也檢閱人物志武功無李槐圃總戎傳余意槐圃由侍衛仕至總兵其間當不無武功甚冀再有所見可爲槐圃總戎立傳爰附錄王楚珩總戎後以表章之

營兵蕭國泰義舉

米齋札記雍正十三年正月二十六日天津城守營兵丁蕭國泰獨行郊外曠野見有旅客墮驢中風不能言語所帶行李貨物國泰不生覬覦至營房呼喚汎兵同負至古廟中醫治多時復遣人將病者之父史陞公喚到認明衣服等物並銀二百五十兩俱無遺失經李制府衛疏請獎賞奉硃批以匹夫匹婦之愚而能輕財尙義慕善樂施允屬難得於斯足徵風俗向淳之漸覽奏朕懷曷勝愉悅檢閱舊志人物蕭國泰有傳傳末云有

敬鄉筆述卷七

七

長春書屋

司請於朝賚之銀並給匾表之傳中未敘硃批語案米齋札記載此知梅莊學博蓋從雍正硃批諭旨錄出不惟表蕭國泰之義且謹誌天語之褒及風俗也余見舊志續志雜記所載軼事皆無多此事足資觀感舊志雖有蕭國泰傳續志仍可錄入雜記因錄存之同以上駱總督王總鎮二則雜記中俱可載也

升任臬司天津道丁公

香吟師碧琅玕館詩鈔有樂府十二章爲丁樂山觀察作案丁公名壽昌安徽合肥人投筆從戎迭著戰功洊

保道員遇缺題奏按察使公官天津道日多惠政不可  
枚舉謹照錄香吟師樂府十二題以見大概曰神君隄  
嚴河防也曰生佛筏濟水溺也曰哀鴻息振饑民也曰  
黠鼠消伸冤獄也曰萬間厦安流亡也曰一條冰勵清  
廉也曰延冬温施棉衣也曰厲秋肅整軍旅也案公在任仍統  
帶樂字營勇皆公舊部曰皇路坦修北道也曰澤農謳  
開稻田也曰文星耀惠士林也曰彤管揚闡貞烈也曾  
聞師云此十二題當日與梅小樹學博寶璐同作者公  
在任奉父諱旋皖啟行日衣冠祖餞送行者沿途絡繹

敬鄉筆述卷七

六

長春書屋

不絕直至河干舟次公之德政感人舉可見矣服闋來  
津卽補授津海關道旋擢直隸臬司未久疾卒實緣積  
勞所致長才未竟人爭惜之辛巳秋間官紳奉丁公神  
牌入祠祠建東門內石橋巷後河營守備署前吾津建立了公專祠必由

邑紳臚列德政實蹟公懇直督部堂奏請奉旨允准是  
年余甫旋里未悉其詳謹掇要紀之異日修志官署自  
有卷宗可稽也案祠西爲廬陽公所外另設門內則通連

新建厲壇紀略

又碧琅玕館續鈔有厲壇七古一章並序謹將詩序錄

山津邑舊有厲壇廢久矣攷舊邑志載厲壇在城西僅此五字基址久不可尋每歲

奉城隍神出巡必蒞西郊救孤相沿歲丁丑大旱凡就

食流民為分別男女以處之一日不戒於火婦孺死者

二千餘人有司即其地復設厲壇招僧住持歲建醮傳

曰鬼有所歸乃不為厲此厲壇之義也續鈔並有紀災

七古一章亦有序末云東南一廠收養婦孺十二月四

日平旦大風廠中火發司事者不即啟鑰死者二千人

案厲壇在城外東南隅就丁丑婦孺遭焚席廠地基營

建厲壇並造地藏王殿一廟宇也遂名之曰厲壇寺嗣

敬鄉筆述卷七

五 長春書屋

知此壇建於光緒六年為冠九都轉如山倡議者爰摘

錄吾師詩鈔二序及余所攷詢者紀之

名宦建置紀略 附紀公舉善義舉建置

津邑專祠之建有前大學士直隸總督曾文正公祠諱

國藩湖南案祠在院署迤西大王廟旁至建祠年月督

署有卷可稽余在台郡未悉其詳也光緒九年邑紳李

世珍等聯名呈請將原任天津兵備道劉崑圃觀察秉

琳原任天津縣知縣王樸臣明府炳燮二員附祀曾文

正公祠經爵閣督部堂李據呈奏請奉旨允准是年九

月間見諸邸抄者其呈稱劉崑圃觀察潔已愛民政平  
訟理光緒二年直境亢旱竭誠祈禱捐廉助振施衣施  
藥全活饑民無算津郡創設備濟社廣仁堂勸勉紳董  
實力奉行扶正黜邪不避嫌怨稱王樸臣明府講求理  
學賈廷琳案王明府炳燮字聚齋樸臣當是別號江蘇  
元和人著有毋自欺室文集十卷又輯有國朝名臣  
言行錄十六卷廣仁堂均有刊本文教聿興崇儉黜奢風俗丕變救荒  
挑河諸政必躬必親舉辦鄉甲禁暴鋤奸勸善規惡津  
邑强悍之風爲之斂敢採訪節孝建立善堂凡有義舉  
不辭勞瘁以上二員清正廉明閭閻至今感戴云案劉

敬鄉筆述卷七

三

長春書局

觀察湖北進士王明府江蘇進士爰掇述大略紀之督  
署有卷可稽也案曾文正公祠旁  
並建有吳楚公所

案鄉甲局光緒四年王樸臣明府宰津邑時設  
立宣講聖諭廣訓直解城廂內外分設多處於  
廟宇寬廓之地按期宣講總局向設牛痘局備  
上年移會文書院

濟社爲李筱樓主政世珍於光緒二年創立籌  
捐公款生息專爲備荒濟貧嗣是富商善士先

後立有濟生社在湖木  
在大儀門西行諸善事

時有樂助銀錢者所立善社皆稟明官府有案

廣仁堂則規模最大在城外西南隅太平莊為南中善士

捐貲創立者督署有案可稽他若義舉公舉則

有愍忠祠在淄米廠大街祀光緒元年海運委員輪船

撞沈歿於王事者集賢書院在河北獅子林專課外省

暨旗人舉貢生監浙江會館在鄉祠西江蘇會館在倉

廩東由江浙兩省人宦津者集貲主持建立以上

僅紀名目大略實未盡悉其詳也若夫直督部

堂兼北洋大臣建立各局所名目實多皆關海

防軍務暨通商事宜是在修志時酌奪載所應

敬鄉筆述卷七 三 長春書屋

載俱有檔册在

敬鄉筆述卷八

天津徐士鑾沅青輯

天津縣續志余見有譌舛遺略於各卷內已加辨證矣惟舛略尙多隨所見卽濡毫記之積有數十條爰重加排次彙爲一卷列諸卷末俟重修志乘者訂正焉

列傳辨證 十三則

人物志文苑洪體仁一名天錫字吉人歲貢生學有根柢工古文與王介山周月東爲莫逆交周太史人麒其

敬鄉筆述卷八

長春書局

及門士也著有晚翠堂集論文三編又藝術洪天錫字吉人貢生少勤學日誦千言因其兄爲庸醫所誤殫精岐黃於瘟疫一門尤加意嘗云治瘟疫如走馬觀花毫釐一差卽謬千里可不慎哉著有補注瘟疫論案洪吉人明經體仁一名天錫是一人也文苑藝術各有傳觀之儼似兩人一人二傳殊爲可異吉人明經文苑既有傳矣精於醫術一節卽應添敘於傳後

又文苑梅成棟傳末子寶巖寶璐諸生寶熊副榜案選舉錄梅寶辰咸豐辛酉科副榜應改書子寶巖寶璐寶



熊皆諸生季子寶辰副榜

又文苑金思義傳末孫鳳池舉人案鳳池字掌綸歲貢生弟鳳洲字庾山道光己酉科舉人見選舉錄池字應改洲字

又文苑鄭熊佳傳末邑人華長卿爲之傳一語殊誤案續志藝文明載梅成棟所撰鄭熊佳小傳卽蓬山詩存所列之傳文苑鄭熊佳傳亦仍翦裁樹君學博所撰小傳爲之華梅莊學博序蓬山詩存未撰鄭傳也應改書邑人梅成棟爲之傳

敬鄉筆述卷八

二

長春書局

又文苑陳玠字石汀貢生善書案舊邑志例貢之末載有陳玠又津門詩鈔有石汀先生詩先生名作陳玠石汀爲秋帆侍御駿上代曾見秋帆京寓懸五言楹帖款署石汀陳玠玠字蓋誤作也應改玠

又忠節田履安傳咸豐六年投効安徽廬鳳穎道金光筋軍營剿賊立功洊陞副將記名總兵賜果勇巴圖魯名號六年正月十五日在湖北天門縣尹澧河地方與賊接仗受傷數十處陣亡時年三十二事聞優卹如例案田都督咸豐六年投効其六年正月十五日陣亡應

在同治六年余見咸豐十年庚申漕督袁端敏公爲金觀察光飭奏請本籍建立專祠疏內蓋據田履安等稟懇也六年上必須添同治二字

又孝行李永凝傳爲梅學博成棟舊誤敘永凝入火救母事甚詳今閱志中此傳後僅次四人又載李永凝事親以孝聞居室被火永凝撲入救母俱死妻張氏撫孤守志詳列女是又一人二傳也較洪吉人明經二傳尤可異前傳爲樹君學博當年之作以故無張氏撫孤守志一語儘可添注於前傳之末後傳宜刪去

敬鄉筆述卷八

三

長春書局

又孝行韓大佩李永凝繆文璧三傳連列於繆傳之下注以上三傳邑人梅成棟誤此注又誤案繆韓孝子合傳爲周南橋別駕自邠所作津門古文所見錄津門徵獻詩皆載焉今志中韓繆二孝子傳卽分書南橋先生之作修志者想從津門詩鈔錄出未經詳閱誤爲皆梅公作也此注宜刪去應於李永凝傳下注邑人梅成棟誤韓大佩繆文璧二傳下各注邑人周自邠誤繆孝子名文璧列傳誤作璧應改璧

案周南橋別駕繆韓孝子合傳分敘甚詳續志

二孝子傳蓋翦裁周作前於卷二述南橋別駕  
曾辨傳非梅作茲復辨證因傳下註語應須刪  
改也

又義行趙英傳案藝文載趙氏義產翰丁記下列趙瑛  
名碑文卽趙瑛作也津門徵獻詩亦作趙瑛列傳誤作  
英應改瑛

又藝術李紱磨字桐圃工畫與沈青來陳青立齊名以  
上傳中語案李桐圃工寫照善繪花卉居津最久沾上  
舊家多收藏桐圃畫幅亦皆以桐圃爲吾邑人不僅見

敬鄉筆述卷八

四

長春書屋

諸梅樹君學博之論畫也及鑾見先叔祖晴圃公墨經  
從軍圖識語始知李桐圃爲山東海豐人

詳見卷五此傳宜

改入僑寓

高凌雯案李桐圃鹽山人海豐場屬鹽山非海豐縣也桐圃當是海豐場籍

列女志貞女馮氏舉人馮向華之女字庠生張玉如爲  
繼室未歸而張卒女奔喪守節據邑人陳挹爽明府壇  
云貞女乃道光壬辰科舉人馮向榮之女非咸豐己未  
科舉人馮向華之女也華字蓋誤作然實有不應誤者  
華字必須改榮

人物志義行董岱字青岳乾隆己卯科舉人歷任景州

學正湖北荆門州州同遠安縣知縣致仕家居以下歷敘義行末云嘉慶己卯重預鹿鳴宴五世同堂壽八十九里人榮之而耆壽又列董岱小傳官階既未敘全義行亦未歷敘傳末數語與前傳無異尙少里人榮之一句一人二傳實無此例案邑志載重宴鹿鳴者金竹坡先生世熊文苑有傳耆壽不再有傳事實於本傳中詳敘不應重立一傳也此二行半字宜刪去

選舉錄名下注重宴鹿鳴字樣者如齊嘉孚沈兆雲齊棟皆列入耆壽不論已故生存修志時沈雲巢方伯齊春宇明府皆健在也惟乾隆庚寅科舉人周光裕名下注有重宴鹿鳴字樣而耆壽獨無小傳合前一則觀之董青岳明府不應再有傳耆而竟有周衣谷方伯不應獨無傳耆而竟無也

選舉錄辨證 九則

選舉錄乾隆十七年壬申科舉人徐汝瀾瀾字大誤案錄中乾隆四十二年丁酉科舉人徐汝瀾四十五年庚子科進士徐汝瀾卽徐東川部郎也乾隆壬申科舉人蓋徐汝槐乃鑾會叔祖錄中姓名有不可誤一字者瀾

字應改槐高凌雯案徐汝槐字文波非東川東川名欄與汝槐同榜進士

又道光二十四年甲辰科舉人張觀瀛榜名大俊案大俊爲咸豐戊午科舉人大儒嫡堂兄檢閱大儒硃卷履歷作觀瀛觀字實誤應改觀

又道光二十六年丙午科舉人繆世璠案津邑選舉錄作繆士璠檢閱光緒乙酉科舉人繆光笏卷履歷內有丙午科舉人士璠名世字實誤應改士

又乾隆二十七年壬午科舉人殷希文名下遺注詳人物三字案殷希文補遺有傳也例應添注

敬鄉筆述卷八

六

長春書屋

又乾隆四十四年己亥科副榜金坤名下遺注字霽岩詳人物六字案金坤文苑有傳也例應添注

又乾隆五十一年丙午科舉人徐通復名下遺注詳人物三字案徐通復義行有傳也例應添注

又武舉張秉銳名下注見進士詳人物遍檢武進士無張秉銳之名案張秉銳忠節有傳詳敘履歷並未敘某科進士也何所據而注見進士若果是進士不應注詳人物字樣於舉人名下亦實有乖於例應刪去見進士三字改注陣亡詳人物

又乾隆十七年壬申科副榜楊伯壘名下遺注見舉人三字案先中副榜後中舉人例於中副榜之名下注見舉人楊伯壘繼中乾隆丙子科舉人例應添注

選舉錄明通榜標目凡兩見前列明通榜冠下乾隆元年丙辰科二年丁巳科七年壬戌科十年乙丑科十九年甲戌科此後又列明通榜冠三十四年己丑科明通榜三字應刪去案內閣中書舍人題名從康熙己丑科至乾隆壬辰科一例注考取中正榜到閣未見明通榜字樣明通榜標目可改中正榜

敬鄉筆述卷八

七 長春書屋

貢生例貢辨證 九則

貢生張林蔚名下遺注字桂圃詳人物六字案張林蔚文苑有傳也例應添注

例貢殷維玠名下遺注詳人物三字案殷維玠補遺有傳也例應添注

貢生閻炳案閻閻爲二字姓實分二余入泮時卽閻先生炳挨保也見其姓作閻字閻應改閻

例貢第二頁上排前三行楊景猷注淮安府經歷僅隔四名又列楊景猷注淮安府經歷復見應刪其一

貢生劉鳳階名下注見舉人賀兆魁名下注更名嵩齡見舉人案選舉錄劉鳳階道光甲午舉人賀嵩齡道光甲辰舉人是其名已列選舉錄矣不應再列貢生內如此開列書不勝書何獨載此二人余不解於名下注見舉人三字時尚不自悟謬誤此二名必應刪去

例貢例監末名李保泰注字福階監生閱之可異案福階上舍王姓卽例貢監中所載王醅卿光署正觀墀之長子從楊香吟師有年與余爲同學後以從九需次奉天壯年忽殞殊可惜也李字之誤初未看出余見字福

敬鄉筆述卷八

八 長春書屋

階監生而名係保泰始知其誤李字必應改王例貢例監劉良璧注附貢案此卷補編載入同治九年庚午科舉人副榜姓名副榜中有劉良璧卽例貢例監所載劉良璧旣登選舉錄矣例貢內之名卽應刪去否則視作二人余知實係一人且中癸酉科舉人也例貢第三頁後九行上排列李會遠注增生四品封有傳下一排九行緊頂上列李嘉善注增貢檢閱人物志義行有李嘉善字會遠增生一傳遍檢再無李會遠之傳是誤將李會遠作一人之名李嘉善又作一人疏謬

可謂極矣應改併書之李嘉善字會遠增生四品封詳人物

例貢例監前列一百餘人不滿三頁特注以上蔣稿檢閱舊志有已載者三人靳乾亨江西鄱陽縣知縣靳夢麟陝西固原州知州靳夢熊四川忠州知州續志靳乾亨貢生汀州府同知有政聲靳夢麟涇州直隸州知州靳夢熊雅州府知府案官階與舊志皆不同蔣雄甫先生當據三靳官之所至而書視舊志皆升遷也余意續志既重載三人似應列首注明重載之由未可僅照蔣

敬鄉筆述卷八

九

長春書屋

稿錄之續之已也爰特揭出俟再修邑志者裁察焉

辨證彙紀 十則

覆勘譌舛遺略彙而紀之不復分類補入

人物志循吏姚逢年傳沈雲巢方伯所譔前敘逢年自乾隆辛丑通籍仕福建詔安令歷述政績至攝太平徽州廬州諸府篆止後敘子承恩道光癸巳通籍仕奉天蓋平令歷述蓋平承德政績蓋父子合傳也父子合傳志書列傳中恆見例應於選舉錄進士姚逢年名下所注詳人物下添注子承恩附當日想遺略耳



選舉錄乾隆辛酉科舉人蕭湘丁卯科舉人畢懷圖庚午科舉人朱基壬午科舉人王學海以上四人名下皆注見明通榜乾隆戊子科舉人卜維吉名下獨注見中正榜未免不劃一矣案王學海卜維吉乾隆三十四年己丑科同取中正榜何於王注明通於卜注中正耶明通中正名目前已辨之應一例改注中正榜

選舉錄進士乾隆三十七年乙未科案錄中前列乾隆三十四年乙丑科照干支排算乾隆三十七年爲壬辰科乙未二字殊誤不解當日何以疏舛至此乙未二字應改壬辰

敬鄉筆述卷八

十

長春書屋

選舉錄武舉道光丁酉科藍恩重名下遺注見進士三字案錄中藍恩重道光庚子科進士也檢閱武舉錄分上下排列名上一名爲張秉銳蓋誤注於張秉銳名下前已辨證矣藍恩重名下應添注見進士

選舉錄武進士道光丁未科劉英德檢閱武舉丁未科之前無劉英德之名癸卯科有劉英魁道光丁未科武進士卽劉英魁德字蓋誤作也應改魁於武舉劉英魁名下添注見進士

人物志忠節傳後附記勦賊陣亡武職銜名山東臨清之役勦賊陣亡都司銜守備陳光裕余見華梅莊學博米齋札記作陳守備康裕因檢閱陳仙波主政恩壽硃卷履歷從堂伯叔有康裕名注同治二年駐山東臨清州戰賊捐軀光字實誤應改康

選舉錄道光丁酉科舉人于世琦字樵林容城縣訓導案津邑選舉錄作于士琦檢閱己酉科舉人高學濱硃卷履歷業師內有于樵林名士琦注道光丁酉科舉人大挑二等候選教職世字實誤應改士

敬鄉筆述卷八

十一

長春書屋

選舉錄道光庚子科副榜劉景芳又己酉科舉人劉桂芳名下注字潤田山東東阿縣知縣案津邑選舉錄庚子副榜己酉舉人皆作劉桂芳副榜名下注教習二字舉人名下注山東東阿縣知縣續志選舉錄於副榜之中舉者例於副榜名下注見舉人此則無注必以劉景芳劉桂芳爲二人津邑選舉錄於副榜名下無此注此錄爲陳挹爽明府塏輯刊蓋照鈔華梅莊先生稿本至同治初年後皆挹爽明府續緝劉潤田明府會否先中副榜亦記憶不真矣檢閱己酉科舉人郭麟書硃卷履

歷業師內有劉潤田名桂芳注庚子科副榜丁未考取八旗官學教習本科同榜舉人據此證之續志選舉錄副榜作劉景芳舉人作劉桂芳儼然昆仲其誤可哂也景字必應改桂並應於名下添注見舉人三字

選舉錄補編補同治九年庚午科鄉榜也補編二字下注鐫板已成適值裝訂發榜補紀案錄中所載是科八舉人五副榜僅紀姓名名下皆無注余謂板既鐫成是科殊不必補既補則須照前加注改注舉人郭恩第名下應注字曼生兵部小京官於拔貢郭恩第名下去此

敬鄉筆述卷八

三

長春書屋

八字改注見舉人蔡潤兩名下應注字雨田於副榜蔡潤兩名下去此三字改注見舉人副榜張克勤名下應注見甲子劉良璧中是科副榜例貢例監內劉良璧名應刪詳前錄中姓名下應加次章者皆加注方與前錄一律似此補紀適形潦草有謂此編補列於例貢例監武職補遺後是補半頁空白之板顯然可見邑人於續志噴有煩言多不滿意者余正難強爲辯白也

學校附祠廟載僧王祠在西門外祀督兵大臣親王僧格林沁檢閱舊志學校附壇廟載怡賢親王祠案此書

僧王祠是沿俗稱未免失於檢點不合體例應改書僧忠親王祠僧親王謚忠也

著述名目補遺攷證

五則

續邑志藝文後附載著述名目例言云藝文取其有關本邑利弊及人物風景者登之著述則第登作者之名目庶不致久而湮沒至現在人不登案續志成於同治九年檢閱津門詩鈔彼時其人現存者僅知樊文卿先生光緒八年始歸道山茲就詩鈔所載爲續志未登者錄出以補其遺如金野田處士銓野田存草李夢厓孝廉珠光夢

敬鄉筆述卷八

三

長春書屋

厓詩草康掌卿諸生鈞石斧集馮石農副貢相芬南遊草樊鑑塘明經宗浩寒筭集金馭東諸生大中可亭集四卷金蓮塘布衣永歸與草堂集王益齋大令履謙遊豫雜詠一卷朱憲百明經維翰展蕉軒草邢野航處士元植綠柳山房詩草張治堂離尹廷選簪花小錄一卷西湖雜詠一卷治堂草一卷王樹門先生名失遊秦晉草王晴川處士際清味古齋吟稿樊文卿貳尹彬文卿吟稿徐蘭生大令大鏞見真吾齋詩草共十五家又金芥舟山人玉岡黃竹山房詩鈔三十卷田盤紀遊草一

卷天台雁蕩紀遊一卷粵遊草一卷續志僅列黃竹山房詩鈔之目劉韻湖上舍錫寫梅閣詩草二卷題畫詩一卷續志僅列寫梅閣詩草樂樹堂武庠生樟粵遊草續志列客况遊蹤未審是一是二俟攷至各集卷數有無悉照詩鈔錄之詩鈔尙有數家知非原籍天津其著作名目不敢濫登

津門詩鈔附載中得一家著作名目于虹亭進士豹文

詩後載虹亭先生弟峨文字鎮川乾隆庚午舉人

案選舉錄

于峨文乾隆庚辰科舉人詩鈔作庚午誤歷任山東嘉祥魚臺縣知縣終直

敬鄉筆述卷八

古

長春書屋

隸蠡縣教諭著有雉翔齋詩草二卷馮耕竹布衣嘉蘭詩後載耕竹子鳳超字桐仙號古愚少歿著有惜陰山房草附存津門權歌一首又於詩話中得一家著作名目詩話載及門李靜亭和春嘉慶丙子舉人詩愛劍南一路著有一得錄詩草楊茂才慎恭所著醉六吟草五絕甚佳案續志選舉錄李大令和春嘉慶丙子科舉人山西天鎮四川定遠縣知縣楊副貢慎恭咸豐乙卯科副榜字醉六詩話所錄二公詩全章摘句俱有而不入正編與沈潤田參軍相同四家所著名目亟爲錄出俱

未可湮沒也

畿輔詩傳凡例詳陳所選詩家著作名目並有詩以專集爲重之語其中吾津四家著作名目爲續志所未登亦爲津門詩鈔所未載如華春浦大令蘭皖城集一卷樊蔭珊大令宗清留餘山房詩集二卷梅雅村布衣拙石山房草一卷徐菊圃中翰菊圃詩草於詩傳中又得此四家謹照錄出以補續志著述名目之遺

著述名目載蘭亭詩鈔殷希文著案續志人物補遺有殷大令傳希文字憲之乾隆壬午科舉人檢閱津門詩

敬鄉筆述卷八

五

長春書屋

鈔畿輔詩傳大令詩均有所采津門詩鈔則謂著有和樂堂詩鈔詩傳則謂有和樂堂詩鈔五卷附載董桂敷序蘭亭詩直據所見脫去塵氛含孕餘味自足以傳此

序語津門詩鈔未載

詩傳載明大令詩鈔卷數並錄董序是臆藪

先生當日實見詩鈔作此名目也續志作蘭亭詩鈔者

蘭亭乃大令之號余見著述名目列有和樂堂文集殷

維玠著

人物補遺有傳字爾錫南河邳宿通判

憲之大令爲爾錫別駕子

或因此改其名目耶和樂堂當是殷氏世代堂名若王句香上舍翼瀄詩集名味古齋詩草

見續志暨詩鈔

王曉川布

衣際清詩集名味古齋吟稿見詩鈔是又兄弟同一齋

名也因攷證殷憲之大令詩鈔並為揭出

又載山舟草鄭熊佳著案續志文苑傳熊佳字南翔號

蓬山乾隆庚辰科進士歷任廣東惠來電白樂昌欽州

等牧令與同邑金芥舟布衣玉岡契分最深延館署中

時相唱和彙為山舟草一卷謂蓬山芥舟合集也余藏

有蓬山先生詩集所著蓋南翔集一卷出嶺集一卷後

附嶺海酬唱集一卷旁注原名山舟草共訂一冊總名

曰蓬山詩存華序卷端有邑人沈文和公一序華梅莊

敬鄉筆述卷八

去長春書屋

學博一序又梅樹君學博所撰小傳續志所載似覺未

協應改書蓬山詩存二卷鄭熊佳著沈序中有蓬山先生詩集二卷之語

嶺海酬唱集一卷旁注即山舟草鄭熊佳金玉岡合稿

如此分書便合矣賈廷琳案蓬山詩存咸豐元年刊本

遂間堂張氏攷

天津縣舊志人物傳流寓張坦字逸峯永平府撫寧人

祖明予遷天津遂家焉高凌雯案張氏由明予遷津查氏由慕園遷津魯菴蓮坡輩實

皆生長茲土籍貫之說用以限制應試士子不妨從嚴

至桑梓儀型義主觀感但久居鄉里雖未入籍自不妨以本籍人視之况津人更無所謂土著耶長蘆志文學張坦張壘合傳父霖

官福建布政使又龍震玉紅草堂詩集記亡友張帆史交情始末謂帆史本封翁聞予公冢男因其伯子方伯魯菴居長乃行第二封翁聞予公舊隨其兄光祿明予公業鹽於長蘆遂家天津帆史卽天津生也案遂聞堂張氏自國初明予公遷居天津迄今世爲天津人續志人物傳魯菴方伯霖列入循吏聲百中翰壘列入文苑蓋因後代世爲津人遂將上代歸入津邑似未允協逸峯爲魯菴長子聲百胞兄旣載舊志流寓有傳矣魯菴暨聲百續志亦應載入僑寓與舊志庶不相背魯菴方

敬鄉筆述卷八

七

長春書屋

伯於河東錦衣衛橋立思源莊塋園

高凌雯案天津思源莊乃魯菴曾孫

南村建魯菴所建之思源莊在撫甯此特襲其名耳

見諸津門詩鈔題詠甚多至

入籍顯而可徵者選舉錄張虎拜乾隆三十三年戊子科舉人張映暉嘉慶三年甲子科舉人映暉中舉在後卻長虎拜一輩虎拜乃庠生映斗子映斗爲張瑄子張坦孫長蘆志孝行張瑄原籍撫寧自先世業鹺於蘆遂家天津據此觀之張氏入籍縱不自瑄始亦必自映斗始也

張笨山舍人



長蘆志文學張霏字念藝號笨山祖籍撫寧移居天津幼敏悟工書擅詩名由歲貢生官中書舍人累試不第遂閉門著書止結二三文字交著有欵乃書屋弋蟲軒

星閣

高凌雲案星閣當作詩星閣

秦遊諸集津門詩鈔張霏字念藝

號帆史一號笨山又號笨仙別號秋水道人魯菴方伯弟廩貢生內閣中書有帆齋逸稿晉史集欵乃書屋詩集綠豔亭集梅樹君學博謂津門詩學笨山舍人實倡其風以故詩鈔所選舍人詩爲獨多案續邑志貢生僅列先生一名一號似覺未協長蘆志先生暨二姪坦壘

敬鄉筆述卷八

六

長春書屋

皆列文學且舊志有坦傳續志有魯菴方伯暨壘傳余意應立先生之傳一例載入僑寓則允而且當矣至先生所著晉史集乃讀晉書絕句二卷光緒甲申邑人李茂才其光於舊書肆購得稿本余假來照錄一冊校而刊之欵乃書屋詩集稿本先年爲從堂兄蘭生明府大鏞購藏因亦假來錄分二卷付梓以傳余知先生後裔所藏者弋蟲軒稿綠豔亭詩文集二種詩文集卷數較多若帆齋逸稿星閣秦遊諸集想早散佚矣

紅豆樹館詩話海寧查氏代以詩名後占籍宛平宗風猶能不墜蓮坡居士其尤著也案蓮坡居士卽查爲仁字心穀康熙辛卯科解元畿輔詩傳如查爲義查禮皆注爲仁弟善和爲仁子查彬爲義孫查誠善和子俱宛平人咸豐戊午科查春庭孝廉以新宛平人余同年也檢閱戊午順天同年齒錄錄集各硃卷前履歷而成知爲義卽春庭高祖查彬卽春庭之祖查爲仁查禮卽春庭胞高伯叔祖善長善和爲春庭曾伯叔祖查誠爲春庭從堂伯祖以此攷之查氏自蓮坡居士以次皆宛平

敬鄉筆述卷八

九

長春書屋

人與陶晁薌先生所謂占籍宛平語相符續志循吏查禮查彬二傳應改入僑寓又津門詩鈔載爲仁爲義查禮善長善和查誠諸公詩當日均應列入流寓津門徵獻詩查爲仁查禮亦沿詩鈔而入詠俱未免借才異地之嫌若遂開堂張氏自魯菴方伯笨山舍人上輩明子聞予二公遷津迄今後裔世爲天津人茲攷戊午順天同年齒錄爲仁爲義嫡派近屬久居於京世爲宛平人自不同於張氏也

案查春庭孝廉履歷首列北遷始祖諱秀前明

江西撫州府臨川縣學廩膳生萬曆十八年遷居順天宛平縣據此則查氏自前明卽籍宛平縣矣梅樹君學博不知查氏早經占籍宛平非寄籍宛平也天津究屬僑寓至陶鳧薌先生海寧查氏之說必有所據余亦聞海寧之查與宛平之查爲一家其支派則不得而知矣

再沈雲巢方伯著有敬止述聞丁酉初冬始得寓目書僅十數頁述紀津邑人物蓋爲修邑志采輯也內載查憩亭先生彬宛平籍世居天津

敬鄉筆述卷八

三

長春書局

工詩善畫蘭甲辰進士末注僑寓二小字觀沈文和公所紀則查爲仁爲義以次俱爲宛平人益明矣

高凌雯案查善長乾隆十九年進士查彬原名曾印乾隆四十九年進士俱天津籍見進士題名碑鐵雲爲蓮坡子蓮坡宛平而鐵雲天津是父子異籍春亭爲憩亭孫憩亭天津而春庭宛平是又祖孫異籍矣蓋查氏分占兩籍實屬一家可不必如是漸漸也

畿輔詩傳查訥勤注天津人檢閱津門詩鈔知訥勤爲查誠長子選舉錄嘉慶辛酉科進士查訥勤字簡菴宛平籍而錄中嘉慶戊午科舉人內又未列其名案春庭

孝廉履歷訥勤名在再從堂伯叔中又省勤久勤毅勤爲春庭從堂伯叔省勤恩貢生久勤歲貢生毅勤字果菴道光癸卯科舉人懷來縣教諭余知此三公爲天津人果菴子乘漢同治丁卯科副榜至學博昆季從上代何人何年入籍不得而知矣又津門詩鈔查訥勤之後列查昌業詩名下注昌業號次齋別號松亭祖籍海寧以事譴戍濟南遇赦家天津余見詩中有答儉堂叔作有叔儉堂招飲作有留別都門叔儉堂農部作儉堂卽查禮之號檢閱春庭孝廉履歷無昌業之名次齋祖籍海寧稱儉堂爲叔雖支派遠近不得而知究係同宗次齋遇赦家天津其詩似應列入僑寓至次齋後人入籍與否不得而知俟再攷

查漢客處士昆季

畿輔詩傳查曦查爲政注天津人檢閱津門詩鈔知曦字漢客著有珠風閣詩草爲政字漢公曦弟也著有蘭亭詩鈔華文珊緘齋雜識漢客先生生於雍正甲寅先世本歙人祖某寓天津遂家焉周七峯焯序漢公詩云查子漢公迺天津詩人漢客之昆季行也案續志文苑

查曦有傳漢客先生昆季先世歛人從祖某入籍天津與蓮坡居士實非一家因攷于斯堂查氏特爲辨明惟漢客昆季自祖某卽入籍天津迄今津門查氏僅知果菴先生一支俟再攷詢

直抒管見

四則

舊邑志之例有未可盡循者人物志列傳未分名目續志分列較舊志爲勝舊志人物有傳者於選舉錄會榜鄉榜貢生名下概注詳人物續志旣分名目似應於儒林文苑孝行忠節諸名目分晰注出如儒林有傳卽注

敬鄉筆述卷八

三

長春書局

詳儒林孝行有傳卽注詳孝行未可仍概以詳人物注之且所注尙不劃一例貢例監暨武會榜鄉榜武職有注詳人物者有注有傳二字者有注陣亡有傳者殉難有傳者未免太率意矣陣亡殉難注明以下卽概注以詳人物看去尙屬一例余不解續修邑志時列傳旣分名目猶不知分晰注明之爲得體耶

案舊志修於乾隆初年仍遵一統志例止稱人物不設名目人物外止有列女仙釋流寓三項未免固執寡見矣攷康熙十年後各直省郡邑

志奉行通修悉遵秦豫二志式例然秦豫二志人物外有列女仙釋流寓又有孝行隱逸省志爲進呈之書浙撫尙添儒林文苑二項據此可徵各直省修志雖屬奉行已可變通况郡志邑志俱無關進呈變通必期無礙於理余見康熙卅年前郡邑各志人物列傳已如吾津續志之分設名目矣何以乾隆初年津邑修志仍膠守一統志例耶

志於人物外有列女蓋因男女之別特分志之列女若

敬鄉筆述卷八

三

長春書屋

是之重哉舊志於貞孝節烈連綴統載未分名目續志因之入數倍多於舊志開卷未能一目瞭然余見志有分列者孝女烈女貞女孝婦烈婦節婦名媛標此七目列傳則分屬之又見華梅莊學博輯有津門人物志一冊分設儒林文苑諸名目記較續志多即將舊志列傳暨未入舊志姓名分隸焉案續志已列女則分孝女貞女孝婦烈婦及名媛諸名目記所列尙不止七日即將舊志列女暨未入舊志姓氏分隸焉案續志已蠅頭細書夾行添注蓋手寫草本尙未成書余知梅莊先生正有所見而

爲之也總目統曰列女於卷中按所分名目次第載之  
異日重修邑志此例似可爲法至續志節婦之彙旌者  
可做照例貢例監於篇中分上下兩排開列較之數行  
連綴而書者自爾明顯易見矣

志於人物外有流寓蓋土著寄籍之分正別其不同本  
郡邑人物也余於遂間堂張氏于斯堂查氏故詳攷而  
明辨之又證藝術李紱磨之非天津人案天津自前明  
設衛以來至國初土著尙少順康間流寓日多然至續  
修邑志時某爲土著某爲入籍某爲寄籍無難區分是

敬鄉筆述卷八

三

長春書局

在修志者細體例義自不容牽混於其間也

世居津年久合例入

籍卽同土著世居津而非津籍仍是僑寓與寄籍中會者俱非土著

邑志以文獻爲重而獻之足徵惟恃乎文文較獻爲尤  
重故藝文之志甄錄宜詳凡文之有關忠義孝烈者皆  
宜采入藝文志余於述錄牛次原太僕節婦崔氏李氏  
事記一則後曾略論之

詳見

卷六津門詩鈔附載之文不少

續志多未采入此外近年梓傳津門徵獻詩津門古文

所見錄異日修志皆宜詳覽而采選也

賈廷琳案津門徵獻詩八卷光

緒十二  
年刊本

續邑志吳霖宇觀察惠元後序津邑舊志創修於乾隆四年迄今閱百餘年獻渺文微措手非易適購得邑廩生蔣君玉虹纂稿若干卷起於乾隆初年至嘉慶廿二年止網羅散佚事多可探然距今又五十餘年矣姻丈沈雲巢方伯引疾歸里予就正方伯惟於人物列女藝文諸志時參酌焉鑿閱續志卷首裁定者爲雲巢方伯總修者爲霖宇觀察觀察鑿表兄方伯鑿表叔也觀察自道光甲辰通籍後宦京外廿餘年桑

敬鄉筆述卷八

三

長春書局

梓文獻夙非留意者旋里後於邑之舊學文人亦少連屬觀察以人物列女藝文諸志藉重於雲巢方伯可見矣猶幸修志時覓出蔣雄甫明經纂稿其間雖闕五十餘年然梅樹君學博津門詩鈔所輯自明季至道光初年人則各有小傳且附載忠義孝節之文亦夥足備採選當日若於詩鈔中詳加攷證兼取王介山先生詩禮堂諸集參核之再於宿學老儒時加咨訪商訂尙不至漏略譌舛若此鑿見方伯篷窗附錄暨



敬止述聞一冊雖所紀人物無多然實能留心  
文獻者無如修志時方伯八旬以外志書告成  
之日卽方伯重宴鹿鳴之年蓋八旬有八矣方  
伯體氣夙彊惟年至耄耄精神實難周顧變又  
見賤名濫竽校對之列彼時供職薇垣兼署侍  
讀嗣卽升補任重事繁何能旁及實未見志書  
一卷一頁也今日之糾正謂變補盡厥職也可  
謂爲二公彌憾也可如謂變之筆述適以揚二  
公之過則區區此心知爲吾邑文獻重定有知

敬鄉筆述卷八

三

長春書屋

我諒我者光緒戊戌春二月變謹識

族叔曾祖沅青公中年致仕後誦詩讀書耄耄匪懈生平著述等身經公自校刊行者僅醫方叢話宋豔二種此外有臞鷗戲墨文體駢儷見公蝶訪居詩集自註而傳本迄未之見又皇朝謚法考續補編數頁附刊鮑氏原編之後歲戊午同邑張君君壽得公所著古泉叢考稿本四卷珍如拱璧嗣由金君浚宣刊入屏廬叢刻中張金二君敦於古誼至足多也按古泉叢考一書其下方題有藏雲閣識小錄之一是則識小錄不止一種惜今無自考又嘗見公著書冊子題有邇言雜記今亦未

敬鄉筆述跋

長春書書屋

見其書又酒籌譜一種張君君壽僅獲一見卽已爲南省士人購去吉光片羽其隱顯無常也如此曩年吾邑修新志時總纂高彤皆先生將公所著敬鄉筆述八卷詳加校閱并手題籤識語多精當世章今以是書付之梓人浼固安賈君君玉爲任按勘條析所知附列卷末書成更擬刊行蝶訪居詩文集及仙蝶圖詠冀陶光之久鬱者得次第闡發焉噫溯公之歿距今纔十餘年耳其他纂著稿本身後已多散佚搜討釐訂責在後人綜公生平學優則仕仕優則學穫於古訓以淑身淑世其

嘉言懿行垂裕於後昆者敢不守諸辛未孟冬族曾孫  
世章謹跋

敬鄉筆述跋

二

長春書屋

